

MUKHALELO WA MUTTHU OOMALELA



Kooxukhuru, Munna Neville. Apwiya yooreeriheni.

Ti yooreera otthikela okhala-tho mutapernakulu voosiis'ula. "Mooxeleliwa," v'ophenta nyuwo othene. Ni kinniroromela wira nla ninrowa okhala nihiku nuulupale wa hiyo othene, ohoo—Ohoolo wa Pwiy'ahu. Nto vano kookhalana nisomi voosiis'ula. Kintthuna naanaanoru kikelele nisomi nenla, okhala wira ti noo. . . Miyo kinoona wira ti nootthuneyexa. Ni nlo ti. . . Ni wira atthu ehikhale oowuukhuwaxa, moosuwela, ekhalaka ookhala okathi munci-ene, anci-ene yeemenleene. Kinookelela naanaanoru nisomi.

² Nto vano, olelo ohiyu, kintthuna kilavule mwaha wa *Muhooleli A Makhalelo Aka*. Ni kinroromela wira anci-ene anwerya, anci-ene sinweryaney'aya, anookhala-vo okathi uwo, olelo ohiyu. Nnakhala vo, nyuwo mwaakhalanne-ene ekerej'anyu, hiyo nri. . . vekeekhai, nintthuna wira mukhale o—okereja wanyu. Muhaana okhala weiwo, weiwo nri nipuro nanyu na muteko, wira muthuko anyu waaryeke.

³ Vano, hiyo ninnitthikela niroromelaka wira, khula okathi nyuwo onihokolow'anyu, hiyo ninookhalana opuro munci-ene vakhani va. Masi ninnikhalana mukattyamiho ni yeeyo, oh, mapuro othene. Nikhuru nlo na maatiministaratoore vekeekhai aathipa itthu sothene. Vano awo anooroiha nipuro nimosa, iwo enookupaliwa; vano n'uroiha nipuro nikina, vano enookhoottiwa. N'utthikela oroiha, nto awo anookupali va, n'uhokoloxa. Oh, okathi xeeni onkhalanak'ahu! Masi, moosuwela, Satana okathi wothene onikhala nwanani a etthu eri yooreera. Muupuwele paahi, nyuwo kweekwe munikhala n'ixariya mwaha wa. . .

⁴ Miyo kaatthuna osuwela vatthu vaari-anyu, Anthony. Kinnoona wira mookumana n'atithi anyu. Ni miyo koowehaweha, vamuthukumanoni. Awo yaahimnye wira mwaakilanthi vaavo. Hiyo ninnitthapa okhala ni nyuwo n'atithi anyu va ni hiyo, Munna Milano onikhuma oNova Yorke. Kinwehererya, orowa ilapo s'okhopela ekwah'ela, kinookhalana esukhumelo ekina, okhuma oNova Yorke, nipuro nlo iwo, Apwiya yathhuna vale.

⁵ Nto siiso hiyo ninnitthapa vanci-ene mwaha wa khula mmosa a nyuwo. Ti—ti yooreera tu nyuwo okhala va.

⁶ Vano hiyo naahikhalana okathi muulupale nsana ohiyu, ahiso mano miyo kaahikhalana. Kaahikhalana e. . .

[Muthukumano oniira, “Amen.”—Mol.] “Ni Yesaya mpaani moothukumana.” Nto vano nyuwo . . .

⁷ Nto voosis’ula, nintthuna nilavule mwaha wa, ahiso wiixuttiha, kiireke, nawerya vale, “Oteka Empa ekumi; oteka e—oteka Empa ekumi ya nipuro n’okhala na Muluku mukumi, Mutthu oomalela; Empa ekumi ya Muluku mukumi, memmo Owo onikhal’awe-mo.” Nto vakhala wi . . .

⁸ Miyo kinnoona wira vanniipiwa sana va. Nkimphiyerya wiiwa. Nto olelo ohiyu, kinrowa weererya ophiya va. Amwaar’aka aakileela mwaha wa Munna mmosa Ungren, kookupali wira ti naari nsina nawe, onikhuma o—oTennessee. Vano, owo aari vaava nsana ohiyu. Nkinimoona voosis’ula, masi kinoona wira ori vaava nipuro nlo. Ni kaanitthuna kimwiiwe aipaka olelo ohiyu, kawerya vale, wira, wala *Orwaaka Okhuma Movuwani Mwawe*, wala *Muulupale Ti Nyuwo*. Kaanitthuna kiiwe yeeyo. Akavi yaatthuna omwiiwa Munna Ungren? [Muthukumano oniira, “Amen.”—Mol.] Oh, miyo—miyo okisivela wiipa wooreera. Ni Meda ohimnye wira owo aarina nsu ntoko epariitono. Ni enikuupuxerya Munn’ihu Baxter; owo mulipa—oowiipa, nave, ntoko hiyo othene sinsuwel’ahu. Vano *Orwaaka Okhuma Movuwani Mwawe*, wala *Muulupale Ti Nyuwo*. Kookupali wira koomuphwanya vano, va . . . Yaamukhala sana, Munna Ungren, olelo ohiyu, mwatthuna vale, mwaamukhala vaava? Munoorowa okhala, wala munimwiilipiha wira mukhale vamutekoni w’ohiyu? Ahe, miyo—miyo . . . Ahe, muhi . . . Kinimooleelani, ankhiiwila, vakhala wi hiyo . . . Nkintthuna omuruuhela hata wuukhuwa hata mutthu. Masi mwaha wa xeeni, nto, natthuna vale, okathi wa *Ikanyeryo Thanu na Piili*, okathi onlaley’ahu yeeyo, nyuwo mwarwa vale. Kaatthuna kikaravari, moone, wira nikhalane, *Muulupale Ti Nyuwo*, ni, nave, *Orwaaka Okhuma Movuwani Mwawe*, okathi yoowo.

⁹ Oh, kahi yooreera waarumeela Apwiya? Nkisuwenle etthu kaarow’aka wira kahaakhanle-ru muKristu! . . . ? . . . Ti yooreera tu okhala muKristu. Kinoona ntoko kinootupha paahi osulu ni vathi ni kikhuwelaka, kiituperyaka nsu naka. Okhala muKristu, muupuwele yeeyo, oheleliwa nankura voomalela mwa Kristu!

¹⁰ Koosuwela wira khula okathi kiiihana nsina na mulopwan’ola voovonyeya. Ti S.T. ahiso T.S., wala etthu ntoko siiso. Sumners, Munna Sumner. Owo . . . Kintthuna kimuxukhuru uwo ni mwaar’awe mwaamukhaani ooreera murima. Kinoona wira owo ooviriha ntoko, yaakhala ntoko, miyeeri soophiyaka mithanu na mosa, olepaka *Okathi* iya *Mithanu na Miili sa Ekereja*. Nto vano hiyo nookhalana ottuli nno, yolempwa ni maakina, soolikana sene wira suuluuliwe, ni sinrowa okhala eliivuru, *Okathi Mithanu na Miili sa Ekereja*. Munna Sumner muthiyana, vatthu ti vatthu muri-nyu, vekeekhai munoonihiya woolivani mwaha wa yeeyo. Eyo,

eyo khereere okuxa muteko munci-ene. Vano, ti wunnuwa *ivo*. Saamukithuna miyeeri mithanu na mosa wira kisome, okihiya meekh'aka okuxa okumiha mufiitani, vano nto orukunxa n'ukumiha etthu ile etthikeliwe, vano n'ukhaliha eliivuru. Hiyo ninoothhokiha niveleele wira natthittiwe ni maakina naanaanoru, maana hiyo ninoona wira eyo etthu entthuneya wira atthu ekhalane voowaakuveya, nto nyuwo munooverya osoma. Vano Billy aamukooniha paahi, okathi ovolonw'aka wiithela iwe, minuutu vakhani sivinre, wira—wira—wira naari—naari noolikana vano wira nirowe natthittiwe ni maakina. Vano, munna, munoolinvwa mutapernakulu mwaha wa yeeyo. Miyo nkinwehererya nyuwo wira eyo mahale-ene. Nto—nto ahiso hiyo . . . Nakhalana vale eliivuru ene wira nihele esisapo, wala etthu siiso, ninoohela esisapo wira nyuwo mwaakhele etthu okathi p'ukathi entumihw'aya, etthu p'itthu. Nyuwo mulavule paahi nnikhuru, nikhuru na maatiministaratoore, wala amosa-amosa wa yaawo iwo, vano awo anookhapelela yeeyo wa nyuwo. Apwiya yooreeriheni saana.

¹¹ Atokweene Munna mulopwana ni Munna muthiyana Kidd akilaathanse va, oophiyaka ntoko miyaakha emiya, vakhani paahi. Nto miyo kaahimukumanana owo okathi vakhani ovinre, vano owo khwira, “Ahe, ola khino onrowa okhala okathi wookiserya owoonani, Munna Billy.” Khwira, “Kinootepa wuuluvala.”

¹² Miyo khwira, “Oh, wulu! Nkinthuna owiiwani muhimyaka yeeyo. Nyuwo murisa ntoko maama ni tiithi axikhaani.” Hiyo ninnaaphenta Munna mulopwana ni Munna muthiyana Kidd. Hiyo, khula mmosa, ninnaamphenta. Ni iyo paahi . . .

¹³ Ennikirihi etthu kaawoonasaka ovolowa mukereja, ni anaitthoko siisaale. Nto muupuwele, awo yaanilaleyasa Ehapari yooreera miyo kihinatthi oyariwa. Ni ka mulopwana oowuuluvala. Ayo, muupuwele paahi, awo yaanilaleyasa miyo kihinatthi oyariwa. Nto vano miyo kiri va, ni kinikhala kuupuwelaka wira kinootepa wuuluvala. Kinihala wuupuwela paahi wira koolikana wira kihiyee. Kinnimoona Munna mulopwana ni Munna muthiyana Kidd ovolowa, “Avuwihwe Muluku! Aleluya!” Miyo kiniira, “Nnari, kinnoona sana.” Ayo, mulopwana. Owoonasa awo, moota awo anweryas'aya, moota vekeekhai anoothokelelih'ayani!

¹⁴ Vano mutthu onimoona wii, ntoko munnuwelo aka, tho, nave nto nlelo erowaka vapuwani. Yaahirwaasa voosiis'ula khuveka iliivuru, sinto yaamuweryasa okuxa iliivuru n'utumiha. Yaatthunasa ifiita, wira ekhumase, yaphwanye minepa s'atthu mwaha w'orumihya ifiita iya, ni miyaakha soophiyaka emiya. Vano ari vayi “mapuph'anyu maili” hiyo naahim'y'ahu nsana ohiyu? Ayo. Miyo khupacerya wuupuwela, “Ari vai awaka?” okathi ohimmy'awe yeeyo—yeeyo nsana. Murina miyaakha mikavi, Munna Kidd muthiyana? [Munna Kidd muthiyana

oniira, “Miloko mithanu na miraru ni mmosa.”—Mol.] Miloko mithanu na miraru ni mmosa. Murina miyaakha mikavi, Munna Tom? [Munna Kidd mulopwana oniira, “Miloko mithanu na miraru ni miili.”] Miloko mithanu na miraru ni mmosa ni miloko mithanu na miraru ni miili, ni nlelo erumeelasaka mapuph’aya, mmutekoni, nlelo erowasaka.

¹⁵ Yookhala etthu ehilonke oOhio, Munna Kidd muthiyana onsuwel’awe, telefooni onooruma owannyaka. Nihiku nlo, owo aahimwaattaka, nto mwanamwane mmosa, mwanamwane mmosa mwamuthiyana, kookupali wira aari yoowo, aayariwe, ni marupo yaari ota. [Munna Kidd muthiyana oniira, “Eyoso.”—Mol.] Eyoso, ota wa mwaana. Vano meetiku khaasuwela yo wira mwaha wa yeeyo, ni owo aanoova olaiherya operasawu. Hiyo khuvekela. [“Khooperariwa, Munna Branham, khuhokoloxeriwa muhina, okhala wira, yaahimmwe wira, ‘Khivaaweryaneya owo okhala mukumi.’ Vano awo khuttikiherya marupo awe muhina.”] Khuttikiheriwa marupo muhina, ni operasawu, ni yooniwa wira khaarowa okhala. Vano owo khukhala. [“Khiyaakhanle ephiro.”] Khiyaakhanle ephiro nto ya—ya e...okhuma ommalela nrupu nuulupale, wira yolya evireke. Vano Munna Kidd muthiyana khulikaritho. Hiyo khuvahererya mavekelo tho, nto vano ookhalana ephiro yoolikana. Nto ola ori va, ntoko namoona; meetiku ene, nave. Munnona? Owo onamoonaa wira Pwiya Yesu, ti Mpattuxa muulupale! Munnoonaa etthu Satana eerery’awe wira? Omaliha ekumi ya mwaan’owo. Vano nto, moone, nto kookupali wira muthiyana ene ohoorwa w’Apwiya. [“Owo otthikela w’Apwiya, owannyaka pahi.”] Khutthikela w’Apwiya. Munna Kidd muthiyana khumweettiherya otthikela wa Kristu, numala wiiraneya mwiiriya ola muulupale wa mwan’awe.

¹⁶ Kaahimwaakhela oraami okhuma oCalifornia, nsana, munna mmosa mwaamukhaani murumeyi weiwo, kaakhanly’aka ni yoowo okathi woopacerya orowa oCalifornia, miyaakha sivinre. Mwaamusulu awe mulopwana aayariwe ni—ni xexe. . .ivaavula tthaaru soowaleya vamurimani vawe. Vano miyo khimuleela mwah’owo. Miyo khwira, “Muluku owenrye opattuxa ela ekina khukhaliha saana, vekeekhai onniwerya ompenuxa mwaamusulu anyu.” Mmuleele paahi mmiravo wira okhale oohakalala murima.

¹⁷ Nto mmiravo ene aari vamuthukumanoni emaara yoopacerya kaary’aka oCalifornia, miyaakha soophiyaka muloko ni mithanu na mirarau sivinre vano, miyaakha muloko ni mithanu na mosa, soophiya. Nto miyo kaari oCalifornia. Vano owo aa- . . .Muthukumano khunvara murima sana mmirav’owo mpakha. . .Vamwaakhenly’aya mwaana, ni owo aayariwe, nto khoona wira yaahikhala etthu yaavonyeiye, aari ooripelela, vano khweererya omwiiseela n’ipheyo yoowo, ni siiso. Ni khaakhala ntoko wira aamurowa okhala mukumi, vano matothoro

nto khimuwehaweha, khuphwanya wira ivaavula tthaaru sahiwaleya vamurimani vawe. Khasaatthukunwe hata vakhani, moone, paahi—yaari evaavula emosa paahi yaavekhulela. Vano khuwiihana apap'awe, khwira, "Paapa, mmwiihane Munna Branham, naanaanoru. Mmuleele wira sothene... 'Anvekele Kristu paahi. Owo onimwiira.'" Ti yeeyo. Oh, wulu! Evareliwo murim'eyo, etthu awo anoon'aya, moone, hiyo nilavunly'ahu, nsana ohiyu. Etthu yootthuneya okathi wootthuneya.

¹⁸ Ahe, natthikela nihimyaka, kxanimpacerya mwaha ene, kahi siiso? Eri ntoko malaaso paahi voosiisu wooriirya, anikhala ootikana sinweryaney'aya okhala, moosuwela, nto othene oopharaana. Hiyo ninnitthapa vanci-ene opatthana siiso. Ayo, mulopwana.

¹⁹ Nto vano nrowe nimaale, vano, nipacerye mwaha ene vano. Nirowaka khino. . . Nkisuwenle sinto nyuwo munniwerya woona yeeyo wala nnari, vakwaaturu. Khino karukunxa *siisaale*, okathi vakhani, vano, ninoowerya, vano, akina wa nyuwo, o. . . [Munna Edgar "Doc" Branham oniira, "Muntthuna opuro vaavo?"—Mol.] Munihimyani? ["Muntthuna opuro vaavo?"] Nnari, kinoona wira nnari, naanaano va, Doc. Khino m'okathi vakhani. ["Vathi vale, pooti othukula opuro vaavo."] Ahe, nni—nnimwiira siiso kaphwanyaru vakhani. . . Wookhala opuro va? Vaareera. Nrowe nirukunxele vaavo paahi. Munniwerya woona okhuma ottuli iwo? Munniwerya? Mwaaweryaka woona, nvenxe ntata nanyu, mwaaweryaka woona ekwaaturu ile, osoma weiwo. Nnari. Vaareera. Mutthukule opuro. Vano, okathi awo aniitthokihery'aya yeeyo. . .

²⁰ Kinipacerya kixeleliwe-ene voosiis'ula; ahiso, nnari, nnari, ntoko minuutu muloko ni mithanu vahinatthi. Nto vano, nto, ninookuxa okathi ahu paahi vano, okhala wira kxanintthuna waakuvasa. Mweettaka voowaakuva, vano munoohonona itthu mwaarow'anyu ohimya. Vano, miyo kaawiriyana efiita, nihiku nlo, ntoko soohimenryaakani, vano miyo kaahuuliwa muru sana mmansaka; kahi etthu kaahimy'aka, masi enamuna kaahimy'aka voowaakuvexa, nto eyo enamuna y'olavula voonanariwa paahi. Kintthuna owehererya. Eyo. . .

²¹ Miyo—miyo kiroomaluru woona nihiku nlo vatthu vaarowa otekiwa esoolooxiku yuulupale, nno eriyari ya oLouisville. Nto Mwenye Brown, kookupali wira aari yoowo, weiwe, khuvaha itoolare emilyawu emosa mwaha wa esoolooxiku yeeyo. Ahe, vaakhanle wira kaahikhalana, khino kaamuvaha yoowo wira etaphuliwe axinama ale. Miyo—miyo nkinkupali owalela etthu p'itthu siisaale. Miyo paahi. . . Kinoorowa osoolooxiku n'woona axinama ale oowooniha othunku, ikhaya, n'akharamu, n'itthu siiso, seettaka nno ni nno, ootthukweliwa mw'ekumi, moone. Ennimukhaliha mutthu osikula. Tthiri, iyo sinvariwa n'usuwela wa mutthu okhanle oosuwelexa ovikana iyo. Munnona? Nto awo anoovara n'utthukela.

22 Ni kinnuupuwela wira: xetwani onniira yeeyo. Owo onaakuxa athu oophwanela yaathuneya wira yeetteke mapuro maalupale a Muluku, ni mavalu, ni—n’itthu ntoko seiyo, vano ni waahela mukalapooso wa muromolelo, wala eyaaminelo, wala etthu siiso, n’umutthukwa memmo. Ni moota ekhanly’aya etthu yoonanarexa.

23 Nto miyo khasinkisivela isoolooxiku. Masi kiniisoona ntoko mmosa w’axinama ale, mutthu otthukweliwe-ene otthunaka otaphuwa, moosuwela, wira—wira okhume avare etthu.

24 Vano, nihinatthi waattamela Masu, nrowe nimwaattamele Mwaneene Masu, nuuramihaka miru sahu vano wira nivekele.

25 Tith’ihu oomoriwa ikharari a Wirimu, hiyo noothukumana-tho voosis’ula mwa Nsina na Pwiya Yesu, Mwan’Inyu oophwanelexa. Muluku, oowiipaka mutthu, khurwa mulaponi, wira okhale mukuttho w’olivela itampi sahu, khukhwa, Naxariya; wira hiyo, mwaha w’exariya Awe, niryeene oohikhala a xariya nikhale ooloka mwa Yoowo. Hiyo nnoorwa nihimyaka wira khanimphwanela, Pwiya. Khiyaavo hat’etthu yooloka wa hiyo. Ni hiyo othene nri mukalapooso yuulupale. Hata wira nineemela mpantte xeeni, nlelo othene nri mukalapooso. Mmosa khaarowa owerya omukhaliherya mukhw’awe. Masi, Muluku, mwa omoriwa Wawe ikharari ohinimala, khikhuruwa kihhula mikhora sa mukalapooso, wira onitaphule. Hiyo kханиhiyo-tho ootthukeliwa vano. Hiyo kханиkhanle musoolooxiku wa molumwenkuni, masi vano hiyo nootaphuwa. Hiyo nri vate.

26 Oh, moota hiyo onimphent’ahu Yoowo ni omukokhorela Yoowo! Moota onwery’ahu weetta mmavaloni mwa anatiri Awe, ni owoona yooniheriwaka ohoolo wahu! Vano ni maitho ahu yoochi, omoona Muluku muulupale Ohinimala wiisooniherya Mmansawe ohoolo wahu, ni wiikhaliha Mmansawe eekeekhai, ntoko Owo saawiireny’awe maprofeta a khalayi. Nisuwelaka ela, wira awo anitthyuwa ni nrromelo, wira nihiku nimosa hiyo nnookhalihwiwa-tho asya, ekumi ila yamalaru, woohihimuwani, mwa Ekumi Ehinimala ehinrowa okhalakhala emalaka. Irutthu sahu khasinrowa wuuluvala. Ni hiyo kханиnrowa okhalakhala nikhwaaka. Ni kханиnrowa okhalakhala nivoliwaka etala. Ni kханиnrowa okhalakhala enihaleelaka etthu. Masi ninrowa weetta ni Yoowo. Hiyo ninthuna omwiiwa Owo iiraka, “Mutteeliwe murima n’Apwiya, mutthokiheriw’anyu okhuma wopattuxiwani w’olumwenku.” Khalayi etampi ehinatthi okela, moota Awo yaarin’aya etthokiheryo, ntoko wa Atamu ni Hawa, wira awo khiyaarowa okhalakhala ewerewaka wala okhalana mikattyamiho. Nto vano Awo aanitthokiherya yeeyo hiyo, ni Awo yaahisuwela khalayi-ene wira naamoorwa. Etampi khupaka ekhottiheryo yuulupale, nto vano etampi yoottipihwiwa, ni Ephome ya Yesu. Vano, hiyo ninrowa Muttetthe wa natiri, ni natiri a Muluku, yoowo okhanle Oohimala.

²⁷ Munireerihe vano, Tithi, okathi onsom'ahu Masu Anyu. Ninthuna nisuwele muthinto xeeni w'atthu onthuneya wira nikhale, wira nikhale Weiwo. Munikhaliherye olelo mwa exikola ela, wira niwerye okhala ni Mwixuttihi muulupale, Eroho Yowarya, enrowa okhuruwa ni wiisoniherya Mmansaya wa hiyo, ni Masu Aya. Vano hiyo ninvekela mwa Nsina Nawe wa ovuwa Wawe. Amen.

²⁸ Vano, toko, kaatthuna wira nyuwo ni miyo nimukhunle Petru Aneili, ekapiitulu 1. Kintthuna kisome nipuro nimosana Yoolempw'ela, Petru Aneili, ekapiitulu 1. Nto vano nyuwo murina ilaapi sanyu n'ipaphelo . . .

²⁹ Ni kookupali wira kooleeliwa voosis'ula wira—wira imaara sikina, kirukunxelaka muru aka okhuma vale, ennivukula oruma wa efiita. Vekeekhai nkinlakela wira siiso. Ni kookupali wira, imaara sikina, nuupuwela othuma mi—miikoro s'ehupara, khuthomeya vapathoni va. Hata wira mwaakhala vai nto, mwaamukhala sana. Yaamukhala yooreera, yaamuphiyerya mapuro othene paahi, miikoro paahi vapathoni.

³⁰ Nto vano, okathi onlavul'aka; ni vakhala wira nyuwo, numala muteko, wala mwaatthunaka, mulepeke-tho ekweretho ela va. Nto miyo kookhalana eyo yoolempwa ni maakina va. Kinookuxa musomari ula va kihale ohoolo nno, mwatthuna vale wira emaara ekina. Murwe vohixeleliwa oxekuw'ola, wira niwerye wiiwa sana.

³¹ Vano hiyo nnaattamela *Ikanyeryo Thanu na Piili*. Hiyo nnoomaliharu *Okathi Mithanu na Miili wa Ekereja*. Nto ola Mutthaka wo wiixuttiha, onimukhalihala muhina mutthu, onrowa ovuluxiwa ni Ephome ya Pwiya Yesu, ni onrowa okhala muhina w'okathi ule wa Ekerej'ele, Okathi ule wa Ekereja ya Mahiku othene wookiseryani wa Ikanyeryo. Vano hiyo noosuwela wira nrina Malope Mathanu na Maili, Ihasara Thanu na Piili, Mihasa, ni sikina, onikelel'ahu, okathi nniir'ahu nirowaka. Masi ninwehererya okhalana opuro tho wira atthu eweryeke okilaathi.

³² Vano, nto koono wira ela yaamukeliha muhina vatthu vene kaaroromel'aka. Nkaawehererya okweretha ekweretho ela, masi nihiku nlo kaari n'axipatthani aka amosa-amosa oophenteya, Coxes, ohitto oKentucky. Miyo khuruwa, kaanuupuwela khino okhalana nihiku nimosana n'oxaya mireyi okathi aya ohinatthi ovira. Nto miyo kaari mutakhwani ni mpatthani aka, Charlie, eemenle-ene vale, ni Rodney, munn'awe. Nkaamoonale hata mureyi mmosa. Kinoona wira kaahaatutuxa othene aya, okathi waakhuwel'aka mutakhwani mme. Ela t'itthu yaakirwenle, amiravo, ni—ni Munna muthiyana Nellie ni Margie, nto okathi woohimenry'akani wira kaamooleelani Ttiminku kaphiyeryaru yeeyo. Eyo t'itthu yaakirwenle, mutthaka kaarow'aka olavula. Ni moota ole waahanle waalikanne aya ni yeeyo! Nto, oh,

miyo okisivela eyo. Kaahoona e—eroo—erooho y'ekeekhai yo okhuwela, osulu iwe mutakhwani.

33 Siiso vano, nrowe nisome vano, Petru Oopacerya, kiireke . . . Petru Aneili, ahiso, ekapiitulu 1, nipuro nimoso na Yoowo.

Simoni Petru, murumeyi ni murummwa a Yesu Kristu, w'ale naakhenly'ahu vamosa waamini wooreerexa mwaha w'exariya ya Muluku ahu ni Moopoli Yesu Kristu:

34 Okisivela enamuna enihimmw'aya vale, okhala wira mwaha aka wothene voosiis'ula onlipihereya mwa waamini. Munnona? Mukihiye kisome-tho yeeyo. Nwiriyanane oratta-ene.

Simoni Petru, murumeyi ni murummwa a Yesu Kristu, w'ale nnaakhela—naakhenly'ahu vamosa waamini wooreerexa . . . mwaha w'exariya ya Muluku . . . Moopoli ahu ni Yesu Kristu:

35 Nkawahani, owo onihimya, wira, “Kihakhela waamini nno, ni kinaaroihela yoola ale yaakhenle waamini wooreerexa siiso.” Kintthuna wira . . . Owo kahi w'atthu a olumwenku w'ota. Ola ti wa Ekereja, moone, ale ari mwa Kristu.

Nvahiwe voowaattexa mahala ni murettele mwaha w'omusuwela wanyu Muluku, ni (mwaha) wa Yesu Kristu Pwi'y'ahu,

Mwaha woowi owerya w'eMuluku awe oonivaha sothene . . . owerya w'eMuluku awe vano oonivaha sothene siluluwanne ni ekumi . . . nttittimiho, mwaha w'omusuwela ole oniitthanenle nttittimiho ni owerya:

Mwa seiyo hiyo noovahiwa . . . noovahiwa anatiri aalupalexa ooreerexa: wira mwa yaala (anatiri ala) wira niireke mpantte wa mukhalelo w'oMuluku, . . .

36 Vano muhiye eyo ekele muhina sana vano. Kihilaleyaka voosiis'ula; nniixuttiha nisomi nla paahi. “Mukhalelo w'oMuluku.” Mukihiye kisome-tho eversiikulu 4 eyo vano, wira muhialelee yeeyo. “Mwa seiyo hiyo noovahiwa . . .”

Mwa seiyo noovahiwa anatiri aalupalexa ni ooreerexa: wira mwa yaala (anatiri ala) niireke mpantte wa mukhalelo w'oMuluku, nittharuwaka soonanara mwaha w'osiveliwa n'itthu siri molumwenkuni.

37 Moone, “olumwenku,” hiyo nootthyawa owo vano. Owo oniroihela ela Ekereja. Tivo hiyo nryaahu va voosiis'ula, ti wira nisuwele t'ivi ekhanle enamuna, exeeni Muluku enivekel'awe. Khaavo hata mutthu mu, onimphenta Muluku, ohinthuna o—ohinthuna okhalaxa ntoko Kristu. Vano eyo enooniheriwa va. Khula muKristu! Miyo ki mutokweene. Nkaawehaseni Munna mulopwana ni muthiyana Kidd va, khino awo t'amalelanse wuuluvala mpaani mu. Masi vaakhanle wira kaamwaakohasa, “Exeeni entthuna murim'anyu?” Yaarowa

okhala, “Omwaattamelaxa Muluku.” Mwaaxuttaka sa Kristu, yookhala etthu mwaha wa Yoowo eri woophenteyexa, nyuwo muntthun’anyu okela naanaanoru mwa Yoowo.

³⁸ Mukilevelele nuulumo nla. Kaahaaleela amwaar’aka, va woohikhala khalayi, awo...oowaili aya yuuluvalasaka, nto miyo khwaaleela wira, miyo khwira, “Munnikiphenta ntoko saakiphentak’anyu?”

Awo khwira, “Vekeekhai kinnoophentani.”

³⁹ Nto miyo khwira, “Moosuwela, miyo kinnoophentani vanci-ene mpakha kaanitthuna kookuxeni ni wookelihani mpuwa mwa miyo, wira nikhale paahi, vekeekhai, nikhale mmosa, vanci-enexa.”

⁴⁰ Vano, eyo, muncererye yeeyo imaara imilyawu emiya, vano nto munoosuwela moota mulipa-oowaamini, onsiveliwa ni Kristu, onttun’awe okela mwa Yoowo, okhala wira owo mphentoo. Nto va Owo onrowa onooniherya wira, mwa anatiri ala, moota sinwery’ahu wira mpantte wa mukhalelo w’oMuluku wa Kristu. Irutthu iya, sinkhwa, moota sinweryaney’aya hiyo wira mpantte.

⁴¹ Kaatthuna kihimye etthu va. Etthu enaaminel’aka... Vano ookhala mutthu aakiiwale voovonyeya sana, va woohikhala khalayi. Kihaakhela epaphelo ekhumme mwaalaano w’arumeyi, yaahimya wira miyo kaamini wira yaahikhala... “Hiyo naahikhalana munepa maphapo. Ni wira nihaana waahiya amwaar’ihu naahikhale munepa maphapo wa yaawo, wira nimuthele mukina nikhanly’ahu munepa maphapo ni yoowo.” Oh, wulu!

⁴² Miyo khwira, “Nkihiyo oottheka mwaha wo okawanyeya ntoko siiso.” Miyo okathi p’ukathi kinnivirikanya eyo. Miyo—miyo nkinaamini iyo. Vekeekhai nnari. Miyo kinaamini wira Muluku onninivaha mwaapara. Eyo ekeekhai. Vano nto hiyo ninkhala epantte ya mmosa ni mukhw’awe. Eyo ekeekhai. Ni mulopwana ohinatthi othela, aahaana otthokelela itthu iya, osoma.

⁴³ Mmiravo mmosa aahikikoha nihiku nlo, khwira, “Munoona wira kaamuwerya, kaahaana omuthela, mwali *khata khata*, Munna Branham?”

Miyo khwira, “Munimuupuwela sayi yoowo?”

Owo khwira, “Oh, wulu, miyo kinnimphenta tu.”

Miyo khwira, “Ahe, vakhala wira khamunrowa okhala muhikhanle ni yoowo, vanreerela mmuthele weso. Masi mwaaweryaka okhala muhikhanle ni yoowo, vanreerela muhimuthele. Vano, masi vakhala wira enoorowa owiivani, vanreerela—vanreerela mukelele ohoolo muthele,” miyo khuhimya. Nto siiso etthu kaatthun’aka omuhimeerya, t’ila, wira, vakhala wira munnimphenta sana!

44 Vano, naanaano va, muhinatthi othela, sothene ti sooreera paahi ni soolikana. Masi mmalakaruru othelana, nto miteko ni weereriwa wa makhalelo sinookela. Ti vaavo murin'anyu okhala oosivelanasa muniwanan'anyu mmosa ni mukhw'awe. Nyuwo mwakhala oothepiwa mwa muthiyan'owo, owo akhala oothepiwa mwa nyuwo, nlelo munniiwananasa mmosa ni mukhw'awe.

45 Ti siiso enikhala'aya ni Kristu. Munnona? Hiyo nihaana okhala oosivelaxiwa ni Yoowo, mpakha naveka vale etthu, nto Owo khuhinivaha, eyo khennittikinya hata vakhani. Munnona? Munnona? Mwaha wa xeeni? Nto enamuna emosa munwery'anyu wira yeeyo, wira mpantte wa mukhalelo w'oMuluku Awe, vano munoosuwela sana mwaha wa xeeni Owo ohinoovahery'aweni. "Wira mpantte wa mukhalelo w'oMuluku Awe."

46 Nto nkawehani va, "Nittharuwaka soonanara mwaha w'osiveliwa n'itthu siri molumwenkuni." Noottharuwa! Munnoona ti y'ani? Eyo ti ya Ekereja, ale ari mwa Kristu, ale ankhala oottotopeliwa vasulu va itthu iya. Kahi uwo mwaneene iittotpenle, masi Kristu t'omunnuwihale.

47 W'axinn'aka alopwana n'athiyana ooripa ari vaava voosis'ula, miyo nkinihimya ela wira koosikuliheni. Masi, kaari vamuthukumanoni okathi vakhani ovinre, nkisuwenle sinto kootoko ohimya mutapernakulu. Koohimya mapuro manci-ene. Aahikhala munna mmosa muthiyana ooriipa iirale, "Kinoowerya okhalana onamoona, wala ohimya onamoona?"

"Vekeekhai, munna, mukeleleke ohoolo."

48 Owo khwira, "Kinthuna kikhalihe onamoona ola wa ovuwa wa Muluku." Owo khwira, "Moosuwela, miyo—miyo nkiihiyo ele yaatthuneya wira kikhale," nto khwira, "Nki—nkiihiyo ele kinthun'aka wira kikhale, masi," owo khwira, "yookhala etthu y'ekeekhai, nkiihiyo ele kaari-aka." Munnona? Owo aarwiiye akhumaka vatthu. Owo aahinnuwa.

49 Ti siiso ninsuwel'ahu wira noovira mookhwaani khuphwanya Ekumi. Ninniweha ottuli munlittini okumihwaahu-mo. Munnona? Khaniihiyo ele entthun'ahu okhala; hata khanihiyo ele yaatthuneya wira nikhale; masi etthu emosa enxukhurel'ahu, khanihiyo ele naari-ahu. Eyo ekeekhai. Hiyo nri mphironi nirowaka.

50 "Nto nittharuwaka soonanara sa molumwenkuni." Nittharunwe-ene yeeyo, soowunlela ni soonanara sa molumwenkuni, nyuwo muri vasulu va seiyo. Vano eyo ti—vano eyo t'inamuna ya mutthu Owo onimuhimeery'awe, mutthu ottharunwe itthu iya, moone, soonanara sa molumwenkuni.

Nave tho nyuwo, muttharihelaka miruku sanyu sothene, muncererye mwa waamini w'anyu oreera murima; mwa oreera murima nwuncereryeke ankhili;

*Nto mwa ankhili mphaveleke wiisumaaliha;...
wiisumaaliha muncereryeke ovilela;...mwa ovilela
othunku;*

*Nto mwa othunku waaphenta axinna; ni mwa
waaphenta axinna niphento.*

⁵¹ Vano Owo oonivaha va mukweretho wa etthu yo wira, osuwela moota wo wira. Vano, ntoko sihimmy'aka, hiyo othene nnimwiilipiha wira nimwaattamele Muluku. Tivo miyo kithanlaly'aka Mutthak'ola voosiis'ula, wa ekereja, kisuwelaka wira atthu aneetta mikwaha. Okhala wira nsana ohiyu, miyo kaahihimya, "Akavi ari va, ahikhanle a mmuttettheni?" Atthu oophiyaka ipursentu miloko mithanu na mixexe ni thanu na tthaaru, anikhuma ota wa muttethe. "Akavi ari va anikhuma ikilomo emiya ni miloko mithanu na mosa?" Vano, wona waka, soovikana, ipursentu miloko mithanu na miraru. "Akavi ari va anikhuma ikilomo soovikana imiya thanu na tthaaru ni xexe?" Nto oophiyaka e—epantte ya neeraru y'atthu yaari vaava anikhuma emiya, ikilomo imiya thanu na tthaaru ni xexe ottaiwene. Muupuwele yeeyo, y'atthu aneetta mikwaha. Ahe, atthu awo khanrwa okereja siiso wira yooniwe paahi. Khekhanle...ntoko atthu a molumwenkuni yaarow'aya wona oreera wa nipuro nla. Awo othene atthu oohisuwanyeya, oohaawa, oowara voohisuwanyeya. Khasikhanle isipo suulupale sa ekoraale entthuna okhala ntoko ya Malaikha, oorkawu sa mipompe, ni icanela sa viituru sa malepa. Enikhala yoorika okhalana opuro vakhukuluni vano vaneemeliwa ephiteeriwe-ene exiri. Awo khanrwa mwaha wa itthu ntoko eyo. Masi awo anoorwa mwaha wo wira muhina mwaya yookhala etthu enoona oreera niitho n'ephattu nihinoon'aya. Nlo niitho na erooho ninvara oreera wa Kristu. Tivo awo anrw'aya.

⁵² Vano, mahiku nihinatthi okhalana muteko, miyo kinnivekela voohihyererya. Kinoorowa mutakhwani, kinnikuxa mpeesani mwaka...Kinnaahimeerya amwaar'aka, "Kinrowa oxaya mireyi voosiis'ula." Ni kinnihela elaapi ni eliiivuru yaamukhaani mpeesani mwaka. Vammal'aya okhala okokola vamphiyerya wona, kinikilaathi nipuro nlo kiphitenrye-ene mwiri, ni matata osulu, kiiraka, "Pwiya, kiireke exeeni olelo? Munrowa okivaha exeeni y'an'Inyu?"

⁵³ Vano kaphiyerya etthu enikhala ntoko yookiviha muhina, enoorwa etthu ntoko ela. Mukhalelo Awe wakhala vakhiviru, kinipacerya wiiwa etthu ntoko otthu ottaiwene, etthu ntoko sa. "Piili ni piili sinikhala xexe." Vakhiviru, "Piili ni piili sinikhala xexe. Piili ni piili sinikhala xexe. Piili ni piili sinikhala xexe." Erowaka, erowaka, erowaka, siiso. Owo ti Mukhalelo Awe onoorwa.

⁵⁴ Mwiivahererye, nto numala okathi vakhani munimwiikawanya mmansinyu. Vo enoorwa yoowoona,

“Murowe nipuro *khata-khata*, n’itthu *khata-khata*.” Munnona? Enoopacerya, omuthokelela Muluku mmuruni mw’anyu, muhiyaka olumwenku, orakamela olumwenku, murowaka mothakoni, okhala meekh’inyu.

⁵⁵ Vano Eyo enoopacerya orwa, “Emosa, emosa...” Miyo kinihimya, khula nummaru, wala etthu p’itthu, vekeekhai etthu enoopacerya vakhani-vakhani, erwaaka vooveya. Nto khunarwa voowaakuva, voowaakuva. Mutthu onookilaathi vale khuvenxa matata, ohihimyaka hata nuulumo, okhaliha matata osulu paahi. Naanaanoru, mukhalelo anyu wothene oniroihiwa osulu. Nto munimoono itthu Owo onthun’awe wira musuwele, owoonihani itthu sinihala orwa.

⁵⁶ Imaara sikina vanniphiyerya nipuro, mpakha nipuro nimos, vano khumaala. Khenikela mwa yoowona. Vano Soolempwa sinoopacerya orwa emosa ettharanaka n’ekina. Kinikuxa elaapi aka, wira kihiliyale, n’ulepa, n’ulepa.

⁵⁷ Vano kinoorwa owaani n’uwehaweha, n’usoma. Nto imaara sikina hata kherina maana wa miyo okathi onwehawe’aka. Vano nto, nuuvira okathi vakhani, ela eri va! Eyo enoomana, vano nto enoopacerya-tho. Nto kinikuxa eliivuru yaamukhaani ntoko *ela*, kinapacerya okweretha, voowaakuvaxa ntoko sinwery’aka, etthu Awo anikileel’aya. Kinimuupuwela, “Pwiya, kinoorowa otapernakulu kaahimeerye etthu. Miyo... ‘Nrowe.’ Kookhalana etthu yo waahimeerya.” Ahe, ti siiso enr’aya. Siiso paahi. Mpakha, toko, Awo okivaha miyo, nkikhanle oohimya.

⁵⁸ Vano, nto, mwa sookweretha iya sikhaani munikoon’anyu kiwehaka. Nto ela, toko, miyo kipacenrye, nkaakhenle epantte ela va mpakha nihiku nimos wala maili avinre, mutakhwani.

⁵⁹ Vano, atthu ala ari—ari... Petru onoohimya, va, moota entthuney’aya hiyo wira mpantte wa mukhalelo w’oMuluku Awe. Vano, khula mmosa a hiyo onthuna wunnuwa mpakha mukhalelo wa Muluku.

⁶⁰ Vano, namaliha vale Ikanyeryo Thanu na Piili, nto, okathi ene yoowo w’olavula wa Ekanyeryo ya Neethanu na Piili, ahiso otaphuliwa... Vekeekhai, hiyo ninnisuwela ele ekhanle ekanyeryo, eri wira etaphule muteko, wira sitaphule Ikanyeryo Thanu na Piili. Ni hiyo ninnoona eyo vamaaphani. Entaphula Mutthaka, etthu ethhitiwe ekanyero.

⁶¹ Ettiminku evinre ohiyu, miyo koolaleerya, “Ehulelo.” Vano ehulelo waaminii. Waamini t’urina ehulelo, nto ehulelo ti Soolempwa. Nto Kristu t’ori Mukhora. Munnona? Vano waamini onikuxa ikhunelo saamukhaani sa Soolempwa ni waatthukulela ovuwa n’ireerelo sa Muluku, atthu Awe. Munnona? Vano, eyo ti, waamini t’urina ehulelo enaatthukulela Kristu atthu; enoatthukula, wuupulula.

⁶² Tivo, olelo, ninrowa ophavela okuxa ehulelo ene yeeyo, wira nitthukule ephiro yo okhala aKristu ooreera murima

mwa mukhalelo wa Muluku, yeeyo, n'ukhala Empa ekumi wira Muluku mukumi okhaleke-mo.

⁶³ Muupuwele, Muluku oniisuupulula Mmansawe mwa inamuna tthaaru. Emaara yoopacerya, Owo iisuupulunle Mwaneene mwa Nrifou na Mooro, yihaniwa Otiithi. Vano Muluku mmosa yoowo, khwiisooniherya mwa Yesu Kristu, yoowo Owo aapank'awe erutthu, aapanke erutthu yeela. Vaneeraru, mwa okhwa w'erutthu yeeyo, Owo khureerihha Ekereja Owo onwery'awe okhala-mo. Aari Muluku vasulu vahu; Muluku ni hiyo; Muluku mwa hiyo; Muluku mmosaru yoowo.

⁶⁴ Tivo ihaniw'awe Tithi, Mwaana, Eroho Yowarya. Kahi aMuluku araru; miteko miraru sa Muluku mmosa. Vaakhanle wira awo yaahuupuwela yeeyo oMuthukumanoni w'oNicea, khinaarowa okhala othene ootapanyiwa, naamukhala? Eyo ekeekhaii. Kahi amuluku araru. Atthu khiyaawerya osuwela moota Yesu aalavul'awe n'Atithi, ni Owo n'Atithi ari Mmosaru. Ahe, vaavo t'eri etthu yothene. Vekeekhai, eyo enoohimya. Vekeekhai. Munnona? Kahi aMuluku araru. Miteko miraru! Wiisoniherya mi- . . .

⁶⁵ Exeeni iyo? Muluku eemereryaka mwaha w'atthu Awe. Muluku onthhuna okokhoreliwa. Nuulumo *Muluku* nnihimya "etthu enikokhoreliwa." Nto ti Muluku onthhuna waathhokiha atthu Awe, wira Owo awerye waakhela wa yaawo etthu Owo aapattuxeny'awe. Owo khonoopattuxekeni wira mukhale etthu ekina woohikhala mwaana a Muluku mulopwana ni muthiyana. Vakhala wira moovonya yeeyo, okhala mwaana a Muluku mulopwana ni muthiyana, moovonya etthunelo ene.

⁶⁶ Nto "ovonya," nuulumo *e-t-a-m-p-i* nnihimya "ovonya etthunelo," ovonya etthunelo. Nto, koopelaka kiluluwanyaka exeko, kirihaka musomari mwa meeturu miloko mithanu, ni woopela; kinimukuxa kapwitthi aka n'umoopa, nto kavonya, epante ya namuloko wala ya namuloko ni piili ya meeturu, exeeni yiiraneieye? Kapwitthi aka onnitthuna olikanyihani. Yookhala etthu evonyeieye. Nto kavonya omwaamini Muluku, kavonya okhala muKristu. . . Muluku oohenleni mu wira mukhale muKristu. Nyuwo mwahapuwele epante ekina, mutthike mulikanyihane. Ni eri etthu emosa paahi enwerya woolikanyihani, ti Soolempwa. Eroho Yowarya mwa Soolempwa, enimoolikanyihani, wooruuhani woolukamihani v'exekoni tho. Ti yeeyo.

⁶⁷ Vano, ninrowa osoma Masu Awe. Sitefano iirale, mwa Miteko 7, nave-tho mwa. . . Nrowe nisome yeeyo. (Olavulaka mwaha wa vano, ninlavula mwaha w'Empa ya Muluku.) Vano, Sitefano iirale. . . (Ekhalaka wira, enrowa okhala Empa ekumi ya Muluku mukumi.) Sitefano iirale, mwa Miteko kapiitulu 7, ni kookupali wira hiyo. . . mwa Miteko 7, opacerya eversikulu 44:

Axitith'ihu yaahikhalana moothakoni muxaaxa w'onamoona, ntoko owo saamurummyawe, amulavulihaka Moise, wira apake alikanyihaka n'ile oonalyawe.

Yoowo tho axitith'ihu vaakhenly'aya, axitith'ihu yaakenly'aya nuumala okeliha... Yesu okeliha mulaponi yaawaakhalyaya Amalapo, yaawo Muluku aawoomonly'awe vamaithoni v'axitith'ihu, mpakha mahiku a Davidi;

Owo aahiphwanya mahala ohoolo wa Muluku, nto aahinvekela wira amutekele empa Muluku a Yakope.

Masi Salomoni t'amutekenle emp'eyo.

Siiso ole a Wirimu khonikhala ipa sootekiwa ni matata; ntoko sihimaly'awe profeta wira,

Erimu ehice aka, ni elapo ya vathi ntthatto na inawu saka: nto empa xeeni nyuwo enwery'anyu okitekela? anihimya t'Apwiya: wala nipuro xeeni ninrowaaka omumula?

68 Vano mwa...Vano, "empa," vekeekhai, ti, nipuro hiyo onrow'ahu wira nimumule, vano, ovira etthekeu, ni sikina, ntoko omumula wa ikhove, wala etthu siiso. Vano, aHeperi 10, eversiikulu 5, Paulo onimooniherya.

Vano owo varwiy'awe molumwenkuni, oohimya wira, Mukuttho... (Owo ti Kristu)... Nyuwo khamutthunne Mukuttho ni soovaha, masi mookuupela erutthu:

69 Empa exeeni vano? Erutthu, Muluku akhalaka mw'Erutthuni.

70 Muluku emaara emosa, osulu wu, okathi Owo aakhuruwel'awe vamwaako, hata wira mwa—mwaanyompe wala enyompe yoothiyana yaamukwannya mwaako, yaahaana wiiviwa. Muluku t'owaarya.

71 Nsana ohiyu, okathi Malaikha ale yaakhuneel'aya wiitho Waya. Maserafi oowaarya arina wiitho woowaarya, hata ahinsuwela etthu enihimya etampi, nave Awo ahaana okhuneela wiitho Waya, Ohoolo wa Muluku; okhuneela inawu saya, mwa wiiyeviha.

72 Vano, Muluku oowaarya khaakhanle okupaliki etampi, tivo khiyaavo hat'etthu yaawerya okwannya mwaako Muluku waary'awe-vo.

73 Vano Muluku aahiipaka erutthu khukhala ni hiyo, mwa mukhalelo wa Yesu Kristu, Mwan'Awe, yoopattuxa Awe. Nto Mwaana owo khuvaha ekumi Awe, nto erukuruku y'Ephome ya Muluku khuthikiliwa, wira Ekumi yeeyo ekhume Mphomeni, erwaaka mwa hiyo.

74 Mwa Ephome yeeyo hiyo ninnirapihiwa. Nto vano ephome ahu, ekumi ahu, yeeyo ephiyenrye okhala mwaha w'otthuna w'ekhapa, yooruaha ekumi ahu molumwenkuni. Ephome ya Yesu Kristu ennirapiha, ennirukunxa mukhalelo ahu, mwaha w'ooniveleliherya Eroho Yowarya; vano hiyo ninkhala mukhalelo w'oMuluku wa Muluku, vano ninkhala nipuro n'okhala na Muluku. Yesu ohimnye wira, "Nihiku nenlo munoosuwela wira Miyo kinkhala mw'Atithi, ni Atithi mwa Miyo; Miyo mwa nyuwo, ni nyuwo mwa Miyo." Munnona?

75 Musuwele moota Muluku ory'awe Mukereja mw'Awe. Ekereja entthuneya vano wira ekhaleke nipuro na Kristu, epwaheryaka ohoolo muteko Awe. "Ole onikaamini, miteko Miyo sinvar'aka owo onoovara nave. Woohala okathi vakhani, atthu a vathi khanrowa okoona-tho; nto nyuwo munookoona, okhala wira Miyo kinookhala ni nyuwo, hata mwa nyuwo, mpakha omala olumwenku." Munnona? Eyo eri vo, opwaherya ohoolo muteko Awe.

76 Vano, Muluku, ahiso Bibilia oohimya va, yeeyo. Sitefano aahimuhimya Salomoni oteka empa, "Vano Ole a Wirimu-rimu khonikhala ipa soopakiwa ni matata. 'Okhala wira Erimu Ehice Aka, elapo ya vathi ti ntthatto na inawu Saka. Nto nipuro xeeni onwery'aka omumula?' 'Masi Nyuwo mookuupela Erutthu.'" Amen. Eyo vo.

77 "Nyuwo mookuupela Erutthu." Muluku onkhala mmukhaleloni mwa mutthu, iisooniheryaka Mmansawe mwa Mukhalelo yoowo. Okokhorela w'ekeekhai! Muluku mwa hiyo, nikhalka Empa Awe, Muluku iisooniheryaka. Oh, moota waarow'ahu okhala vaavo mpakha nyuwo waarow'anyu ottiyeya iphumu mu, mwaha w'oviha. Nkawehani, wira, khula okathi Muluku, okathi wothene, iisooniheryaka Mmansawe mwa mutthu.

78 Ole aari Muluku mwa Moise. Nkanweheni, aayariwe muhooleli; Kristu. Okathi waayariw'awe waahikhala olupatthiwa w'anamwane, etthuniwaka ophwanyiswa owo; siiso yaahiraneya ni Kristu. N'owo aaya—aayariwe okathi yoowo; siiso aayariwe Kristu. Owo aari namavaha ikano; siiso aari Kristu. Moise aahiwela, mahiku miloko mixexe, khwaakhela sooruma, khikhuruwa. Kristu aahirowa mothakoni, mahiku miloko mixexe, khutthika, iiraka, "Muhiiwa ele ehimmwe khalayi wira, 'Muhiraruwe.' Masi, Miyo kinoolelani wira, ole onimuweha muthiyana, amuwereihaka murima, ooraruwana muthiyan'owo." Munnona? Itthu iya sothene soohiyana-hiyana, aari, Muluku iisooniheryaka Mmansawe.

79 Nkanweheni Yosefe, aayariwe mmiravo a erooho eriyari ya—ya nloko n'axinna. Awo othene yaari atthu ooreera murima, axitithi othene ale. Masi, Yosefe varwiiy'awe, owo aahivirikana. Owo aaniwerya woona yoowoona, otaphulela yooloha, vano

owo aaninyokhiwa n'axiinn'awe mwaha wa yeeyo. Mwaha wa muteko Muluku aamukhaliheny'awe mulaponi wira avare, axinn'awe yaanimunyokha mwaha wa yeeyo. Munnona? Nto yothene yaathoonya vamwiikimanyo. Nto, nwehe, owo aatumihiwe ni musurukhu woophiyaka miloko miraru wa eparatha, n'axinn'awe. Khuriheliwa mulittini, wira iiviwe, n'axinn'awe. Khikumihwiwa mulittini mme, khurora khukilaathi moonoo woolopwana wa Farawo. Nto khaavo mutthu aawerya orwa wa Farawo, yoowo aaruma olumwenku mahiku ale, khaavo aawerya orwa wa Farawo, ahivinre wa Yosefe. Khaavo onwerya orwa wa Muluku, ahivinre wa Kristu. Nto okathi Yosefe aakhum'awe empa ya mwene, ohinatthi okhuma, naahikhala nlope naaruma, nto anamihupi yaanithimaka ohoolo wawe, n'ukhuwela, "Mukokhore! Yosefe onimoorwa!" Hata wira mwaari vayi, wala etthu mwiir'anyu, hata wira muteko anyu waari muulupale; mwaahaana okokhora mpakha Yosefe ophiya vo.

⁸⁰ Nto Nlope naruma-ru, nimosa wa mahiku awo, makutha othene anrowa okokhora ni khula nlumi nnoohimya. Okathi Kristu, Yosefe ahu, onrow'awe okhuma Movuwani khurwa, muteko anyu khunrowa okhala muulupale nto. Makutha othene anrowa okokhora, n'umuhimya Yoowo okhala Mwaana a Muluku. Eyo ekeekhaii.

⁸¹ Oh, moota onimon'ahu Yoowo mwa Davidi! Moota Davidi, mwene ookhoottiwa, aakumihw'awe veehicensi vawe, n'axinn'awe, mwan'awe ene, khukilaathi oMwaako Olivera, okathi waawel'awe, vasulu va Mwaako Olivera, khuweha ottuli oYerusalemu khunla; okhala wira weiwe atthu awe, owo aarumenly'awe ni khuwiixuttiha sa Muluku, nto atthu awe ene yaawo khimuhiya khimurihelela itthu, khimusenyelela khimunyemulasa, okathi waawel'awe mwaako ni khukhoottiwa. Oh, moota enlikan'aya ni Mwaana a Muluku, miyaakha imiya thanu na tthaaru ohoolo waya; Mwene ookhoottiwa, eriyari y'atthu Awe Ene, aahikilaathi vamwaako khimunlela Yerusalemu, ntoko Mwene ookhoottiwa.

⁸² Yaari exeeni? Muluku iisooniheryaka Mmansawe mwa maprofeta ale, omooniheryaka Kristu.

⁸³ Vano aahirwa Mmosa aari omalela wa Muluku. Aari Muluku eriyari ahu.

⁸⁴ Nto okhuma okathi yoowo, Owo onniisooniherya Mwaneene Mukereja Mwawe, epantte ela y'oKalvario. Tivo, moone, hiyo nimphavela ophiya nipuro nla n'okhala, Empa ya Muluku mukumi. Vano aakhala atthu kamosa-kamosa . . .

⁸⁵ Hiyo ninniweha va, owo ohimnye wira, "Yoopacerya ninkhalana waamini, ikuru, ankhili, wiisumaaliha, ovilela, oreera murima ni othunku, ni oreerelana murima w'axinna." Vaareera. Oreerelana w'axinna, nto vo wuncererya ophenta.

Mukhihiye kisome ela, yothene, emaara ekina, wira nwiriyane sana vano. Vano ninrowa opacerya eversiikulu 5.

Nave-tho nyuwo, muttharihelaka miruku sanyu sothene, muncererye waamini w'anyu oreera murima; mwa oreera murima nwuncereryeke ankhili;

Nto mwa ankhili mphaveleke wiisumaaliha; nto mwa wiisumaaliha muncereryeke ovilela; ni mwa ovilela othunku;

Nto mwa othunku waaphenta axinna; ni mwa waaphenta axinna niphento, okhanle ophenta.

. . . itthu iya sakhala mwa nyuwo, sooreera iya soowaatta, khasinokhalihani oonyoonyiwa wala oohivara muteko mwa omusuwela Pwi'yahu Yesu Kristu.

⁸⁶ Vano, Petru onnikwerethela etthu va hiyo, sa moota w'okela mmo.

⁸⁷ Vano kintthuna kihimye ela, wira, aakhala atthu kamosa-kamosa arina epantte ya ikuru iya, ankhili, osuwela, ovilela, ni sikina, nave ahinihimya okhala muKristu. Vano hiyo paahi . . . nniixuttiha exikola ya Ttiminku. Ni eyo ekeekhaii. Aakhala atthu arina epantte ya seiya, ahinthuna hata okhala muKristu. Masi eyo kheni . . . Eyo kheniphiyerya. Eri ntoko ntthokolo nineererya wiipweherya mapururu a mulalampi mmapuphani mw'aya, wira niikhalihe mulalampi. Nlo nnimwi honona nneene. Vanreerela okhala ntthokolo. Munnona? Mutthu eereryaka opaka itthu iya ohikhanle muKristu, owo vekeekhai ookhuma voopuroni.

⁸⁸ Eri ntoko murale oneererya wiima masa. Khiwaawerya wiima, moone, onamwi okhanle-ene mwiri. Masi khunwerya wiima masa.

⁸⁹ Ntoko puuru oneererya omela manri eepwittipwitthi, oneererya okhala epwittipwitthi oryeene manri, kiireke, ory'ene puuru. Moone, khonwerya omela manri. Khonwerya omela. Manri ti yoovaha wa epwittipwitthi, kahi puuru. Owo khino siiso eereryaka wira itthu ntoko epwittipwitthi, masi nlelo onikhala puuru. Munnona? Vano, owo onimwiira, "Ahe, kinniweyera olya ntoko epwittipwitthi. Kinniweyera wira *ela* ntoko epwittipwitthi." Nto hata nweryaka wira exeeni, muhaana okhala epwittipwitthi wira mukhalane manri.

⁹⁰ Nto mukhihiye kimaale vaava minuutu mmosa. Epwittipwitthi keniipakela manri. Eyo erina manri okhala wira epwittipwitthi. Atthu anci-ene aneererya ohimya wira, "Ahe, kinimwehererya okhala ooreera murima. Kinimwehererya wira *ela*." Muhiipake hat'etthu. Nnari, khamunwerya wira. Epwittipwitthi keniira, khenvekelwa,

khenwehereriwa opaka manri. Eyo enikhalana manri, ni eyo enikhalana okhala wira epwittipwitthi.

⁹¹ Nto nyuwo mwakhala muKristu, munikhalana muhokorokho wa Erooho paahi. Khamu—khamunipaka. Khamuneererya opuni. Muneererya. . . Muhiikhaliheke etthu nyuwo muhikhanly'anyu. Mukhaleke paahi ele entthuneya wira mukhale, vano nto enimoorwa mmansaya. Mootoko owiwa atthu yiiraka, "Ahe, kinimooleelani. Miyo ka. . . Kihitakanxa mukereja. Miyo—Miyo vekeekhai kaahaana ohiya wootha nno"? Muneererya opaka-tho etthu ekina, vano. Muhiireke, khivanthuneya weererya wira, siiso ntoko pu—ntoko pu—puuru oniikhanyerery'awe wiikhaliha manri. Khonwerya.

⁹² Wala, marepo ereeryaka olya ni epompa, marepo eereryaka—marepo eereryaka okhala epompa. Mwaaniwerya omuthokelela marepo iwo, iiraka, "Moosuwela, miyo k'epompa," ni wihela mapururu vakhaani mwa yoowo, wira, "Moone, kinikhala ntoko. . ." Munnona? Vekeekhai aamukhala othene ootikiniha. Owo ti mu—mutthu onihimya okhala etthu owo ohikhanly'awe. Moone, khamukhanle wiiraka siiso.

⁹³ Khamukhanle oohimya wira, "Vano nkawehani, entthuneya wira kireereke murima, vano kinooreera murima. Entthuneya wira kikhaleke n'uthunku, vano kinookhalana tu." Vano, nyuwo muneererya wiipharihela mapururu. Hata nweryaka ophwanya, masi khamukhanle oohela mapururu mwa mwaapalame oohikhala. Munnona? Khanivar'etthu. Ni eyo enooniherya paahi moota mwaapalam'owo okhanly'awe nawoothe. Munnona? Mwaamuwerya otthokelela marepo eereryaka okhalana mapururu maili a epompa, wira, "Nkawehani va, moone, miyo k'epompa"? Munnona? Vano, hiyo othene noosuwela wira owo marepo. Munnona? Munnona? Ti yeeyo tu. Ninoowerya ohimya wira owo marepo.

⁹⁴ Ahe, vano ti siiso eryaaya, weererya wi—wiipaka oKristu. Khamukhanle oowiiraka. Etthu yoopacerya murin'anyu wira, oyariwa vasya. Muhaana orukunxiwa. Munnona? Nto mwarukunxiwa vale, munikhala yoopattuxiwa esya. Vano munookhala sana, vano. Munnona? Vano khamurina y'oxanka mwaha wa mapururu, awo animoorwa mmansaya, okathi—okathi oniyariw'anyu vasya. Ayo, mulopwana.

⁹⁵ Ntoko sinihimy'aka kweekwe. Mukuxe e—ekuluwe, murapihe sana nwarihe ikuwo, ahiso efaato yooreera, kiireke, yeeyo, nto muhiye vale; eyo naanaanoru enrowa vamuttuphani va marove n'uwolowa. Okhala wira, moone, khenrowa ophwanyaha etthu. Eyo ekuluwee. Owo ti mukhalelo aya. Owolowasa ti mukhalelo aya. Muhaana orukunxa mukhalelo aya, nto (eyo) sikina sinimoorwa mmansaya.

⁹⁶ Vano, nwehe. Nyuwo muhaana oyariwa vasya, eyo ti, orukunxiwa. Ohaana okhala murukunxo.

⁹⁷ Nyuwo muniira, “Ahe, Munna Branham, miyo kinnimusuwela muthiyana’ola nno, vano, owo khonaireke etthu yoonanara. Owo muthiyana ooreera murima. Wala, mulopwana *khata-khata*, owo mutthu ooreera murima. Owo khonaireke etthu. Moosuwela wira owo khonimutthekela hata mutthu.” Eyo khenihimya hat’etthu. Owo pooti okhala namaitthoko ooreera murima, masi kohiyo muKristu mpakha ayariwe vasya.

⁹⁸ Yesu ohimye wira, “Woohikhala wira mutthu oniyariwa vasya,” Yohani Oowaarya 3, wira, “hata khonoona Omwene.” Vano, eyo enihimya wira, *woona*, enihimya “osuwela sana.”

⁹⁹ Nyuwo munooweha etthu, ni wira, “Miyo nkinoona eyo.” Enihimya wira khamunsuwela sana.

¹⁰⁰ Mutthu khonwerya osuwela sana mwaha wa xeeni atthu ankhuwel’aya. Mutthu khonwerya osuwela mwaha wa xeeni nntaava na mutthu naarow’aya orukunuwa khunalavula elavulelo. Mutthu eephattu khonwerya woona moota ovuwa wa Muluku waarow’aya orwa mmaithoni mwa mutthu, ni woona soowoona ni omuleela mutthu itthu kamosa-kamosa, ni etthu yo wira; waaleela itthu sinihalela okhumelela, ni itthu sinrowa okhumelela, ntoko Apwiya siniireny’aya va nsana ohiyu, nave. Munnona? Munnona? Mu—muupuwelo w’ephattu oneererya otaphulela. “Ahe, owo iirale exeeni? Wala, ethepyelo xeeni oniir’awe? Maxintta xeeni orin’awe?” Omoona mutthu alavulela ilavulelo, awo aniira...ni mutthu otaphulela n’umuleela vekeekhai mutthu mukina a Erutthu etthu awo yiirans’aya, ni etthu yahaathuneya awo wira. Munnona? Munnona? Awo anuupuwela wira eyo enamuna y’ethepyelo. “Yookhala etthu elakiheriwe eriyari aya.”

¹⁰¹ Awo khanwerya osuwela eyo mpakha mutth’uwo ayariwe vasya. Nto owo ayariwa vasya, vano owo ori muhina w’opatthana, okhala wira owo yoopattuxiwa esya. Mukhalel’ole wo waanyiherya, ni woohoverya aarin’awe, ohookhwa. Vano, owo yoopattuxiwa esya. Vano, moone, owo khokhanle wuncererya etthu ekina mwa yeela, vano, okhala wira enimwincererya voohikhanyererya.

¹⁰² Nkawehani, muhaana oyariwa vasya. Nto mwayariwa vasya, khamukhanle ooyariwa vasya muhikhalanne waamini. Eyo ekeekhaii. Vano, moone, ekwerethelo aka va, kookhalana mulipiheryo ene, waamini t’uri mulipiheryo wa yothene eyo. “Okhala wira muhaaminiki khivanweryaneya omusiveliha Muluku. Ole onrwa wa Muluku ohaana waamini wira Owo ookhala, ni Onnaatthuvula ale animphavela.” Munnona? Owo ohaana okhala. Nto nyuwo mwaari oomuhoverya Bibilia, mwaari oohoverya wira Masu aakhalana exariya, muhaana okhala ottuli mpakha mwaamini toko.

¹⁰³ Etampi exeenii? Ohaamini. Siri itthu piili paahi sinimweetiherya mutthu. Eyo ti ohaamini ahiiso waamini,

emosa wala ekina. Nyuwo munivariwa n'imoso enxintta makhalelo anyu. Eyo entthuneya paahi waamini xeeni orin'anyu, ottukhuwa xeeni onwery'anyu ovenya.

¹⁰⁴ Masi, yoopacerya, ohaana okhala waamini. Mukihiye kikhale vamulipiheryoni vaavo okathi vakhani. Vano, waamini t'itthu entthuneya nyuwo waamini. Waamini t'itthu... "Waamini ti ekeekhayi sa itthu sinlipelel'ahu." Eyo ti, nyuwo mookhalana mwaaminikiru, okhala wira enuupululiwa mwa waamini. "Waamini ti ekeekhayi sa itthu sinlipelel'ahu," aHeperi 11, moone, "ekeekhayi." Exeeni iyo? Enamuna xeeni ya ekeekhayi? Ekeekhayi yooreera.

¹⁰⁵ Tivo, mwaairaka, "Munna Branham, kinnaamini wira Muluku ti Mpenuxa." Ahe, vakhala wira munnaami yeeyo, nto vo mmukupali Yoowo okhala Mpenuxa anyu, ni muhoothaka, masi vekeekhai mwaaminiki wira ni makhwatta Awe moovonihiwa, khiyaavo hat'etthu enrowa woosusihani yeeyo. Eyo etthu emalihiwe. Vano pooti okhalana nrromelo, mutthyawelaka *ela* ni mutthyawelaka *ele* paahi. Masi okathi onaamin'anyu, munoosuwela, okhala wira ti ekeekhayi. Mookhalana. Miyo kaari...

¹⁰⁶ Akavi, mutthu ti mutthu, otonko omwiiwa Oral Roberts voosiis'ula, okathi waalaley'awe voosiis'ula, Oral Roberts? Miyo—miyo kiroomwiiwa ohimya etthu wala ekina wira waahikhala waamini, ole w'ovuluxa, ovekela mavekelo o waamini, w'ovuluxa. Owo khwira, "Mpithaanye mmukwannyaka raatiyu, mphitaanye mukwannyaka etthu, wira..." Mutthu uwo iira yeeyo, wira yaavahe atthu etthu yaawery'aya opweha-vo matat'aya. Etthu, nyuwo muniir'anyu, "Miyo kookhalana vano, okhala wira owo okileenle wira kimukwannye raatiyu aka. Kookhalana." Munnona? Vano, eyo ti yooreera. Masi, vano, waamini wooloka w'ekeekhai khorina yo okwannya hat'etthu ya yeeyo. Vano, nkimmulamula Munna Oral, hata vakhani. Owo onvara muteko muulupale, ni mutthu ooreera murima, ni miyo—miyo kinnimuupuwela vanci-ene Oral Roberts. Ti yooriipiha murima hiyo ohikhalana-tho yaawo.

¹⁰⁷ Masi etthu enereryaka ohimya, wira—wira, waamini khontthuna hat'etthu. Munnona? Waamini onaamini Masu a Muluku. Maana waamini onrwa mwaha wo "okwannya"? Nnari. "Waamini onrwa mwaha wo wiiwa, wiiwa Masu a Muluku." Eyo ennikweettya. Ori vaavo. Munnona? Nto waamini, ntoko sihimaly'aya, khorina erakamelo wa yeeyo. Waamini ti naanaano va. Waamini ori vaava. Vano ntoko wira ookhala mutthu...

¹⁰⁸ Mwanamwan'ole, nihiku nlo. Mayi ule Munna Kidd muthiyana n'akina yaamuhimy'aya, aarina mwaan'ole ni marupo ota, ahaatthukunwe ommalela nrupo nuulupale, wira yolya evireke. Vano, muhan'ola, omwiiwaka Munna Kidd muthiyana n'akina ohimya onamoona, khwaamini wira

aawenrye-ru okwannya, ni miyo omuvekelela mwaan'ole. Vano, moone, Muluku onninivaha atthu. . .

109 Akina wa hiyo aakhalana musuwelelo ni Muluku, ve-vekeekhaixa mpakha Muluku onkhal'awe ntoko orowa va, ntoko, n'ulavula ni Munna Neville wala mutthu omulimalenly'anyu. Nto imaara sikina ninnaavekela atthu yaawo wira enivekelele. Ti yeeyo entthuneya wira niireke. Nto hiyo nakhalana waamini wira mulopwan'owo wala muthiyana, mutthu ti mutthu onnivekelela, onlavula ni Muluku, nto waamini wahu onophuriwa. Onoovariwa. Yoomalihiwa.

110 Va. muRooma aahirowa okumana ni Yesu. Nto owo khwira, "Miyo—miyo nkimphwanela wira Nyuwo mukele mpa mwaka. Nkimphwanela. Miyo—miyo nkimphwanela. Ni miyo—miyo nki. . .Miyo—miyo nkiniitthokelela siiso. Masi," khwira, "mwan'aka khonreere owereiwa. Nyuwo muhimye Nsu paahi, moone, nto mwan'aka onookhala mukumi."

111 Yaari exeeni iyo? Erakamelo khiyaavirikaniha. Munnona? Okhala wira, Muluku onikhala mapuro othene. Muluku t'owerya sothene. Ni mapuro othene Muluku onkhal'awe, oweryaneya sothene ori vaavo. Nto Muluku, oryeene mapuro othene, eyo ennimukhaliha Muluku nipuro pi nipuro, mapuro othene. Munnona? Muluku ti muulupale w'Alemaanya, oSuwiisa, ni wAfrika, minuutu ene yoola, ntoko Owo siry'awe va. Oh! Eyo vo.

112 Nto vano owo khwira, "Miyo nkimphwanela wira murwe mpa mwaka. Mulavule Nsu paahi." Yaari exeeni iyo? Waari waamini wa muRooma owo. Owo aahaamini.

Nto Yesu khwira, "Rowakani. Mwan'inyu mukumii."

113 Vano owo khweetta mukwaha, wa mahiku maili. Nto mmeeloni mwaya, ohinatthi ophiya owaani, aahikumana n'arumeyi awe kamosa-kamosa erwaasaka. Nto awo khwira, "Mwan'inyu mukumii."

114 Vano muRooma khaareere otikinhihiwa, mpakha wira, "Ewoora xeeni ya nihiku owo opaceny'awe okhala mukumi? Epantte xeeni ya nihiku?"

Owo khwira, "Ewoora yoophiyaka yanamuloko n'emosa, owo aahipacerya openuwa."

115 Vano muRooma khusuwela wira waari okathi ene yoowo Yesu aahimmy'awe wira, "Mwan'inyu mukumii," vano owo khwaamini. Amen.

116 Oowerya sothene, onikhala mapuro othene, oosuwela sothene, oohimala, owo ti Muluku. Tivo, awo yaamwaattakaka oraame ni wira, "Nvekele!" Okwannya iwo! Nto waamini wanyu onnimuruuha Muluku. Eyo t'itthu enruuha ovekela ni Muluku, vamosa, vanlakani. Mavekelo! Waamini onoorukunuwa okhuma va mpakha va. Oniruuha vamosa.

117 “Mulavule Nsu. Yothene entthun’aka wira Nyuwo mwiire olavula Nsu, nto sothene siri sana.” Moone, khivaatthuneya Owo okhala vaavo. “Mulavule Nsu paahi.” Mwaha wa xeeni? Muluku ori mapuro othene. Owo t’owerya sothene. Owo t’owerya sothene vathi v’olumwenku siiso Owo siry’awe vasulu v’olumwenku, wala ipantte soopiili. Owo Mulukuu. “Nto etthu emosa paahi entthuneya Nyuwo wira olavula Nsu paahi,” owo aahimmy’awe.

118 Nto, vano, waamini onimwiira ele enihaleela. Waamini t’oniira enihaleela. Tivo nyuwo muhaana waamini ntoko mulipiheryo. oKristu wothene, sothene mury’anyu, sothene munthun’anyu okhalakhala mukhalaka, sinttharihela waamini Masu. Mwaha wa yeeyo miyo kinaamini aka Masu. Munnona?

119 Nkikhanle oohela waamini waka mwa hat’etthu ekina. Vaakhanle wira kaarowa ohelela vasulu v’ekereja, ekereja xeeni kaarow’aka ohelela: Katolika, Luterana, Metotista, Patista, ya Pentekosite? Kaarowa ohela vayi? Nkisuwenle. Sothene iyo sinnihoverya n’itthu sothene sikina, sinnikweretha mikaano, ni itthu sothene sikina.

120 Masi kaahelaka waamini waka mwa Masu Awe, onookweetya. Khaavo ontaphulela Awo. Ela eri va, SIISSO ANIHIMYA T’APWIYA. Nto miyo kinnaamini Yeeyo. Vo ti vari mulipiheryo.

121 Tothoro mmosa ooreera muñma opooma nno, mpatthani aka, Totori Sam Adair. Naari aximiravo vamosa. Nyuwo othene munnimusuwela Sam. Nto owo aarookiirela, owo khwira, “Bill. . .” Nuumala orwa yoowoona ele, khimuleela vatthu vaarow’awe oteka emp’awe, moota yaarow’aya okhala. Vano murowe iwe, mwamukohe khula okathi sinto eyo kahi ekeekhahi. Miyaakha miili wala miraru ehinatthi wiireya, kaahimuleela vatthu vaarow’aya okhala. Miyo khwira, “Munrowa ohalela okuxa ekwarerawu ila.” Nto eri etthu emosa eriyari ya owo ni yeeyo, nto nlo efaramaasiya. Totori Adair t’orina ele enihaleela, n’ifaramaasiya. Ti yeeyo tu. Totori Adair oomaliherya yeeyo voolikane-ene, yoowoona eyo. Vaavo, nipuro nimosa owo iiraly’awe, “Khivanweryaneya hata okwanyyiwa mwa miyaakha miloko miili ni mithanu. Eri opwaroni wa milattu.”

122 Miyo khwira, “Totori, Apwiya annoovahani, mwaha wo wiiyeviha wanyu.”

Owo khwira, “Nkihiyo ooreera murima.”

123 Miyo khwira, “Nyuwo mwa khapa. Mookhalana nikosi ota, nikosi ninrow’anyu waawehanaka apatthan’inyu va, masi muhina nyuwo mwa mutthu eekeekhai. Mukhume munikosini mmo.” Miyo khwira, “Muluku ohoovahani.”

124 Owo khwira, “Nkinakhalakhale koohoveryakani, Billy, masi kihaana ohoverya eyo.”

Miyo khwira, “Rowakani oskritooriyu wanyu.” Nto siiso owo khuruwa.

125 Mmeeloni mwaya, owo khukilikarela, khwira, “Kooriiriwa kinihala okhwa.”

126 Miyo khwira, “Exeeni eniiraneya?” Waari eriyari ya Julho. Miyo khwira, “Exeeni eniireya, Totori?”

127 Khwira, “Kinoomalaru othuma nipuwa nene, Billy. Awo yaahikhalana muthukumano nsana ohiyu oBoston, nto koothuma nipuwa nene voosiisu yoola.”

Khwira, “Miyo kaahooleelani.”

128 Miyo kaari weiwo nihiku nlo, kilavulaka ni yoowo, okathi kapwitthi aarummy’awe wiitho waka. Owo khwira, “Kinnitthokelela wira kahaahimeerya atthu ekonto anoorwa mu, siiso.” Exeeni iyo? Vano, Muluku alavula etthu, ehaana wiiraneya.

129 Nsana ohiyu apatthani kamosa-kamosa yaahirwa. Awo yaarimwiiwa yoowoona ele yaahimya mwaha wa etthove yaarina inyaka sa isentiimeturu emiya ni thanu na piili, ni ekhaya yoottweelela. Nkisuwenle atthu akavi anoorwa owaani, anthuna woona yeeyo. Miyo khwira, “Efiita ya mphimo ela va. Muhele v’enyakani.” Owo aarimwiiwa ehinatthi wiiraneya. Munnona? Mwaha wa xeeni? Muluku aahimiyaka etthu, ehaana wiiraneya. Mwaha wa yeeyo, ennilihipheriwa.

130 Vano, *va* t’eri etthokiheryo yo woopoliwa. Vano nto vakhala wira yoowoona Awe yaahiireya voolikane-ene, vekeekhai enamuna anihimya’aya, nto ekerej’ela va ennisuwela wira eyo ekeekhaii, vano ankhii Masu Awe? Munnona? Awo t’olipaneyaxa ovikana yoowoona. Vakhala wira yoowoona khelavunle ni Masu, weso yoowoona ene ti yoovonyeya. Masi ti Masu, opacerya wene, okhala wira Masu ti Muluku. Munnona? Tivo, Owo ori mapuro othene. Owo oohimya eyo va, khwiiriha okhumelela oCanada. Amen. Moone, Owo ori mapuro othene. Vaareera.

131 Yoopacerya, muhaana oyariwa vasya. Vano mwayariwa vasya, munookhalana waamini; munimwaamini Masu. Mpakha muyariwe vasya, munoovaanyihana ni Yaawo. Mwakhalaru oowuuramela etiiini paahi, ni—ni khukhalana o—o—osuwela vakhani w’emutthu wira mwaahaana wira yooreera, khamunkhalakhala nweryaka wiiwanana ni Masu a Muluku. Khamunkhalakhala mwiiraka. Muhaana oyariwa vasya. Nto, oyariwa vasya, oniruha waaminii. Vaareera. Vano, vammal’anyu waamini, ola *va*, w-a-a-m-i-n-i, waamini, nto moolikana wira munnuwe.

132 Vano, atthu anci-ene anoorowa waltaari, n’uvekela, ni wira, “Pwiya, mukilevelele.” Vano musuwelelo muulupale wa oreerihwa onimoorwa wa awo, n’itthu. Vano munookhalana okathi muulupale, okhuma waltaari, mukhuwelaka.

Munootthika, mwiiraka, “Attottopeliwe Muluku, kahaakhela.” Nnari, mupacenrye paahi nipuro mukhanly’anyu oowunnuwaka. Khamwiirale hat’etthu nlelo. Munnona? Etthu emosa paahi mwiiraly’anyu muthipenle mapotto paahi.

¹³³ Vano munrowa oteka empa, nto n’uhela mapotto, muniira, “Moone, kookhalana.” Munnona? Nyuwo murina mapotto wira muteke-vo emp’anyu. Vano muhaana oteka empa.

¹³⁴ Vano ti vaavo etthu ene enkel’aya, voosiis’ula, enrow’ahu olavula vano. Vaareera. Empa, mapotto ala t’opacerya. Mulipiheryo w’oKristu t’uvi? Waamini Masu a Muluku. Owo ti mulipiheryo anyu. Vano munoopacerya wunnuwa. Nto munoopacerya, munoopacerya wuncererya vamulipiheryoni vaava.

¹³⁵ Vano, oteka empa, munivenxa mapotto ni itthu sothene sikina. Munna Wood, ni akina a makalapintero ala ni anamateka va yaamuwerya onihimeerya moota entekiw’aya empa. Munnona? Masi miyo kinrowa wooleelani moota w’oteka emp’anyu ya muroohoni, memmo Muluku onwery’awe okhalamo. Owo onthuna akhaleke mwa nyuwo. Owo onthuna ookhaliheni ntoko yoowo Mwaneene. Owo onthuna wira mooniheriweke, kiireke, mooniheryeke, Mukhalelo Awe.

¹³⁶ Moosuwela, mahiku a khalayi okathi yaapakiw’aya eweero, ehinatthi okhalana mulipa-oototoxa wira oreerihe, yaahaana omaniwa eweero ene, omaniwa wira akumihawe makhurumela, eyuuma, ni ekhoopiri ni itthu, ni yaamukhala emanaka paahi, n’urukunxa, n’umana. aHinti anniira yeeyo vano, omana eweero, nto awo anoomanasa. Moosuwela moota awo yaawery’aya ohimya wira eyuuma yothene yaahikhuma, ni nikhurumela nothene n’itthu, ni wira nthupi naahikhuma? Okathi ole aamana aawery’awe wiisoona mmansawe, ntoko eloola, mwa yeeyo. Yaari yoothuwa ni yowooneela voophiyerya mpakha ooneel’awe mulipa-oomana.

¹³⁷ Ti siiso Muluku siniir’awe. Owo onkuxa eweero ophwany’awe elapo ya vathi, nto Owo onoomana, ni Eroho Yowarya, orukunxa, n’urukunxa, n’umana mpakha (Owo waakhela) Owo owerya wona wooneela Wawe. [Munna Branham omanne ikuphi imaara sinci-ene ohimyaka nuulumo nla—Mol.]

¹³⁸ Nto ti yeeyo entthuneya hiyo wira, omooniherya Mwaana a Muluku. Nto vano entthuneya wira hiyo nivareke muteko Awe. Owo ohimye wira, “Ole onikaamini. . .” Yohani Oowaarya 14:7, “Ole onikaamini, miteko Miyo sinvar’aka owo onoovara nave.” Munipacerya wooniherya miteko sa Kristu.

¹³⁹ Masi anci-ene a hiyo nineererya ovara miteko sa Kristu ohinatthi wooniheriwa Kristu mwa hiyo. Vano vo ti vari mulattu. Hiyo ninniphwanya itthu iyo siiraneyaka. Nyuwo munnisuwela. Miyo kinnisuwela. Hiyo ninnoona, ikwattulo

iya mphironi. Ninimwaaphwanya arumeyi anci-ene, aKristu, ntoko makwankwara ethukumanne ene mphironi, okhala wira khakenle mwa yeeyo vootthuneya.

¹⁴⁰ Nto tivo kiry'aka va voosiis'ula, kintthuna kiixuttihe ekerej'ela yaamukhaani, ni miyo, moota onweryaney'aya hiyo okhala nipuro n'okhala na Muluku mukumi. Akavi enaasivela okhala nenlo? Nipuro n'okhala na Muluku mukumi!

¹⁴¹ Vano va t'eri etthu eniir'ahu. Etthu yoopacerya t'ivi? Waamini n'uyariwa vasya. Eyo t'uthipela mapotto.

¹⁴² Vano, nuumala othipela mapotto, yaneili munimuncererya mapotto anyu. "Wuncererya waamini wanyu." Petru oohimya va. Muncererye wawinyu. . . Yoopacerya mukhalane waamini, vano muncererye ikuru mwa waamini wanyu. Nlo ti nripu ninttharelana. Yoopacerya, muthipele nipotto, waamini. Nto, mwa waamini wanyu, muncererye ikuru.

¹⁴³ Vano, vaavo vo t'enaamoroxa anci-ene a hiyo. Ayo, mulopwana. Ayo. "Muncererye ikuru mwa waamini wanyu." Eyo khenihimya paahi okhalana makhalelo eeharusi, moosuwela, ntoko muthiyana wala mulopwana, ni siiso. Eyo kherina naata n'yo.

¹⁴⁴ Bibilia ohimnye wira, hiyo noosoma va muLiivuruni mwa Luka, vaavo Owo ohimny'awe wira, "Saahikhuma ikuru mwa Yoowo." Eyo ekeekhai? Hiyo naarowaka okhala ntoko Yoowo, nihaana okhalana ikuru, nto. Nihaana okhalana, wira nikhale ntoko Yoowo. Ti esipo yoopacerya etonko okisivela, mwa—muhina mwa isipo, emosa wa suulupale, yaari, *Okhala Ntoko Yesu*. Ahe, kaarowaka okhala ntoko Yesu, kihaana okhalana ikuru, n'uvaha wira evireke okhuma mwa miyo mpakha mw'atthuni. Okhala wira, "Ikuru saahikhuma mwa Yoowo mpakha mw'atthuni." Ikuru! Nto muhinatthi okumiha mwa nyuwo, muhaana okhalana toko. Mwaahikhalane, eyo khenikhuma. Khekhanle hat'etthu mmo wira ekhume.

¹⁴⁵ Ankhi vaakhanle wira mutthu aamutthuna okumiha ikuru mwa hiyo, vano exeeke khuyahokolowa "musurukhu khomphiyerya"? Munnona? Nnari, nnari, khekhanle hat'etthu vo y'okumiha-mo, exeeke yoottikihwiwa. Mutthu onoowehani ntoko muKristu, vano meelo owoonani nno mwiiraka itthu ntoko natampi, khasikhanle ikuru soophiyerya sinweryaneya okumihiwa vo. Munnona? Ekeekhai.

¹⁴⁶ Ikuru sihaana okhala mwa hiyo. Nto mpakha hiyo okhalana ikuru. . . Vano vankhalan'ahu ikuru s'ekeekhai, nnimwincererya mwa waamini wahu. Eyo t'exiri enttharelana ya mulipiheryo. Vano, yoopacerya muhaana okhalana waamini. Waamini paahi khoniira eyo. Muhaana. . . Petru ohimnye wira, "Vano muncererye ikuru mwa waamini wanyu." Muhaana okhalana ikuru, wira muncererye mwa waamini wanyu.

147 Vano, nto, khino yaamukhala wira, etthu muhikhalanenl'anyu, okhala wira ikereja sinci-ene s'olelo siniwiixuttihani wira khivantthuneya nyuwo okhalana eyo, wala mahiku aya aavira. "Awo kharina yo okhalana. Etthu emosa entthuneya wira witakanxa mukereja paahi. Ayo, mahiku ene aavira."

148 Ikuru, mutthu ti mutthu onnisuwela ele enihimya ikuru, moone, ni hiyo nihaana okhalana. Vakhala wira ikuru saahikhuma mwa Yoowo, wira onvonihe muthiyana aawereiwa, Owo onwehererya ikuru imosaru Mukereja mw'Awe, okhala wira Owo aari ethoonyeryo ahu. Ni vakhala wira Owo aahikhalana ikuru wira aavahe atthu, Owo onwehererya hiyo okhalana ikuru wira naavahe atthu. Vano ikuru exeenii? Ikuru okhomaala, owerya.

149 Akina a awo hata khanaamini owerya wa Muluku. Awo aniira, "Eyo—eyo—eyo yoovira. Etthu emosa entthuneya nyuwo wira ohela nsina nanyu muliivuruni, n'umiseriwa, wala oyeheriwa, wala opatisiwa, wala etthu p'itthu ekina. Nto ti yeeyo tu murin'anyu wira."

150 Masi Petru oohimya va, "Muncererye ikuru." Vano, Petru onlavula mwaha w'oteka Empa ya Muluku, munnoona, Empa ya Muluku, otikitherya nipuro nimosa. Nto nuumala okhalana ikuru, muhaana okhalana... Nuumala okhalana waamini, muhaana okhalana ikuru ni yoowo. Ekeekhai. Okhalana ikuru wa olumwenku wothene.

151 Kaahilaleerya mutthaka mmosa miyaakha soophiyaka miloko miili sivinre, wona waka, ya Reverendu Mwenye Khokowa. Khokowa, pastore. Kaakumin'he mwa yoosoma vaavo Yesu ohimmy'awe wira, "Nkawehani ikhokowa, khasinvara muteko hata khasinttottha ikuwo. Nave kinooleelani wira, Salomoni n'eyuulupale awe yothene khanaware ntoko emosa."

152 Nkawehani ekhokowa. Enikhuma vathi mmaroveni. Nto khula minuutu na nihiku ehaana weetta okhuma vathi. Munnona? Vano eniirihani ikuru sinkumihery'aya? Enookawa. Enivaha moonelo wooreera wa ole onxankela. Eyo enimwiiythukula mmansaya mwaha w'oravo, wira enwi erwe ekuxe epantte aya. Kheniikhupanyiha. Yookhalana paahi, wira ekawe. Ankhi vaakhanle wira enwi yaamoorwa mme; musurukhu khoniphiyerya, khiwaa-mo oravo? Enwi iyo yaamukhaani yaamusuna muru aya yiire, "Muthinto xeeni ula wa khokowa?"

153 Akhala mutthu onoorwa, otthunaka ophwanya woopowa, khurowa ekereja enaamini wira mahiku a miiriirya aamala?

154 Ntoko Jack Coe aahimmy'awe emaara emosa. Orowaka orestaurant, jaarina elista ya solya yuulupale; khupacerya osoma, enama y'enyompe n'itthu sikina. Wira, "Kinookuxa enama y'enyompe."

“Ahe, eyo yaari ya mahiku avinre. Hiyo khanrina eyo.”

155 Vaamureerela ohiya elista eyo ya solya khikhuma, moone, eyo ekeekhaii, 'okhala wira awo kharina hat'etthu y'olya, khula enamuna. Tivo muhaana orowa vatthu erestaurante erin'aya etthu y'olya.

156 Nto mutthu a erooho, oninnuwa, onnitthuna etthu wira olye. Eyo ti Masu a Muluku. Miyo kinnaamini khula Nsu na Yaawo.

Muluku ohaana meesa oowaataleliwa vaavo
masantu a Muluku anly'aya-vo,

Owo onaalattula atthu Awe oothanliwa,
“Murwe mulye.”

Ni emana Awe Owo onnilyiha, Owo onnivaha
sothene sinthun'ahu,

Oh, ti yooreera olya ni Yesu okathi wothene.

157 Eyo ekeekhaii. Ayo, mulopwana. Owo ookhalana. Ekereja yookhalana, Ekereja ya Muluku mukumi, etekiwe mwa mutthu ula oomalela, w'omusuwela Kristu. Vano, vano muhaana okhalana ikuru.

158 Miyo khwira nto, naanaanoru, ookhala mutthu enimusivela wunkherya munkheryo aya. Owo kahi n'eralo. Owo orina munkheryo. Ohinatthi ovaha munkheryo, ohaana okhalana. Ohinatthi ovaha oravo, ohaana okhalana. Ohinatthi ovaha ereerelo, ohaana okhalana.

159 Muhinatthi ovaha ikuru, muhaana okhalana. Tivo, muncererye mwa waamini wanyu, ikuru. Amen. Munniiwa? Naamuwerya okhala vaavo okathi munci-ene, masi okathi ahu waamunimalela. Wuncererya ikuru mwa waamini wanyu. Vano, yoopacerya waaminii, nuumala ikuru.

160 Vano nto, ya neeraru, muncererya ankhilii. Ankhili, vano, khenihimya wira ankhili a mulaponi, 'okhala wira owo ololo vamaithoni va Muluku; masi ankhili oolamula, olamula (exeeni?) yooreera ni yootakhala. Munilamula sayi, nto, mwakhalana ankhili a oKristu ni ikuru sanyu ni waamini? Munilamula sinto Masu t'ekeekhai wala t'ovonyeya. Nto mwaaweryaka ohiya iyaminelo sanyu sothene, ni ohaamini wanyu wothene, itthu sothene munihimy'anyu wira muhiira, nto munookhalana ankhili o waamini wira Muluku khokhanle woothaka. “Moolumo othene a mutthu t'owootha, masi Awaka ekeekhaii.” Munnona? Vano nyuwo munikhalana ankhili. Awo ankhili aalupale. Khivantthuneya okhalana ikharawu xexe mukoleexiyu, wala etthu siiso, wira mukhalane, okhala wira manema ala othene munivahiwa ni Muluku, wira ekhale vasulu va mulipiheryo wo waamini wanyu, wira nwerye ophierya mukhalelo woomalela wa mutthu eekeekhai, mukumi a Muluku. Ayo, mulopwana.

161 Muncererye, muncererye ankhili, okhala wira, ankhili ti Masu Awe. Muhaana waamini mwa enamuna yeela. Ntoko,

mwaahaana waamini olelo wira e . . . ni okupali, wira mahiku a miiriirya khamanle. Ankhili wira ele Muluku ehimmy'awe, Muluku onniwerya opaka.

¹⁶² Abrahamu aahaamini yeeyo. Nto okathi waarin'awe miyaakha emiya, owo khaamuhovenrye natiri a Muluku mwaha wo ohaamini. Nkawehani moota Masu awo yaakhal'aya ntoko ootheiha. Va ori mutthu, a miyaakha emiya, anwehereryaka mwaana oyariwa vatthokoni vawe, ni muthiyana aarina miyaakha miloko mithanu na mixexe. Munnona? Saahivira miyaakha soophiyaka miloko mithanu w'okathi w'oyara, aakhala n'uyo okhuma waary'awe mwa—mwali, wala mwaaruusi. Nto ola ori va, evirelo y'ekumi awe yaahikhwa. Ni mmirimani mwa Sara mwaahikhwa. Ni miroromelo sothene saahimala, vakhala wira saahikhala miroromelo. Masi, nlelo, voovirikana ni nrromelo, owo aanaamini mwa nrromelo, okhala wira aahikhalana ankhili wira Muluku aaniwerya omaliherya sothene Owo aahimmy'awe.

¹⁶³ Vano, mwakhalanaru siiso, nto muncererye yeeyo mwa waamini wanyu. Mwakhalana ikuru s'ekeekhai, muncererye seyo mwa waamini wanyu. Mwaaweryaka weetta va mphironi, mukhaleke ntoko muKristu, mwiireke ntoko muKristu, mukhaleke muKristu, muncererye yeeyo mwa waamini wanyu. Mwakhalana ankhili . . .

¹⁶⁴ Nyuwo muniira, "Ahe, nkisuwenle vano sinto Yoolempwa *ela* ti yeekeekhai. Vano va siri Miteko 2:38, nkisuwela moota eniiriw'aya ni Miteko 28:19. Nkinsuwela." Vaareera. Khamuni—khamunincererya hat'etthu, okhala wira nlelo khamunakhalane. Munnona? Munrowa wira exeeni? Okhala wira, khamurina ankhili oophiyerya osuwela sa Muluku, nlelo, wira Bibilia khoniivirikanya. Muhiye. Muhihimye-tho etthu wa yeeyo. Munnona? Muhiye meekh'aya.

¹⁶⁵ Masi mwaaweryaka woona wira Yoolempwa kheniivirikanya, ni wira munniwerya ohimya; ni munniwerya woona, yeeyo, ni wuupulula wa Muluku, Masu othene alempwe mwa miiriirya, vano osuwela wa Muluku paahi t'onwerya wuupulula Awo; vano mwaavenyaka ni wira, omaliherya khula Masu a Muluku ni "amen," vano muncererye yeeyo mwa waamini wanyu.

¹⁶⁶ Oh, muniphiyerya okhala mutthu ooloka sana vano. Munnona? Munimunnuwa, moone. N'ixeeni? Ni waamini, vano ni ikuru, vano ankhili. Munnoona moota ontekiw'awe mutthu ula? Munoowerya woona wira khiyaavo—khiyaavo hata enamuna y'otthyawa. Ela t'inamuna y'ophiyerya mukhalelo woomalela wa Kristu. Ayo, mulopwana.

¹⁶⁷ Olamula, olamula oratteene. Olamula sinto ti yooreera wala yootakhala, waamini Masu a Muluku. Olamula sinto ti yooreera wala yootakhala, sinto kaahaana orumeela eyaaminelo

wala omurumeela Muluku. Olamula sinto ti yooreera wala yootakhala, kaahaana oyariwa vasya wala wiitakanxa mukereja. Vano munoopacerya. Mulamule sana, mulaleyi aairaka wira, “Mahiku a miiriirya aamala.” Bibilia ohimnye wira, “Yesu Kristu mmosaru nsana, olelo, ni mahiku othene.” Vano t’ivi enrow’anyu waamini?

¹⁶⁸ Nyuwo mwaairaka wira, “Kinoomutthara Muluku.” Vano, khamunihimerya ohimya paahi, “Ahe, miyo—miyo kinookupali,” okhuma mmurimani mwanyu paahi. Masi, etthu emosa mwa nyuwo, waamini wanyu onnooniherya vo. Eyo vo. Waamini wanyu oniira, “Miyo koosuwela wira Owo mmosaru. Amen. Miyo koomukhalela onaamoona wira Owo mmosaru. Khiyaavo hat’etthu enwerya okumiha eyo mwa miyo. Koosuwela wira Owo t’eekekhai.” Amen. Vano muncererye yeeyo mwa waamini wanyu. Muhele vamulipiheryoni. Munimunnuwa vano, munimunnuwa mpakha mOmweneni. Moophiya nipuro vano. Vaareera.

¹⁶⁹ Vano, etthu enttharelana, mulaleyi onimooleelani, ni atthu anci-ene animwiira, “E. . . Itthu iya munsom’anyu mBibiliani, saari sa nihiku nikina. Vano, kinimooleelani mwah’aya. Okhala wira, hiyo khanimphavela itthu iyo olelo. Hiyo khanimphavela. Munnona? Khivantthuneya. Khanirina yo wira itthu iyo, ovoniha wa Muluku. Hiyo khanniira olavula ilavulelo, mukereja, wira—wira nikhaliheke ekerej’ahu yoolikana. Ni hiyo khanniira *ela*.”

¹⁷⁰ Ninoophiyerya yeeyo. Kookhalana Yolempwa emosa va ya yeeyo, moone, sinto naahaana wira wala nnari, vano.

¹⁷¹ Masi va owo ohimnye wira, “Nkinsuwela. Khintthuneya hiyo wira eyo olelo. Etthu emosa paahi kinoon’aka wira nihaana wira, nihaana wiixutta olavula oratteene ohoolo w’atthu. Nihaana orowa n’umuhiya pisikiyatra othokosa muupuwelo ahu, wira oone sinto ninniwerya wiisooniherya mmansihu, sinto Osuwela wahu ti wuulupale oniphiyerya wira niire, ni—ni siiso ntoko yeeyo. Kinoona wira. . . Ni hiyo nrina mithukumano soomalela wunnuwa. Hiyo ninteka mutthenkeso ahu.”

¹⁷² Hiyo khaninteka mutthenkeso. Miyo nkiri va voosiis’ula wira kiteke mutthenkeso. Kristu khonakirumeke wira kiteke mutthenkeso. Kristu okirumme wira kaakhalihe atthu wira ephiyerye mukhalelo wa Yesu Kristu, wira ekhale esenterale ya nerexiia ni nipuro n’okhala Eroho, ni Masu Awe. Ni Masu Awe, moone, omukhaliha mutthu ophiyerya nipuro nenlo. Kahi oteka mutthenkeso wa muromolelo muulupale, masi waakhaliha atthu aana alopwana n’athiyana a Muluku. Owo ti muupuwelo. Munnona? Muncererye mwa waamini wanyu, ikuru; mwa ikuru sanyu, muncererye ankhili. Ahe, vano nyuwo muniphiyerya nipuro.

173 Vano awo yaapaceryaka wira, “Ahe, hiyo khanrina yo okupali iyo olelo. . .” Muhaana okupali. Ehaana okhala siiso.

174 Soolempwa khasikhanle woothaka. “Ni Iyo khasintaphuleliwa ni mutthu meekh’awe,” Bibilia oohimya. Muhaana waamini Iyo siiso silempwaly’aya Vo. Munnona? Muhaana okhalana itthu iya. Nto enamuna emosa paahi enrow’anyu owerya okhalana iyo, ti okhalana ankhili anikhuma Wirimu. Nto ankhili anikhuma Wirimu anoolipiherya Masu. Munnona?

175 Muhaana waamini, kahi wiipaka waamini. Khiyaavo hata emosa wa itthu iya ekhanle waamini wo wiipaka, moone, mweereryaka wira, “Miyi kihaana.” Muhikhale ntthokolo ninwara mapururu a mulalampi mwa nyuwo, moone, ’okhala wira anoomora naanaanoru. Awo khamelenle vo v’ephattu. Aroottopanyeriwa-mo paahi.

176 Kinnuupuwela vatthu Davidi ohimmy’awe vo, Masalmo 1, “Owo onlikana ni mwiri ophatteiwe okerekhere wa maasi.” Moosuwela, yookhala evirikanelo ophatteiwa ni oheliwa, ohomeeriwa. Ntoko mwiri wa karvalyo, ophatteiwe, onrowa vathi sana n’ulipa oratteene. Ekopo yaamukhaani eniihela vale, khamunsuwela etthu enrowa wiireya ni yeeyo. Kherina mitathaari. Kherina mulipiheryo. Munnona?

177 Enlikana n’atthu kamosa-kamosa ekhumaka oseminaariyu wala etthu siiso, moone. Kharina. . . “Ahe, Totori *Lexe ni lexe* t’okikhalinhe mmutekoni.” Khivanvirikana hata vakhani yaari xeeni.

178 Kristu t’irinhe wira muyariwe memmo, moone, moone, mwaha wo waamini wanyu. Munnona? Nyuwo mooyariwa-tho nto muyariwe memmo. Vano nto nuumala oyariwa memmo, iya t’itthu Owo onweherery’awe nyuwo wuncererya. Mukhale muncereryaka seiyo paahi. Vano ninrowa nilukamaka muhina mwene.

179 Vano enookhala etthu ekina mwa ankhili yaala, khino enrow’ahu olavula, omusuwela Muluku. Munnona? “Bibilia mahiku ala oomala maana Awe?” Moone, awo, atthu anci-ene anoollelani yeeyo, wira Bibilia khonihimya yeeyo vekeekhai. Vakhala wira Muluku onnikikhapelela, ni okittharuxa itampi saka, ni kakhala mwaana a Muluku, Owo onniira yeeyo. Owo onniwiirihani siiso, aana alopwana [Nipuro vahiitthu mufiitani—Mol.] athiyana. Mwaira etthu yoonanara, Owo onimootharuxani. Nto Muluku akhala a meekh’awexa mwaha wa nyuwo, wira Owo ookhapelelekeni ni woottharuxani, khivatempe Owo wira ni Masu Awe, akhanle t’ithoonyeryo anyu, akhanle yoowo Mwaneene!

Wopaceryani naari Nsu, nto Nsu naari ni Muluku, nto Nsu naari Muluku.

Vano. . . khwiipaka erutthu, khukhala ni hiyo, . . .

180 Masu ti wiisuupulula wa Yesu Kristu, Biblia ohimnye siiso, Kristu iisuupululaka mwa Masu Awe. Nto vakhala wira Owo onnoowehexaxani mwaahononaka ikano iya, Owo onnoolamulani mwaha wa yeeyo, khivatempe Owo okhapelela ikano Sawe sinoolamulani! Amen.

181 Rowakani, mmiravo, muhikileele itthu iyo!

182 Miyo kinnaamini osuwela wooloka, wa Eroho Yowarya. Osuwela wa Eroho Yowarya khula okathi onoomaliherya Masu ni "amen." Nyuwo mwaaphwanyaka itthu iya sinikhala ntoko wiivirikanya mmansaya, mBibiliani, munookilaathi n'usoma, mulompaka siiso. Nto naanaanoru, Eroho Yowarya enoopacerya okela. Nuvira okathi vakhani munimoona wira sinoolikana vamosa, nto vo moosuwela sana. Munnona? Awo t'ankhili.

183 Akina a awo aniira, "Ahe, vano, Biblia ohimnye wira Owo mmosaru nsana, olelo ni mahiku othene."

184 Vano ekereja eniira, "Mwa moonelo mmosa, Owo mmosaru." Huh-uh! Huh-uh! Nyuwo moohonona ephaka ene, vaavo vo. Munnona? Ayo, mulopwana. Nnari, mulopwana. Owo mmosaru. Ayo, mulopwana.

185 "Yesu Kristu mmosaru nsana, olelo, ni mahiku othene." Khekhanle hata evirikanelo mwa Yoowo, nnakhala. Owo onikhala Mukereja mw'Awe, iiraka etthu emosaru. "Okathi vakhani," ntoko sihimmy'aka okathi ovinre, "okathi vakhani atthu a vathi khanikoona-tho, masi nyuwo munookoona." Maana, Owo ohimnye wira, "Kinookhala ni nyuwo, hata mwa nyuwo, mpakha omala olumwenku." Emaara ekina, Owo ohimnye wira, "Miteko Miyo sinvar'aka nyuwo munoovara nave." Emaara ekina, Owo ohimnye wira, "Kinookhala Mwiri. Nyuwo munookhala irintta." Nto erintta enkhalapaahi ni Ekumi ya Mwiri. Etthu p'itthu eri Mmwirini enikhuma ni erintta. Ovuwa! Vano, "Kristu mmosaru nsana, olelo, ni mahiku othene." Enikumiherya Ekumi ya Pwiya Yesu Kristu. Amen.

186 Ankhili; kahi a molumwenkuni (awo t'owaanyiherya). Khula enamuna y'ankhili a molumwenkuni t'owaanyiherya. Munnona? Masi waamini khorina hata waanyiherya. Muluku onoowuupululelani etthu *khata khata* enrowa wiiraneya, khula sientista molumwenkuni aamuwerya wooleelani wira, "Ti yoovirikana. Khiyaakhanle wiiraneya." Nyuwo munnaamini, khula enamuna. Munnona? Ayo, mulopwana. Khonaanyiherya. Biblia ohimnye wira, "Nihiyaka waanyiherya." Khamunaanyiherya ni waamini. Waamini khorina hata waanyiherya. Waamini onnisuwela vary'aya. Waamini onniira. Waamini onnilipa. Khonttikinyeya. Khiyaavo hat'etthu enwerya ottikinya. Khenikicala exeeni enihimya *ela, ele, ekina*. Owo khonttikinyeya, hata vakhani. Owo onikhala vaavo, n'uwehererya, owehererya, owehererya, owehererya. Khivanvirikana. Owo onikhala vaavo.

187 Muluku aahimuhimeerya Nowe wira itthu iya saamurowa okhumelela. Owo khwaamini. Munnona? Muluku aahimuhimeerya Moise wira itthu iya sinoorowa okhumelela. Owo khwaamini. Muluku aahaahimeerya awiixutti wira itthu khata khata saamukhumelela, “Nwelase iwe oPentekosite mwalipelele.” Awo yaakhalanse weiwe. Ayo, mulopwana. Vaareera.

188 Vano, ankhili, vano, kahi ankhili a molumwenkuni, masi t’ankhili a Wirimu. Nto ankhili a Wirimu, okathi Muluku ory’awe ephattuwelo y’ankhili othene, ni Muluku ti Masu, vano, nyuwo mwarineene ankhili a Wirimu, munimwaamini Masu, nto munoothokelela etthu p’itthu ni Masu.

189 Nto mwah’ola wa mpoosito ekereja eryaaya-mo, ahiiso kiryaaka-mo. Mmosa w’axilopwana emara emosa, mwa wiiwiwa vakhani, aahikileela. Khwira, miyo khwira... “Khiyaawerya ophwanya hat’etthu yaavonyeie.” Nto siiso awo khupacerya o... .

190 Miyo khwira, “Ahe, nto, vakhala wira khiyaavo hat’etthu evonyeie, kihinihiyeriwani?” Munnona? Munnona? Vano miyo khukelela ohoolo, kaahimeeryaka Soolempwa kamosa-kamosa.

191 Owo khwira, mutthu mmosa muulupale ni sikaro mmatatani mwawe, owo khwira, “Mwenye Branham, miyo ka musomi a Bibilia.”

Miyo khwira, “Kinnitthapela wiiwa eyo.”

192 Owo khwira, “Vano kintthuna kisuwele ethiru xeeni ila, nyuwo munvekel’anyu musurukhu mwaha wa maleeso ala munveleel’anyu, ethiru iyo yaamukhaani y’ovekelela maleeso n’uveleeliha, ‘ikuwo iye sooheliwa eparakha,’ nyuwo muniihana, ‘ekuwo.’” Owo khwira, “Vano nyuwo munaakhela musurukhu mwaha wa seiyo.”

Miyo khwira, “Nnari, mulopwana. Iyo hasinliviwa.”

Nto owo khwira, “Ahe, mwa ethiru yeela.”

193 Miyo khwira, “Nyuwo muniihana ethiru, mulopwana. Mookileela minuutu vakhani sivinre wira mwa musomi a Bibilia.”

Owo khwira, “Ka yoowo.”

194 Miyo khwira, “Mukisomele Miteko 19:11.” Ankhili! Owo khwiireya ntapha mwaneene mwa yeeyo, khweererya orukunxa mwaha. Miyo khwira, “Vano mukisomele Yohani 5:14.” Khaawerya wira. Miyo khwira, “Vano Yakopo 5:14.” Khaawerya wira. Miyo khwira, “Munnimusuwela Yohani 3:16?” Munnona? Ankhili, oosuwela, olumwenku! Masi okathi... .

195 Owo khwira, “Masi, Mwenye Branham, nyuwo muneererya ophuka mwah’ola ni Bibilia. Hiyo nimphuka nittharihaka ikano sa mulaponi.”

196 Miyo khwira, “Mwenye, ikano sa mulaponi khasimmutthariha Bibilia? Vano t’ixariya.” Amen! Vekeekhai.

197 Ankhili; kahi a molumwenkuni. Ankhili a erooho a Masu, osuwela ele Muluku ehimmy’awe, wira ele Muluku ehimmy’awe, ti yeeyo. Vano nyuwo mwakhalana yaawo ni munawerya waamini itthu iya sothene, wira Owo mmosaru mwa itthu iya sothene Masu anihimy’aya wira ti s’ekeekhai, nyuwo munoomaliherya khula emosa ni “amen.” Sothene siri sana. Muncererye yeeyo mwa waamini wanyu. Sothene siri sana. Ayo.

198 Akhala mutthu oneererya wooleelani, wira, “Bibilia oopwetexa owerya wawe. Khekhanle etthu iyo ntoko opatiiso wa Eroho Yowarya.” Huh-uh. Muhincererye yeeyo. Khenvara etthu. Enoomora. Ntoko ohela oloko vamwala, khonrowa olipa. Onookomowa.

199 Nto atthu animooleelani wira, “Bibilia khokhanle ooromeliwaka olelo. Mukasoope vano. Muhirowe mwaaminiki yeeyo. Khivanweryaneya okhala ekeekhai.” Nyuwo munniwaka eyo okathi wothene. Ohimya waamukhaani, “Bibilia khonlipaneya.” Ahe, vakhala wira—vakhala wira murina yeeyo mmuruni mwanyu, muhe—muheererye wuncererya yeeyo, okhala wira khenrowa ovara etthu. Empa yothene enookomowela vathi vaavo vene.

200 Ehaana oheliwa kokotto ni Eroho Yowarya. Kinihimya ovaraana, kokotto onthitta. Nto etthu ene entthitta... Munooosuwela moota...

201 Tupu vulkanisato kweeke t’enikhala okathi munci-ene ovikana exaapha ene pure yoophariheliwa. Exaapha pure vapenewuni enoophwanya oviha vakhani, naanaanoru, enoovihia epenewu iyo vakhani, muupiharu vakhani, enootothowa. Ayo, mulopwana. Munnona?

202 Nto owo t’uri mulattu n’atthu anci-ene olelo. Awo aneererya opharihela ankhili aya vasulu v’ankhili a molumwenkuni, ni manlela vakhani a mulaponi, nto, okathi onrw’aya weereriwa, “Ahe, khino kaahivonya.” Munnona? Nto etheku enookhuma, minuutu vakhani munoonyaala. Onyakula wanyu wothene n’utuphela osulu ni vathi khawoophwanyin’heni hat’etthu. Atthu anoowoonani-tho vantthiyani vamosaru. Munnona? Ti yeeyo.

203 Masi mwakhalaru vo n’uviha woophiyerya wa Eroho Yowarya, mpakha wookhalihani nyuwo ni kaamara okhala mmosaru. Ti yeeyo. Nyuwo ni kaamara munikhala mmosaru. Mwakhalaru vaavo mpakha nyuwo ni khula natiri a Muluku okhala mmosaru, vano muncererye yeeyo mwa waamini wanyu. Mwaahikhale, muhincererye hata vakhani.

Nyuwo muniira, “Khivanweryaneya olipana Masu.” Muheererye wuncererya yeeyo.

204 Nyuwo muniira, “Anatiri mu, a opatiiso wa Eroho Yowarya, yaari paahi a arummwa muloko n’aili,” ntoko sinihimy’aya ikereja kamosa-kamosa olelo, muheererye wuncererya yeeyo. Ti vaavo vari mulipiheryo aya, wothene wookomowa. Munnona? Ntoko saary’awe Oziya, nsana ohiyu, okathi woonaly’awe mulipiheryo wa mulopwan’ola owo aamuroromel’awe, wothene okomowa, omphwanya makuttula, khivaareenre. Vano, “Wa arummwa muloko n’aili paahi, arummwa muloko n’aili paahi.”

205 Miyo kaari wu ni Munna Wright...Miyo kinoona wira arisa ottuli iwe nipuro nlo. Ohiyu emosa, aahikhala murumeyi iwe, miyo kaamulavula, alaleyi axexe wala athanu vamosa. Mulaleyi ula khuvenya khwira, “Vano, kintthuna kooleleni etthu emosa nyuwo atthu oophentiwa. Oh, miyo kinoona wira nyuwo mw’atthu ooreera murima.”

206 Miyo khwira, khimuleela mutthu mmosa, miyo khwira, “T’u—t’ule okilanthi vaavale vale. Nwehe.”

207 Vano, Junior Jackson, aari ottuli iwe, aammalaru olavula. Nto owo khwira...aalaleya mwaha wa mahala a Muluku. Oh, wulu!

208 Owo aamuvihiwa, alipelelaka. Owo khuvenya vale ni aatthuna wiiwa sana. “Vano, kintthuna kihimye wira Mwenye Branham va, kinimooleelani, ti nwanani a Kristu.” Nto owo khutthikela siiso, ohiyu wothene.

209 Alaleyi kamosa-kamosa khupacerya...Miyo khwira, “Nwehererye minuutu mmosa. Vano, muhihimye hat’etthu, axinna. Owo ori mmosa paahi hiyo nri oowaatta.” Miyo khwira, “Mmuhiye mmansawe paahi vano. Owo khukivara.” Miyo kaanitthuna waakhula, vanci-ene, mmansaka, nkaasuwela etthu yo wira. Munnona?

210 Tivo, owo khwira, “Mwenye Branham ti nwanani a Kristu,” vano owo khukelela ohoolo ahimyaka sothene, munsuwel’anyu. Owo khwira, “Owo khuhimya vale, ‘Opatiiso wa Eroho Yowarya.’” Khwira, “Bibilia ohimye wira yaari Muloko n’aili paahi yaakhenle opatiiso wa Eroho Yowarya.” Ohimyaka mwaha w’ovoniha wa Muluku, “Arummwa muloko n’aili paahi ti yaarina ovoniha wa Muluku.” Owo khwira, “Hiyo ninlavula vatthu Bibilia vanlavul’awe, ni nimmaala vatthu Bibilia onimaal’awe-vo.” Miyo khuwehererya mpakha owo olavulasa vale voophiyaka ewoora nuusu.

211 Miyo khwira, “Nwehererye minuutu mmosa paahi. Koolepa sinci-ene va,” miyo khwira, “mukivahe okathi wo waakhula kamosa-kamosa.” Nto vavenny’aka, miyo khwira, “Mulopwan’owo, ohimye wira ‘olavunle vatthu Bibilia valavunly’awe,’ ekerej’awe yoolavula, ‘ni omaanle vatthu Owo omaanly’awe.’ Nyuwo othene mw’anamoona. ‘Ayo.’” Miyo khwira, “Vano, owo ohimye wira ‘Yaari muloko n’aili paahi yaakhenle Eroho Yowarya.’ Bibilia aka ohimye wira

yaahikhala atthu miloko muloko ni miloko miili, woopela woopacerya.” Amen! Murihe enamuna eyo y’ankhili, moone, owo aarumeel’awe.

212 Miyo khwira, “Weso kinoona wira Paulo khaakhenle Eroho Yowarya ohimnye-ene wira aahaakhela.” Munnona?

213 Miyo khwira, “Wu o...Okathi Filipe aaronw’awe khwaaleerya aSamariya. Awo yaahipatisiwa ni Nsina na Yesu. Eroho Yowarya, khayaakhuruwenle paahi. Vano khurummwa khiruuhiwa Petru ni Yohani, khurwaasa khuwiixaatherya matata, nto Eroho Yowarya khwaakhuruwela. Kiireke wira awo yaari muloko n’aili paahi?”

214 Miyo khwira, “Mwa Miteko 10:49, okathi Petru aary’awe vataratoni, nto aahoono yoowoona wira awo yaarowasa owannyawe Korneliyo. Petru nlelo alavulaka, Eroho Yowarya yaahaakhuruwela ale yiiwa Masu.” Miyo khwira, “Bibilia nlelo onolavula. Ekerej’anyu eri vayi?” Eyo yoomorela mowaanyiheryani. Ti yeeyo. Munnona?

215 Miyo khwira, “Ovonihani wa Muluku, nyuwo muhimnye wira, ‘Arummwa muloko n’aili paahi ti yaarina ovonihani wa Muluku.’ Bibilia ohimnye wira Sitefano aahirowa oSamariya khuwomola axetwani khwaavonihani aretta, ni waahikhala othhapa wuulupale mmuttettheni. Vano owo khaari mmosa a muloko n’aili. Owo khaari murummwa. Owo aari tiyaakono.” Amen. Amen.

216 Miyo khwira, “Ni Paulo khaari mmosa a muloko n’aili yaari empa y’osulu, n’uwo aahikhalana yoovaha y’ovonihani.”

217 Miyo khwira, “Nkawehani paahi soovaha s’ovonihani! Vano miyaakha miloko miraru, ohoolo waya, owo nlelo aari w’aKorintu, arumaka okhala yoovaha y’ovonihani mw’Erutthuni ya Kristu.” Oh, wulu!

218 Vano, enamuna eyo y’ankhili muniixutt’anyu muhina mw’eliivuru khata, vanreerela murihele mmucomani mwa ikokhola. Murweele ankhili ala. Muluku ohimnye ene wira, “Owo mmosaru nsana, olelo, ni mahiku othene,” mwiire, “Amen.” Ayo, mulopwana. Ayo, mulopwana. Kahi w’ale muloko n’aili; ti y’atthu othene. Mwakhalanaru enamuna yeeyo ya wa—waamini, waamini wanyu waamaliheryaka, khula epantte, ni “amen,” vano mwiire, “Vaareera,” muncererye yeeyo.

219 Ya neexexe. Nihaana waakuva, okhala wira kiri paahi... Enikhala yooreera sana weemela va n’ulavula. Amen. [Munna mmosa oniira, “Hiyo enoonisivela.”—Mol.] Ayo. Ya neexexe... Kooxukhuru.

220 Muncererye “wiisumaaliha.” Oh, wulu! Noophiyerya wiisumaaliha. Vano, mookhalana waamini, toko; muhaana okhalana yeeyo, opacerya wene. Nuumala muncererye ikuru mwa waamini wanyu, sakhalaru ikuru s’ekeekahi. Vano

muncererye ankhili, yakhalaru ankhili eekeekhai. Vano munrowa wuncererya wiisumaaliha.

221 Wiisumaaliha khenihimya, “ohiya omuwurya aalikoro,” va, nave. Nnari, nnari. Wiisumaaliha khenihimya openuwa ohapaliwa, kahi mwa mwaha yoola. Nno wiisumaaliha wa mBibiliani, wiisumaaliha wa Eroho Yowarya. Eyo emosa ya soowunlela s'erutthu paahi, masi hiyo ninihimya wiisumaaliha wa Eroho Yowarya. Eyo enihimya, moota wooweetiherya nlumi nanyu, ohikhala namakwakwaruwa mwaano; moota wooweetiherya oviruwa wanyu, kahi ophutuwa khula okathi mutthu onoolavul'aweni. Oh, wulu!

222 Wulu, anci-ene a hiyo ninoorowa omora nihinatthi opacerya, khaninrowa? Munnona? Vano ninooxanka mwaha wa xeeni Muluku ohikhala Mukereja mw'Awe, apakaka miiriirya n'itthu awo yaapakas'aya. Ayo, mulopwana. Munnona?

223 Muncererye itthu iya. Muncererye wiisumaaliha mwa yeeyo. Oh, wiisumaaliha, moota wo waakhula vooreera-vo murima mwaalavulihwaka n'uviruwa. Mutthu oniira, “Nyuwo nikhuru na masantu oophirikeya iwo!” Muhituphe mukhunaka miyoono s'ekamisa anyu vano. Munnona? Kahi yeeyo. Masi mulavule ni mphento wa nttittimiho, wiisumaaliha, oreera murima. Eyo t'inamuna entthun'anyu okhala? Okathi onnanarihiw'anyu, muhittikihe. Mmuhiye Owo akhale ethoonyeryo anyu.

224 Atthu ehimya wira, “Mwaari Mwaana a Muluku, mutatuxe maluku ala ekhale mukatthe,” Owo aaniwerya wira eyo, ni wooniherya wira aari Muluku. Masi Owo aari owiisumaaliha. Okathi atthu yaamwiihanne aya, “Pelizepuli,” Owo iirale, “Kinimoolevelelani mwaha wa yeeyo.” Eyo ekeekhai? Awo yaahookola ireru nikuphi owiitho Wawe, ni khusenyela wiitho Wawe, khwira, “Mukhuruwe vamwiikimanyo!”

225 Owo khwira, “Tithi, mwaalevelele. Awo hata khansuwela eniir'aya.”

226 Okathi, Owo aahikhalana yoovaha, Owo aanisuwela itthu sothene, okhala wira mwa Yoowo waakhala oMuluku wothene woomalela mw'erutthuni. Awo yaahimoona Owo opaka miiriirya, aaleelaka atthu ethu yaavonyeiye ni yaowo, ni sikina siiso. Awo khuhela nttapwatta mmuruni mw'Awe siiso, mmaithoni mw'Awe, khummana vamuru ni ekopo, khwira, “Muhimye, munleele oomanneni. Hiyo ninoowaaminini.” Munnona? Owo aahikhalana wiisumaaliha.

227 Vano, nyuwo mwakhalana siiso, muncererye mwa waamini wanyu. Vakhala wira nlelo munoophutuwa n'uthowa naasi, n'unyakulasa, n'uvaanyihana, ni wira siiso, huh-uh, khamurina hata...Khamukhanle wuncererya eyo, 'okhala wira khenrowa wuncererya. Munnona? Khenrowa opharaana. Khamwaakhanle ookuxa nipattuuxa na mphira, moosuwela,

khimupharihela nipattuuxa na yuuma. Khenivara etthu tu. Nnari, ehaana okhala yoowoolowaseya, siiso ntoko mphira siry'awe. Munnona? Nto waamini wanyu ni wiisumaaliha wanyu wakhalaru enamuna emosaru ya wiisumaaliha wa Eroho Yowarya Owo aarin'awe, nto onoopharaana ni Yoowo. Nyuwo munincerereya mwa yeeyo.

Ikuru sanyu sakhalaru ntoko ikuru Sawe, nto enimuncerereya mwa yeeyo.

²²⁸ Ankhili anyu yakhalaru ntoko ankhili Awe, “Miyo kinoorwa wira otthuna Wanyu, O Muluku.” Munnona? Ni Masu a Atithi, Owo aahimuxintta khula xetwani. Erimu n'ilapo ya vathi sinoomala, masi Masu khammala. Munnona? Mwakhalanaru enamuna yeeyo y'ankhili, awo anoopharaana ni waamini wanyu.

²²⁹ Mwakhalanaru wiisumaaliha w'ekeekhai, ntoko Owo saarin'awe, onoopharaana. Mwaahikhalane, ephiro y'eriyari paahi yoopakiwa ni mutthu, ekupalelo ya naanaano, wala wiisumaaliha, “Oh, kaahaana waavaha nlaathuma, masi—masi khino vanreerela kiihiire, 'okhala wira awo pooti ohela nsina naka xornaaleni mwaha wa yeeyo.” Eyo kehiyo enamuna yo wiisumaaliha Owo onihimy'awe. Muheererye wuncererya yeeyo. Khenivara etthu. Masi mwaaweryaka vekeekhai, ni osivela wa mmurimani mw'anyu, omulevelela khula mutthu, wiimaaliha, ohicala, moone, nto enoopharaana. Munooverya wuncererya yeeyo mwa waamini wanyu. Whish!

²³⁰ Khivanxankiha ekereja okhalaka yoohaleela. Kahi yeeyo? Khivanxankiha. Miyo kaamwiira, “Murukunxe murima mpatisiwe, Bibilia ohimnye wira, ni Nsina na Yesu Kristu.” Vano na Oraaru mmosa oowuuma murima ohinaamini iyo, aamwiira, “Nwanani a Kristu uwo a khalayi. Owo ti a Nsina na Yesu. Owo ti Yesu Paahi.” Mwiikasoope, mmiravo, nkinsuwela enihimya wiisumaaliha wanyu naanaano va. Munnona? Muhinrweelani, wira, “Nrowe nitthokelele yeela vamosa, Munna Branham. Kaatthuna kiiwe Yeela etaphuleliwaka”? Munnona? Vano n'urwa n'uwiriyana Yeeyo. Vano nto munimooniheriwa voowooneya, vano nto nyuwo munoorowa; hiyo nino—hiyo ninoophiyerya yeeyo mwa minuutu vakhani, mwa “othunku,” moone. Masi nyuwo mwa—nyuwo mwaahiwahaweheke, munatthuna otuphela khula mmaliheryo, huh-uh, kahi—kahi yeeyo. Munnona? Nlelo khamurina wiisumaaliha wa mBibiliani mwiirakaruru siiso; moota wo waakhula. Vano mwakhalanaru sothene iya, munooverya wuncererya yeela mwa waamini wanyu.

²³¹ Vano, nuumala yeeyo, ya neexexe, muntthuna wuncererya ovilela mwa waamini wanyu. Mwakhalana waamini, “onivaha ovilela,” Bibilia t'ohimnye. Munnona? Tivo, nno ovilelaa. Vano, eyo t'itthu enttharelana enrowa oteka mukhalelo ola. Moosuwela, Muluku ookhalana ikaruma s'ekeekhai Vampani Vawe.

232 Munnoona moota nnihaleel'ahu, munna mulopwana, muthiyana? Munnona? Munnona mwaha wa xeeni, vatthu vary'ahu-vo? Ayo, mulopwana. Munnona? Hiyo nookhalana ovuwa, nookhalana onyakula n'itthu siiso, okhala wira nookhalana waamini. Masi naaphiyeryaka itthu iya *va*, Muluku khokhanle ooniteka mwa mukhalel'owo. Munnona? Khokhanle. Owo khokhanle ooniteka mwa enamuna eyo y'opuro. Hiyo nookhalana itthu sothene iya sikina. Hiyo ninoomora, ninootheneya ni yeeyo. Munnona? Owo khokhanle ootekaka Ekereja Awe.

233 Ovillela n'ixeeni? Enamuna xeeni y'ovilela? Yoopacerya, okhalana ovilela ni Muluku. Mwakhalanaru waamini, w'ekeekahi wooloka, munookhalana ovilela w'ekeekhai wooloka, okhala wira waamini onivaha ovilela. Muluku ahimya etthu p'itthu, nyuwo munimwaamini. Ti yeeyo tu. Mookhalana ovilela.

234 Muniira, "Ahe, miyo koomuvekela Owo nsana ohiyu wira akivonihe, nave kinoowereiwa siisaale voosiis'ula." Oh, wulu! Ovillela xeeni?

235 Muluku aamuhimenrye Abrahamu, vano vaviraly'aya miyaakha miloko miili ni mithanu khiyaakhanle hata eneneeryo. Owo nlelo aanaamini. Owo aari oovilela ni Muluku. Uh-huh.

236 Mmuhele Owo ohoolo wanyu okathi wothe. Mmuhiye Owo akhale ole ontharelana ohoolo. Nyuwo muhikhaleke ohoolo Wawe, vano mmuheleke Owo ohoolo wanyu tu. "Owo ohimnye siiso, nto enoorowa wiiraneya." Munnona? Mmuhele Owo ohoolo wanyu. Ti yeeyo.

237 Nowe aahikhalana ovilela. Ayo. Nowe aahikhalana ovilela, w'ekeekhai wa nttittimiho. Muluku iirale, "Kinrowa ohonona olumwenk'ula n'ipula," nto Nowe khulaleerya miyaakha emiya ni miloko miili, nlelo. Ovillela woowaatta. Nnakhala okame khiwamonre okhuma Wirimu. Khiyaakhanle hat'etthu. Ntthupi paahi ntoko saatonko aya okhala, mwa miyaakha emiya ni miloko miili, masi owo aahivilela.

Nto, Muluku onneererya ovilela wanyu. Ti yeeyo. Muluku onimweererya seiyo.

238 Owo nuumala omuhimeerya Nowe, vano Owo iirale, "Nowe, kintthuna wira mukelele ohoolo nvolowe mukalawani. Kinrowa waakeliha axinama memmo, nto Miyo—Miyo kintthuna wira nvolowe. Nwele osulu, vano, wira nweryeke oweha vate, vacanelani y'osulu. Vano, Miyo kintthuna wira nvolowe mmo. Kintthuna wira mwaaleele atthu ala, 'Meelo, ele kikhanly'aka kilaleyaka miyaakha emiya ni miiloko miili, enoorowa wiiraneya.' Vaareera, murowe vathi vale mwaaleele."

239 T'ivi yaari ethoonyeryo yoopacerya? Nowe aavolonwe mukalawani. Khiyaakhanle hata epula. Nowe aahiilikanyiha, khuwara ekhasako y'epula, n'itthu sothene, wira oweryeke

oweha vate, imaara kamosa-kamosa. Khulikana. Masi mmeeloni mwaya. . .

²⁴⁰ Kookupali wira siiso owo aahimeryale amusi awe, ni awar'aya axaan'awe ni othene aya, wira, "Oh, wulu! Meelo munrowa wona etthu emosa muhinatoko anyu wona. Okhala wira, osulu wothene, onrowa okhala wooriipa-wo. Nto etari n'uverunya sinrowa okhumelela. Xoowa muulupale a Muluku onrowa okhera erimu. Owo onrowa ohukhumu nikhuru nla n'anatampi ninikhoontte, mwa miyaakha iya emiya ni miloko miili. Nyuwo nwehe paahi moone." Munnona?

²⁴¹ Alipa-oowaamini kamosa-kmosa eeriari, moosuwela, yaathomeiye vale nave khuhikhalakhala evolowaka, moosuwela. Nyuwo—nyuwo nlelo mookhalana yaawa, moosuwela. Vano awo—awo yaarimoorwa, khwira, "Ahe, khino mutokweene ole aahikhalana exariya, vano hiyo ninoorowa nalipelele mahiku vakhani, wala nalipelele iwoora vakhani voosiisu, nto noone."

²⁴² Mmeeloni mwaya, ohiya meeku ooriipa, va ninoorwa nsuwa niphattuwaka ntoko niirak'aya okathi wothene. Nowe khuweha vate. Khwira, "Hey, khanikhanle hata neeku."

²⁴³ Mmirav'ole khurwa, khwira, "Ah, kaahisuwela wira nyuwo mwaari mmosa a yaawo. Moone, mwiithomeiye weno nno."

²⁴⁴ "Ahe, mukilevelele, mulopwana. Ha-ha. Khino miyo—miyo—miyo paahi, moosuwela, kaarookuxiwa murima paahi, moosuwela. Ntoko, moone. Ha-ha-ha."

²⁴⁵ Masi, Nowe, owo aahivilela. Khwira, "Vakhala wira kherwiye olelo, enookhala vaava meelo." Mwaha wa xeeni? Muluku ohimnye siiso.

"Owo ooleenleni liini yeeyo, Nowe?"

²⁴⁶ "Miyaakha emiya ni miiloko miili sivinre. Kihoorwa mpakha va, tivo kinoowehererya paahi va vano." Munnoona yeeyo? Nuuvira okathi vakhani. . .

²⁴⁷ Hiyo ninniphwanya wira, Muluku oophiya mpakha va, olipelelaka Ekereja, nave, masi Eyo enookhala iwe. Muhixanke. Owo oomuhimya natiri a Yeeyo.

²⁴⁸ Koowehererya okathi ula wothene ohihimuwa. Onookhala. Muhixanke. Muluku oohimya. Nwehererye n'uvilela paahi. Mwarupa vale, eyo kheni. . . Nyuwo pooti orupa vakhani ohinatthi wiiraneya, masi munoovenya okathi uwo. Owo oohimya, moone. Orupa vakhani, moone, ele hiyo eniihan'ahu orupa vakhani w'okhwa, moosuwela. Ele eniihin'ahu okhwa, orupa vakhani paahi, ahiso orupa mwa Kristu. Khekhanle etthu iyo ntoko okhwa mwa Kristu. Ekumi n'ukhwa khasikhanle vamosa. Munnona? Hiyo ninoorupa vakhani paahi, orupa vakhani axipatthan'ihu ahinwery'aya oniihana. Owo ti Mmosa paahi onwerya wiihana. "Owo onimwiihana, nto miyo

kinoomwaakhula,” ohimnye ti Yobi. Yobi onoorupa vano mwa miyaakha ikonto xexe. Muhixanke. Owo ono—owo onoovenya. Muhixanke. Owo nlelo onoolipelela.

²⁴⁹ Nowe aahilipelela. Nihiku naneexexe khuvira. Hata epula. Vaareera. Enoorowa wiiraneya.

²⁵⁰ Kinniwerya omwiiwa Muhano Nowe orwa ni wira, “Paapa, nyuwo muri o- . . .?”

“Muhilavuleke siiso.”

²⁵¹ Owo aahivilela, ’okhala wira aahikhalana waamini. Ayo, mulopwana. Owo aahikhalana ikuru. Owo aahikhalana osuwela wira Muluku aahikhalana exariya. Owo aahikhalana wiisumaaliha. Owo khaalavunle vooanariwa, iiraka, “Ahe, nkisuwenle yothene ela mwaha wa xeeni. Koopwetexa osuweliwa waka wothene iwe.” Nnari, nnari. “Atthu khancaliwa-tho ni miyo. Kinookhumela vate vale kapacerye sothene, vasya.” Nnari, nnari. Owo aahikhalana ovilela. Muluku oohimya. Muluku onimwiira. Muluku onimwiira, okhala wira Muluku ohimnye siiso.

²⁵² Ni kinniwerya omoona mwan’awe orwa, wira, “Paapa, moosuwela . . .” Wookola ntata ovaravara maihi awe oorakama oottweelela, moosuwela. Vano owo aarina miyaakha emiya, moosuwela, okilanthene vale. Khwira, “Koosuwela wira nyuwo mwa tiithi mutokweene. Miyo—miyo kinnoothentani, paapa. Masi khivaakhanle ooweryaneya wira mwaaroonya vakhani?”

“Oh, nnari. Nnari.”

“Mwaha wa xeeni?”

“Muluku ohimnye siiso!”

²⁵³ “Ahe, paapa, ala mahiku mathanu na mosa hiyo nikilanthi ahu osulu nno. Nikilanthi ahu mukalawani mu yuulupale, ya khalayi, yoowuuma nikilanthi ahu mu. Ni yothene ti yoomariwa, muhina ni vate. Ni hiyo nookhala miyaakha iya sothene nitekaka. Ni nyuwo mwaaneemela vale n’ulaleerya, mpakha okhala oottweelela ni nantari. Nto va muri osulu nno vano, mutthunaka ohimya etthu *khata-khata*. Vano atthu anootheyasa, ni arihelelaka ixuwaari soowuntta n’itthu siiso oloomoni wa yeela. Nkawehani vo eniir’anyu. Vano, moosuwela . . .”

“Mukhale oovilela, mwan’aka.”

“Mookupali?”

“Enoorowa orupa epula!”

Mwaara a mwan’awe khwira, “Paapa, moosuwela . . .”

“Enoorowa orupa epula!”

²⁵⁴ “Masi nookhala miyaakha iya sothene, nilipelelaka. Nookhala niitthokihaka. Ni munileenle wira enoorowa orupa epula, yoovira esumana. Vano hiyo nri mu, ni mikhora sothene

ti soowaliwa, nto va hiyo nnimweetakasa mpuwa mu, ni nsuwa nivihaka sana ntoko naary'aya.”

“Masi enoorowa orupa epula!”

“Munsuwela sayi?”

“Muluku ohimnye siiso!”

255 Vano mwaphiyerya siiso, muncererye. Masi mwaahikhalane siiso, muhe—muheererye wuncererya. Khenrowa ovara etthu. Khenrowa ovara etthu mwa ovonihiwa. Khenrowa ovara etthu mwa hat'etthu ekina. Munnona? Ehaana otakanxana n'ekaruma yemosaru epharihelaniw'aya. Ti yeeyo. Muhaana wuncererya yeeyo. Ovillela ni natiri a Muluku. Ayo, mulopwana. Nowe aahaamini. Ni aahikhalana ovilela ni Muluku, miyaakha emiya ni miloko miili.

256 Moise, aahikhalana ovilela ni Muluku. Ayo, mulopwana. “Moise, kihiiwa wiipulela w'atthu Aka. Kinnoona ohaawa waya. Kikhuruwenle wira kiwoopole. Miyo kinrowa woorumani orowa.”

257 Nto ovirikana vakhani waakhanle vale owo ni Muluku, nto Muluku khumooniherya ovuwa Wawe. Khwira, “Kinoorowa va.” Vamanly'awe wona ovuwa wa Muluku omosa, moone, owo aahaamini.

Khwira, “Exeeni iyo mmatatani mw'anyu, Moise?”

Owo khwira, “Ttootto.”

Owo khwira, “Mmurihele vathi.”

Khuthatuwa enowa. Owo khwira, “Oh, wulu!” Owo khupacerya . . .

258 Khwira, “Mmuttotte, Moise. Vakhala wira kinniwerya omutatuxa khukhala enowa, kinniwerya otatuxa-tho.”

259 Ah! Amen! Vakhala wira Muluku onniwerya okivaha ekumi y'erutthu, Owo onniwerya okivaha Ekumi y'erooho! Vakhala wira Muluku aahiwerya okivaha oyariwa woopacerya, Owo aamuwerya okivaha Oyariwa wa neili! Amen! Vakhala wira Muluku onniwerya ovoniha *ela*, n'uvoniha wa Muluku, Owo onniwerya ovenxa-tho wa ovuwa Wawe, nihiku nookiserya. Eyo ekeekhaii.

260 “Miyo kinniwerya omurihela ttootto ola vathi khuthatuwa enowa. Kinniwerya omuttikiherya-tho okhala ttootto. Nvare omwiilani.”

261 Moise khuurama khikuxa. Aari vale, ttootto. Owo khupacerya wuncererya ankhili vo. Munnona?

“Mulattu xeeni ni ntata nanyu, vano, Moise?”

“Hat'etthu.”

“Muhele vatthirima vanyu.”

262 “Vaareera. Ankhi. . .” Nootteela ni makutthula. “O Pwiya, nkawehani ntata naka!”

“Muttikiherye vatthirima vanyu, Moise.”

263 Owo khuttikiherya *siisaale*, nlo khikhuma ntoko. . .Owo khupacerya wuncererya seiyo *sa*, nto, moone. Ayo, mulopwana.

264 Owo khuphiya iwe. Nto evirikanelo yoopacerya. . .Owo khuphiya iwe. Khikhuma iwe khwira, “Apwiya Muluku ahimye wira, ‘Mwaahiye atthu Aka erowe.’ Farawo, kintthuna musuwele ela. Miyo kihoorwa ntoko murummwa a Muluku. Muhaana okiiwelela.”

265 Farawo khwira, “Wiiwelela? Munnisuwela miyo k’ani? Miyo ka Farawo. Owiiwelelani nyuwo, epottha?”

266 Khwira, “Munookiiwelela, ahiiso munoopweteya. Munimwiira emosa-emoso entthun’anyu.” Mwaha wa xeeni? Owo aanisuwela aahimy’awe. Owo aahikhalana muteko. Owo aari iwe. Owo aahilavula ni Muluku. Owo aanaamini. Owo aanisuwela vaary’awe.

“Muntthuna wira kiwiiweleleni? Khumani vo!”

“Kinoowoonihani.”

“Mukooniherye ethoonyeryo.”

Owo khimurihela ttootto vathi; khuthatuwa enowa.

267 “Vano,” owo khwira, “ethepyelo eyo ya maxintta awo yookhweya! Rwani nno minuutu mmosa. Rwani nno, Yane, nyuwo ni Yampere, mwaarihele attootto anyu vathi.” Awo khwaarihelasa vathi, vano awo khuthatuwa enowa.

268 Khwira, “Vano, munikirweela n’itthu, yookhweya nno, mw’Ejitu, farawo a wEjitu. Nto munoorwa va ni ethepyelo anyu emosa yookhweya ya maxintta, n’uthepya wanyu,” moosuwela, osoma muupuwelo. Moosuwela enihimy’aka. Kinroromela wira munnisoma eyo. “Othokosa sa muupuwelo wala etthu siiso, moone, ayo, munoorwa va n’itthu siiso.” Khwira, “Ahe, hiyo ninniwersa wira etthu emosaru muniir’anyu.”

269 Moise iirale sayi? Owo khiirale, “Oh, Mwenye Farawo, muki—mukilevelele, mulopwana. Kinookhala epottha anyu.” Nnari, mulopwana.

270 Owo aarimweemela khumaala. Amen. Mukhale vaavo. Muluku oohimya, hata ohoverya tu mmurimani mw’awe, “Mukhale oomaala. Kinoowoonihani etthu emosa.” Nyuwo mwiiraru voolikana-ene etthu Owo ohimmy’awe wira mwiire, khunakhala ntoko eroovonyeya; mukhale oomaala, mukhale oovilela.

271 Moise iirale, “Moosuwela, okathi waaheleny’aka vamulipiheryoni vale, waahikhala ovilela vale, vano kinooplelela koone etthu Muluku enrow’awe wira.”

272 Vo saahikhala inowa iye, siipurulaka, sinseelaka, soopelanaka muturi emosa n'ikhw'aya. Naanaanoru, enowa ya Moise khwira, "Khwiryu, khwiryu, khwiryu," khumirya sothene iye. Owo aahivilela.

Ale anaawehererya Apwiya, annincererya
ikuru saya,
Annivava ni mapupha ntoko murumasi.

Eyo ekeekhai? Munnona? Ayo.

Anootthyawa ehikhulumuweke, animweetta
ehooceyeke.

Moone, mwaalipelele Apwiya paahi. Mukhalane ovilela. Munnona? Ayo, mulopwana.

273 Vano Isarayeli aarowa okumihiwa. Evirikanelo yuulupale khurwa, vano Moise khulipelela.

274 Vano owo khuvolowa mothakoni. Owo mukwaha wa mahiku oophiyaka mararu wala maxexe paahi. Saari paahi ikilomo miloko mithanu na mosa ni xexe okhuma vaakumanne awe vale, vaavale vene yaakumanans'aya-tho. Masi, Moise, mothakoni, khulipelela miyaakha miloko mixexe. Ovilela. Amen. Ti yeeyo. Owo aahilipelela miyaakha miloko mixexe. Oh! Ayo, mulopwana.

275 Ni hiyo naahaana ovilelana mmosa ni mukhw'awe, nave. Munnona? Emaara emosa... Hiyo khani—khaninreere okhala oohivilelana mmosa ni mukhw'awe. Hiyo ninoona wira nihaana okhala ntoko Moise. Moise aanaavilela atthu. Nkawehani, ti yeeyo yaawiiirinhe awo ohivira erowaka epantte ekina. Munnona? Nyuwo mwaatthunaka wira etthu...

276 Ntoko, siniilipihaaka wira kiwiirihe atthu wiiwa Mutthak'ola otapernakulu, wira khula mutthu a mutapernakulu akhale *Yoola*. Ti yoolipa wira. Kinniilipiha wira kikhale oovilela; iya miyaakha miloko miraru ni miraru. Munnona? Mukhale oovilela. Athiyana nlelo anoomettha ikharari saya, nlelo vamosaru. Masi mukhale oovilela paahi. Munnona? Kinoovilela paahi. Olipelela. Kihaana. Mwaahikhalane, muheererye oteka vasulu va yeela vathi *va*. Mukhale oovilela.

277 Hata emaara emosa, okathi nikhuru nle n'atthu oohiiwelela yaakhalanx'aya oohivilela, yaahimwiiriha Moise wira etthu yoohiloka. Masi, nlelo, vaphiyenry'aya wooniheriwa, Muluku aahiphweeleya mwaha wa soowiira saya. Owo khwira, "Mwiivalaanye, Moise. Kinimwiiva nloko nothene n'awo, kipacerye nsya."

278 Owo khwiihela v'ephakani, khwira, "Muluku, muhiire." Exeeni? Waavilela atthu yaari oohiiwelela emuvirikanyaka yoowo.

279 Kaatthuna kisuwele sinto hiyo naamuwerya wira yeeyo? Mwaahiwerye, muheererye oteka vasulu va *yeela*, 'okhala

wira khe—khenivirikana, moosuwela. Ti siiso ele yoopacerya yaary'aya yophariheliwa mwa *yeela*, ni ti siiso khula emosa wa seiyo erin'aya ophariheliwa. Mwaahikhale, khamuniphiyerya mukhalel'ole wa nipuro n'okhala na Muluku mukumi, mwaahikhale oovilela, ovilelana, mmosa ni mukhw'awe. Vaareera.

²⁸⁰ Aana aHeperi yaahivilela. Vekeekhai, awo yaahivilela. Muluku aahaamanela natiri, aahaahimeerya wira, "Muhuuramele hata elatarato." Masi awo yaahivilela. Khwira, "Muluku ahu onniwerya. Masi, nnakhala vo, khaninrowa wuuramela elatarato anyu." Ovilela, asuwelaka ela, wira Muluku onoomuvenxa-tho mahiku ookiserya.

²⁸¹ Ekumi ila khenihimya vanci-ene, mwa sothene. Munnona? Muluku onoovenxa-tho mahiku ookiserya. Masi vakhala mwaha wo wuuramela elatarato, khaninrowa wira. Vano, hiyo ninoomuvaha Kesari eri ya Kesari, masi, vaaphiyeryaka Kesari wiikeliha mwa Muluku, Muluku t'opacerya.

²⁸² "Muluku iirale, 'Muhuuramele elatarato ele.' Nto miyo nkiniira. Muluku ahu onniwerya onoopola. Owo aahinoopole, nkinkokhorela elatarato."

Khwira, "Vaareera, ttukuttha t'ule vale."

²⁸³ "Ahe," owo khwira, "oh, kinoona wira, enoorupa epula yinci-ene ohiy'ula ni enoomuttihiya." Masi khayiireiye. Nlelo oovilela.

²⁸⁴ Voosiisu aya, okathi aruuhasiw'aya mpwaro, Napukutonosoori aakilanthe memme. Owo khwira, "Vaareera, amiravo, moolikana wira mukuupuwele wira miyo ka mwene anyu?"

"Vekeekhai. Mukhaleke wa mahiku othene, O mwene."

"Vano muuramele elatarato aka."

"Oh, nnari."

²⁸⁵ "Ahe, munoorowa opahiwa. Nyuwo mwa asuweli. Nyuwo mwa aankhili. Munnikhalaka mukhaliheryo muulupale wa hiyo. Munnikhalaka eparakha wa omwene ahu. Khamunwerya wiiwa sana wira nkinthuna wira yeela? Masi miyo—miyo koopaka elaleeryo va, vano ehaana wiiriwa. Miyo nkinthuna woorihelasani mme. Oh, axilopwana, exeeni eniwiirani?"

²⁸⁶ "Kooosuwela wira enniweya oratteene. Masi, Muluku ahu onniwerya onoopola. Masi nnakhala vo . . ." Yaahivilelasa.

²⁸⁷ Khupaceryasa omuwela rampha. Mmosa khimuweha mukhw'awe. "Sothene ti soolikana. Vaareera." Yaari oovilelasa. Khweetta nivalo nimosa, Muluku khaakhanle vale. Mavallo maili, Owo khaakhanle vale. Mavallo mararu, mavallo maxexe, mavallo mathanu, khukhala erowasaka paahi, Owo nlelo khaakhanle vale. Vano khweetta akelasaka muttukutthani mwa mooro. Awo yaarooovilelasa. Masi Owo aari memme.

Munnona? Waakwanyale mooro waaphiyerya paahi, wira opahe mikhoyi saatthukaniw'aya matata ni inawu. Vano nto vanyakenly'awe vathi va ttukuttha, Owo aari memme. Munnona? Awo yaahivilelasa.

²⁸⁸ Daniyeli enamuna emosaru. Daniyeli aahivilela. Vekeekhai. Owo khaarowa ohiyererya. Nnari, mulopwana. Owo iirale exeeni? Owo aahunle icanela iye khulompa, khula enamuna. Yaari yootthuna ya Muluku. Owo aahivilela. Owo aahimulipelela Muluku, asuwelaka wira Muluku aaniwerya omaliherya Masu Awe. Awo khimurihela mulittini mw'akharamu, khwira, "Nnimwaahiya akharamu wira yookhuureni."

²⁸⁹ Owo khwira, "Vaareera." Owo aahivilela. Mwaha wa zeeni? "Ahe, miyo koomulipelela okathi ula wothene, Muluku. Vakhala wira kihaana olipelela-tho miyaakha ekonto emosa vakhani, kinoohihimuwa-tho nihiku nookiserya. Tivo, koovilela, koolipelela."

²⁹⁰ Paulo aahivilela. Vekeekhai aahivilela. Nkawehani etthu Paulo aarin'awe wira. Olavula mwaha w'ovilela!

²⁹¹ Ankhi atthu apentekosite? Vaamanly'aya orummwa, "Mulipelele mpakha," moone, "mulipelele mpakha waakhela Owerya." Mpakha liini? Awo khiyaakohanse, "Mpakha liini?" Awo yaarina yoowaakhula paahi, "Mulipelele mpakha."

²⁹² Awo khuwelasa iwe khwira, "Vaareera, amiravo, khino minuutu muloko ni mithanu okhuma vano Eroho Yowarya enrowa okhala mwa hiyo nto ninoorowa okhalana muteko ahu." Minuutu muloko ni mithanu khuvira, hata mutthu. Nihiku nimosa khuvira, nnari; maili, mararu, maxexe, mathanu, mathanu na mosa, mathanu na maili.

²⁹³ Khino amosa-amosa a awo yiirale, "Hey, khamunaanyiheryasa wira nihaakhela?"

"Nnari, nnari, nnari, nnari." Ti yeeyo. Nnari. Ti yeeyo.

²⁹⁴ "Vanreerela mukhumase, amiravo." Xetwani khwira, "Nyuwo—nyuwo—nyuwo moosuwela wira muhaakhela etthu enthun'anyu. Murowaseke, mwapacerye muteko anyu."

²⁹⁵ "Nnari, nnari, nnari. Khinnatthi waakhela, nlelo. Okhala wira, Owo ohimmye wira, 'Enimoorwa, ele yaarowa wiiraneya mahiku ookiserya: Kinimwaalavulela atthu ala ni moolumo ookukuma ni ilavulelo sikina, nto nno ti Omumula Miyo ohimmy'aka,' moone, Yesaya 28:19." Khwira, "Ela ti—ela ti Yeeyo, nyuwo—nyuwo munimwaakhela Yeeyo okathi. . . Vano, hiyo ninoosuwela Eyo yarwa vale. Hiyo ninoosuwela Eyo yarwa vale. Hiyo ninoosuwela, 'Natiri a Atithi.'" Owo khulipelela iwe mahiku mathanu na maxexe. Vano nto nihiku nanamuloko, "Hiyo naari weiwe." Awo yaahivilelasa, wira elipelele.

²⁹⁶ Vano, nyuwo mwakhalana enamuna yeeyo y'ovilela, nuumala Muluku woovahani natiri vano nyuwo khunamoona

mBibiliani, “T’awaka,” vano mulipelele. Nto, mwakhalana enamuna yeeyo y’ovilela, muncererye mwa waamini wanyu. Nto munnoona moota munwel’anyu osulu vano? Nyuwo munoorwa osulu *nno* vano. Vaareera. Moono wa eroroco onoorukurerya, nave, kahi siiso? Vaareera. Vaareera. Muncererye yeela mwa waamini wanyu.

²⁹⁷ Okathi wothene omuhela Yoowo ohoolo wanyu, muupuwelaka, wira ti Yoowo ohimye. Nkihiyo miyo, kihimye. Kahi pastore, ohimye, wala Munna Neville. Kahi mulaleyi mukina, ohimye. Kahi namukuttho wala paapa. Kahi hata mutthu a elapo ya vathi. Ti Muluku omuhimye natiri, nto Muluku onniwerya omaliherya sothene Owo ohimye’awe. Vaareera. Mwakhalana enamuna yeeyo ya waamini, osuwela wira ti Muluku omuhimye natiri! Mwiire, “Munna Branham, kinoowereiwa. Kintthuna kivonihiwe naanaano.” Mwaakhele. Eyo ti yoovaha evahiw’anyu, ayo, mulopwana, mwaaweryaka waamini. “Ahe,” nyuwo muniira, “Kinnaamini.” Vano muliyale. Ti yeeyo tu. Yoomala. Munnona?

²⁹⁸ Mukhale oovilela, vakhala wira munnivilela. Mwahikhale, munoopwanyulasa Emp’ela va, moone. Enoopwexakasera yothene vathi, etthu emosa yeeyo. Muhaana okhalana eyo. Mhincererye, okhala wira, eyo enoopwexakasa emp’anyu mwaahikhale oovilela, mwaahikhalane ikuru wira muncererye mwa waamini wanyu onihimye’anyu wira mookhalana. Ni mwaahikhalane hata waamini, vano munatthuna ohela ikuru mwa yoowo, enoohonona waamini wanyu. Munnona? Nyuwo muniira, “Ahe, vano, nwehererye minuutu mmosa. Khino yothene ela ovonyaa, khula enamuna. Khino Muluku kahi Muluku. Khino khokhanle hata Muluku.” Moone, enoopwexakasa etthu ene ipantte piili. Munnona?

²⁹⁹ Masi mwakhalana waamini wooloka, vano muhele ikuru sooloka mwa yoowo, nuumala ankhili ooloka, nuumala wiisumaaliha wooloka, nuumala ovilela wooloka. Munnona? Munoowela murowaka muliinyani. Vaareera.

³⁰⁰ Ya neethanu, muncererye othunku. Oh, wulu! Othunku onimuncereriwa-vo. Othunku enihimya exeenii? Koowehaweha mwa atisionaariyu axexe wala athanu nto nkiwenrye hata ophwanya etthu yaahimye’aya. Vookiserya, kaari owanny’awe Munna Jeffries iwe, hiyo khuphwanya mu—mutisionaariyu. *Othunku* enihimya “okhala ntoko Muluku.” Oh, wulu! Vammal’anyu okhalana waamini, ikuru, ankhili, wiisumaaliha, ovilela, vano mukhale ntoko Muluku. Wish!

³⁰¹ Nyuwo muniira, “Nkinwerya wira eyo, Munna Branham.” Oh, ayo, muniwerya.

³⁰² Mukihiye koosomeleni Soolempwa kamosa-kamosa va, minuutu mmosa paahi. Matewu 5:48. Ninookuxa yeela emosa noone etthu enihimye’aya, Matewu 5:48, ni noone vakhala

wira muhaana okhala ntoko Muluku. Moosuwela wira Biblia onihimya wira, “Nyuwo mwa amuluku.” Yesu ohimnye siiso. Mwaha wa xeeni? Ikuru sothene, sothene siri mwa Muluku, siri mwa nyuwo. Matewu 5:48, “Mukhale. . .” Yesu alavulaka, mareerihho.

*Tivo mukhale ooreerexa murima v-o-o-m-a-l-e-l-a,
(Exeeni iyo?) voomalela, ntoko Atith'inyu. . . ari wirimu
sir'yaya ooreerexa murima voomalela.*

³⁰³ Nyuwo moowela osulu nno vano, muhinatthi ovekeliwa wira yeeyo. Itthu iya sothene sihaana wuncereriwa toko. Vano okathi oniwel'anyu mpakha nno, Owo ohoovekelani vano okhala ooreera murima voomalela, oothunku, aana alopwana n'athiyana a Muluku. Ti yeeyo. Itthu kavi kaakhanly'aka ohimiyaka wa yeeyo!

³⁰⁴ Nrowe nikhunle mwa aEfeso 4, nto niwehe va etthu, muLiivuruni mwa aEfeso, enihimya mwaha w'etthu yeela, nave, mwaha wa moota waatthuneya hiyo—moota waatthuneya hiyo wira. aEfeso, kapiitulu 4, opacerya eversiikulu 12. aEfeso 4, opacerya eversiikulu 12. Vaareera. Nrowe nipacerye osulu nno eversiikulu 11.

*Nave yoowo tthiri ohaavaha atthu akina, okhala
arummwa; akina okhala, maprofeta; . . .*

³⁰⁵ Munnuupuwela nsana ohiyu? Muheererye okuxa muteko wa mutthu mukina. Munnona?

*. . . nave akina, olaleya ehapari yooreera; nave akina,
mukukhula. . . nave akina, awiixuttihi;*

³⁰⁶ “Wira omulikanyiherye Muluku”? Enihimya siiso? [Muthukumano oniira, “Nnari.”—Mol.] Olikanyiheriwa wa exeeni? [“Masantu.”] Masantu t'ani? Ale ooreerihwa. Amen. Ale apacerye okhuma vathi va.

*. . . aalikanyiherye masantu, wira evareke muteko
(muteko wa Yesu Kristu), w'oteka erutthu ya Kristu
(w'oteka, w'ovenxa Yeeyo, oteka): mpakha. . .*

*Mpakha hiyo othene okhalana mwiwanano mmosa
wo waamini, ni. . . n'umusuwela Mwaana a Muluku,
nikhalaka atthu ookhomaala, mpakha nrromelo, (oh,
wulu), niphiiyeryaka mukhalelo woomalela wa Kristu:*

³⁰⁷ “Omalela,” entthuneya othunkuu. Muhaana wuncererya mwa waamini wanyu, othunku. Moone, munipacerya vathi va, ni ikuru. Vano muniphiiyerya ankhilii. Nuumala muniphiiyerya wiisumaaliha. Nuumala muniphiiyerya ovilela. Vano muri m'othunku. Othunku! Oh, wulu! Okathi ahu onoomala. Nrowe noone. Masi moosuwela etthu enihimya othunku. Nyuwo munniipaka esipo ela:

Okhala ntoko Yesu, okhala ntoko Yesu,
 Vathi va kinniwehererya okhala ntoko yoowo;
 Makhalelo othene okhuma vathi mpakha
 Movuwani

Kinvekela okhala ntoko Yoowo paahi.

308 Owo t'okhanle othunku. Okathi Owo aamaniw'awe epantte emosa wa nlaku, Owo aahirukunxa nikina. Okathi waapwapweliw'awe, Owo khaalavula. Owo khaaviruwa attikihaka. Munnona? Oothunku, okathi wothene aphavelaka etthu emosa, "Miyo okathi wothene kiniira ele enaasivela Atithi." Munnona? Ayo, mulopwana. Okathi wothene. Owo t'okhanle othunku. Munnona?

309 Vammal'anyu orwa mukhumaka *va*, mpakha *va*, mpakha *va*, mpakha *va*, mpakha *va*, vano nyuwo munoorwa ophiyerya mukhalelo woomalela vano wa mwaana a Muluku. Masi muhaana okhalana *ela*, muncereryaka sothene *iya*, ni khamunwerya hata opacerya mpakha mukhalane *ela*.

310 Vano muupuwele ntthokolo ni mapururu a mulalampi. Muhiliyale nenlo. Munnona? Muheererye wuncererya eyo mpakha vekeekhai myariwe vasya. Okhala wira, nyuwo, khenrowa ovara etthu, ni nyuwo—nyuwo khamunwerya wiiriha eyo ovara muteko. Enoophiyerya *ela*, wala *ela* va, nto enookomowa nipuro nlo.

311 Masi mwaphiyaru *va*, epompa yooloka yooyariwa vasya, vano khamunincererya hat'etthu. Eyo enoowuncereryani nyuwo, moone, enoorwa ewelaka, vaareera, ekelaka mwa oreera voomalela vano. Vaareera.

312 Vano, ya neethanu na mosa, nrowe nincererye, Bibilia oohimya va, wuncererya waaphenta axinna...oreerelana murima w'axinna. Vano, eyo t'ile yooreera, vaava va, ya neethanu na mosa, thanu na piili. Vaareera. Wuncererya oreerelana murima w'axinna. Vaareera. Hiyo naphiyeryaru yeeyo, oreerelana murima w'axinna, wihela nipuro nawe, mwa mwaha. Vano nyuwo muniira. . .

313 "Munn'aka okitthekenle," ohimnye ti Petru. "Kimulevelele," owo iirale, "vathanu na vaili khula nihiku?"

Owo khwira, "Vathanu na vaili waattiha vaara miloko mithanu na miili." Munnona?

314 Oreerelana murima w'axinna. Vano, moone, munna mmosa akhala ootapaneya, muhikhale oomuviruwela. Munnona? Nnari. Munnona? Mukhale oomureerela murima. Murowe, khula enamuna.

315 Ookhala iirale, woohikhala khalayi, iirale, "Munwerya sayi waamini itthu iya ntoko sinaamini anyu, nave nlelo munarowa w'Asempelaya de Deus, ni wa maUnisista, ni othene aya akina?" Vano muhele, moone, oreerelana murima w'axinna.

Munnona? Munnona? Niroromelaka yeeyo, nihiku nlo, moone; ovilela ni yoowo, moone; owiisiinanela, nvilelaka ni yoowo; ankhili, wira musuwele etthu enaamini awe, muupuwele, eyo eri mmurimani mw'awe, ti yeeyo ory'awe; ikuru, mwa nyuwaano, wira mooniherye eyo ni oreera murima, wiimaaliha, wa yoowo; mwaaminiki wira nihiku nimosa Muluku onoomukeliha. Munnona?

³¹⁶ Oreerelana murima w'axinna, etthu ya neethanu neili. Emosa, piili, tthaaru, xexe, thanu, thanu na mosa, thanu na piili. [Munna Branham onthoonya vakwaaturu vara vathanu na vaili—Mol.] Moone, etthu ya neethanu neili. Nto, vano, munimoorwa.

³¹⁷ Etthu enttharelana, nto, muncererye ophenta, nri niphento. Nlo ti nluku n'omaliherya. Nimosa wa mahiku awo, mukereja . . .

³¹⁸ Vano, xontte, esuweliwe mufiitani, ni mapuro othene makina, nkiniixuttiha ela ntoko mwiiixuttiho, enrow'aka ohimya vano. Masi kintthuna kiwooniheni paahi wira, ni mukhaliheryo wa Muluku, etthu ekhanle vekeekhai, wira, Bibilia oopacerya Muluku aamulempy'awe aari Sotiiyako osulu. Ompacerya ni harusi. Ommalela ni Leo kharamu. Nto kaphiyerya-ru Ekanyeryo ya Neethanu na mosa ni ya Neethanu neili, munoosuwela, okathi Ekanyeryo eyo ekina yaataphuliw'aya, nlepa na Sotiiyako wa nipuro nlo aari kanseri, ehopa yo wiikimanya. Nto owo p'ukathi wa kankuru onikhal'ahu vano, wowuupululiwa. Nto etthu yoottharelana Ekanyeryo ekhenry'aya, yaamoonihenrye Leo kharamu, Orwa wa neili wa Kristu. Owo aarwiye, emaara yoopacerya, wa harusi; Owo onoorwa, voottharelana, Leo kharamu. Kinooruuha ela wa . . .

³¹⁹ Vano, nkisuwenle sinto kinoorowa okhalana okathi voosiis'ula. Kinoorowa wiilipiha vanwery'aka, wira kiwooniheni wira mavalu ala ari mupiraamiteni, voolikane-ene, Bibilia a neili Muluku aamulempy'awe. Enokhi aahaalepa, khwaapweha mupiraamiteni.

³²⁰ Vano aneeraru, Muluku okathi wothene ommalela mwa tthaaru, vano Owo khwiikhaliha Mmansawe Masu Awe.

³²¹ Va, vano, muupuwele, mupiraamiteni. . . Kookupali wira anci-ene a nyuwo anakhotto n'itthu mwaahikhala wEjitu. Epiraamite kherina ekhuneelo vasulu. Khenakhalaneneke. Nlu—Nluku na Scone, ni itthu sothene sikina awo arinas'aya, masi nlelo . . .

³²² Mwakhalana epaphelo ya toolare mpeesani mw'anyu, nwehe epaphelo eyo ya toolare, nto munoophwanya wira, epantte ya moonoo woolopwana, yookhalana xawawe ni epantera ya wAmerika. Ni ehimmwe wira, ekanyeryo "ya Estadu Unidu." Epantte ekina, erina epiraamite, ni nluku nuulupale n'ekhuneelo ni niitho na mutthu. Nto epantte ela enihimya, "Ekanyeryo yuulupale." Ahe, vakhala wira ola muttethe muulupale, mwaha

wa zeeni ekanyeryo ela yuulupale ohikhalanaka ekanyeryo ene ya muttethe? Muluku onnaakhaliha onamoona, hata wira anrowa yayi.

323 Miyo kaalavula ni meetiku mmosa emaaara emosa, nto owo aamukipwapwela, mwaha wa ovoniha wa Muluku. Neemenle mphironi. Owo khwira, “Mwenye Branham, nyuwo munaatepanya athu paahi.” Khwira, “Khokhanle ovonihiwa, onikhala ni mameetiku paahi.”

324 Khwiiraneya wira kaaroorukunuwa, khoona ekanyeryo awe vakaaroni, yaahikhalana enow’ele vamwirini. Miyo khwira, “Vanreerela mukumihe-vo ekanyeryo vakaaroni vanyu, nto, okhala wira ekanyeryo anyu yeenyu ennikhala xaahiti wira Muluku ti Mpenuxa.”

325 Tothoro eekeekhai onnaamini iyo. Akina t’anamawoka awo. Ayo, mulopwana. Enowa vamwirini! Moise aathomeiye enowa vamwirini. Owo iirale, “Miyo k’Apwiya anvoniha iretta sanyu sothene.” Vano awo yaaweha enowa yeele, wira ephwanye ovonihiwa wa Muluku. Vano nlelo awo anlavula evirikanyaka yeeyo; nnakhala vo ekanyeryo aya ennikhala xaahiti yaavirikanyaka. Wish!

326 Nno, elapo ahu, ehimyaka itthu awo akhanly’aya, ni etheyaka itthu iya, ni musurukhu aya, musurukhu aya, onnikhala xaahiti wira ekanyeryo ya olumwenku wothene ti Muluku. Munnoona niitho nlo nri vo vasulu vaya, vapapheloni va etoolare eyo? Eyo ti ekanyeryo yuulupale.

327 Eyo khenaheliweke vasulu v’epiraamite. Awo khiyaawerya osuwela sana mwah’aya. Nluku n’omaliherya nirookhoottiwa, Muru, Kristu. Masi Nlo nmimoorwa, nihiku nlo.

328 Vano, m’otekani, ikuru. . . Oteka emp’ela yuulupale, oteka mukhalel’ola, moone, onipaceriwa ni nluku n’olipiherya; waamini, ikuru, ankhili, wiisumaaliha, ovilela, othunku, oreerelana murima w’axinna. Vano eyo eniirani? Nto iyo sinwehererya Nluku n’omaliherya, okhanle ophenta, maana Muluku ophentaa. Ni Owo onneetiherya, ni Owo t’ori ikuru sa khula emosa wa itthu iya. Eyo ekeekhai. Ayo, mulopwana.

329 Vaava *va*, vaava *va*, munoona wira kookhalana, mpuwa, miteko iya sothene mu, nto va anoorwa mawimpi ala makhaani. Exeeni iyo? Eroho Yowarya ekhuruwaka, mwa Kristu, moone. Eroho Yowarya! Eroho Yowarya eri vasulu va yothene *ela*, epharihelaka vamosa, etekaka (emosa exeeni?) Ekereja emosa yoolikana voomalela, wira Nluku n’omaliherya nimaliherye Yeeyo.

330 Exeeni tho epakiwe? Ehooniheriwa mwa Okathi Mithanu na Miili wa Ekereja, ni anamitthaka athanu n’aili a Ekereja.

331 Epacenrye ottuli *nno*. Ekereja epacenrye okhalihwi yayi? Ti yayi Ekereja ya pentekosite epacenrye’aya okhalihwi? Ni Paulo

Oowaarya, oEfeso, ettheneeri ya Okathi wa Ekereja y'Efeso, wEfeso.

³³² Okathi wa neili wa Ekereja waari Smirna. “Ikuru.” Irinewu, mulopwana muulupale aakhalihenrye Ehapari yooreera ya Paulo.

³³³ Okathi woottharelana wa Ekereja waari Perkamu, aari Martin. Martin aari mulopwana muulupale aari oolipa. Paulo, Irinewu, Martin.

³³⁴ Vano oTiyatira khurwa Columba. Munnuupuwela? Ela eri va, yookwerethiwa vaavale *vale*. Columba. Nuumala Columba... Vale Okathi w'Epiphi khukela.

³³⁵ Vano khurwa Sarti, enihimya *ookhwa*. Lutero. Aleluya! Exeeni nto? Exeeni enoorwa nuumala Sarti, Lutero?

³³⁶ Vano khurwa Filatelfia. “Othunku.” Wesley, oreera murima! “Naxariya onkhala mwaha wo waamini,” ohimnye ti Lutero. Oreerhiwa ni Wesley.

³³⁷ Nuumala khukela oreerelana murima w'axinna, ni Lawotiseya. Nto hiyo ninnaamini Mutthaka muulupale wa orwa wa neili w'Eliya, nihiku nookiserya, onoovela elapo.

³³⁸ Iya siri va, Okathi Mithanu na Miili sa Ekereja, mavalo mathanu na maili. Muluku atekaka Ekereja Awe, ori ntoko mutthu mwa mutthu mmosa, mwa yoowo Mwaneene. Ovuwa, Owerya wa Muluku, orwaaka mwa *yeela*, opharihelaka Yeeyo vamosa. Tivo, atthu aPentekosite yaahin'ye aya aLuterano, yaahin'ye aya aWesleyano n'itthu, ahinsuwel'aya etthu anihimy'aya. Moone, awo yaakhanle epantte *ela* y'empa. Ti siiso, atthu kamosa-kamosa aniwel'aya osulu siiso n'umora. Masi yookhala epantte yooloka ya yeeyo, entthikela yirihaka emp'eyo okhala. “Miyokoohokoloxa,” anihimya t'Apwiya.

³³⁹ Munnuupuwela *Mwiri Mwaakameliwa*? Munnuupuwela elaleeryo mwaha wa *Mwiri Mwaakameliwa*? Awo arookhuura Owo mpakha vathi, masi Owo khuvakulela. Awo khukhalana irintta sa miromolelo; Owo khuvakulela. Awo khuvenxa ekereja ekina, irintta sa miromolelo; Owo khuvakulela. Masi murima wa Mwiri uwo khutthikela wunnuwaka. “Nto okathi wa makaaripi onookhala Waarya.” Munnona? Owo p'ukathi onrw'awe Kristu, Eroho Yowarya. Yesu onookhuruwa khwiikhaliha Mmansawe Vamuru va Ekereja nto, vano Owo onookhimuxa Ekerej'ela, ekhanly'aya Erutthu Awe Yoowo. Mpuwa *mme* ti muri Erutthu.

³⁴⁰ Nto enamuna Muluku onweherery'awe hiyo wunnuwa ntoko mutthu, t'inamuna Owo oruhaly'awe Ekereja Awe wira yinnuwe. Khula okathi wa Ekereja, Eyo enikhala Ekereja emosa yuulupale. Munnona?

³⁴¹ Atthu *ala* khiyaavekeliwe ele akhanle atthu *ala*. *Ela* khiyaavekeliwe ele yaary'aya *ela*. Munnona? Masi Owo oovenxa Ekereja Awe enamuna emosaru. Owo oovenxa Yawawe—Ekereja

Awe enamuna emosaru Owo onaavenx'awe atthu Awe. Vano Petru va oniira, yoopacerya, itthu thanu na piili: waamini, ikuru, (moone, oroowela), ankhili, wiisumaaliha, ovilela, othunku, waaphenta axinna, wuncererya oreerelana murima w'axinna, vano nto ophenta wa Muluku. Eroho Yowarya, Kristu mwa omutthu wa Eroho Yowarya, onoorwa wa nyuwo, mwa opatiiso w'ekeekhai wa Eroho Yowarya, vano nyuwo munikhalana maneema othene ala ootthittiwa mwa nyuwo. Vano, Muluku onikhala Mpaani, enihaniwa Empa, Empa ekumi ya nipuro n'okhala na Muluku mukumi.

³⁴² Okathi mutthu onikhalan'awe itthu ntoko iya, vano Eroho Yowarya enoorwa mwa yoowo. Voohicala, khino nyuwo munnilavula ilavulelo, nyuwo pooti otakiherya khula yoovaha Muluku orin'awe. Nyuwo pooti wira siiso. Masi mpakha maneema ala *va* okela mwa nyuwo, nlelo muri ota, wa mulipiheryo w'ekeekhai wa waamini. Masi okathi maneema ala aninnuw'aya, ni nyuwo khuncererya eyo mwa yeeyo, vano nyuwo mwa empa yuulupale ekumi. Nyuwo mwa esanamu ekumi, eneetta.

³⁴³ Masi, moosuwela, apa—apakawu, annikokhora ohoolo wa muluku eethiru, muluku oowaakanyereriwa. Ni mwa enamuna emosa yoowaakanyereriwa awo anaamini aya wira muluku oowaakanyereriwa onnilavula owaakhulaka. Eyo epakawuu. Eyo Eromaniisimu. Awo annikokhora ohoolo wa khula enamuna ya santu n'itthu sothene sikina. Vano awo aakhalana Cecilia Oowaarya, muluku eempa, n'itthu sinci-ene soohiyana-hiyana siiso. Awo annuuramela yeeyo, ni vekeekhai annaamini yeeyo mwa enamuna yo waanyiherya. Etho—ethoonyeryo xeeni, ya Muluku mukumi eekeekhai.

³⁴⁴ Masi okathi hiyo, kahi mwa enamuna yoowaanyiheriwa, masi naakokhoraka ohoolo wa Muluku mukumi, ekuru ekumi, ankhili akumi, ovilela okumi, othunku okumi, Owerya okumi onikhuma wa Muluku mukumi, ennimukhaliha mutthu mukumi elatarato ekumi mwa mukhalelo wa Muluku. Owo oniira exeeni? Itthu imosaru Yesu iir'awe; weetta ntoko Owo seett'awe, ovaraka itthu imosaru Owo aavar'awe. Okhala wira, kehiyo etthu yoowaanyiherya. Yookhala ekeekhai enooniherya.

³⁴⁵ Munnoona enihimy'aka? Munnoona moota maneema ala, ikaruma iya s'otekela empa, sinlikan'aya n'anamitthaka a Ekereja, ni okathi wa Ekereja? Vano, nimosa wa mahiku awo, ninrowa okuxa khula nimosa wa moolumo ala, nisome, ni nooniherye wira enniliherya. Yothene enrowa vamosa. Vekeekhai. Munnona? Oh, wulu! Moota ery'aya yooreerexa, moone, wona etthu eyo—etthu eyo eniir'aya.

³⁴⁶ Vano, eyo t'Impa Muluku onikhal'awe-mo; kahi empa erina esiinu yuulupale vasulu vaya, ni namukattha oorakama. Munnona? "Masi Nyuwo mookuupela Erutthu," Erutthu Muluku

onwery'awe okhala-mo, Muluku onwery'awe weetta-mo, Muluku onwery'awe woona-mo, Muluku onwery'awe olavula-mo, Muluku onwery'awe ovara-mo muteko. Amen! Ekaruma ekumi ya Muluku, Muluku eettaka ni manawo maili, mwa nyuwo. Ovuwa! "Mavalo a naxariya aneettiheriwa ni Muluku," Muluku eettaka mwa nyuwo. "Okhala wira nyuwo mwa ipaphelo soolempwa, sinisommwa n'atthu othene." Vano Ekumi eri mwa Kristu yakhala mwa nyuwo, nyuwo munimooniherya Ekumi Kristu oonihery'awe.

³⁴⁷ Ntoko sinihimy'aka okathi wothene. Mukumihe ephwamwaasi mmwirini mwa peeseku, nto vaakhanle wira mwaamuwerya othamiha, muhelaka, mmwirini mwa masa, mwiri wa masa waamwiima ipeeseku. Vekeekhai. Vekeekhai waamwiima. Hata wira irintta saya sinkhala ntoko exeeni, sookhalana ephwamwaasi muhina mwaya, moone, wala onakhaleru mwiri ti mwiri. Munnona? Enikumihya ekumi aya vamwirini va masa, mukuxe eyo yothene, nvahe—nvaherye ephwamwaasi, muyeeherye okhuma vamwirini va peeseku mukelihaka mmwirini mwa masa. Exeeni enikhumelela? Khunrowa wiima-tho ipeeseku. Munnona? Nnari, mulopwana. Khunrowa. Vakhala wira ekumi ya mwiri wa peeseku enikela mmwirini mwa masa, kiireke, khenrowa wiima-tho masa. Enimwiima ipeeseku, moone, moone, okhala wira yookhalana ekumi muhina mwaya.

³⁴⁸ Ahe, niiwehe yoohi, nihikhanle hat'etthu woohikhala marapo a mutakhwani, oothipelela, moone, ni khekhanle hat'etthu wa hiyo, okhala wira hiyo othene nihookhwa mutampini ni sootheka. Hiyo othene nri mwa mukhalelo yoola. Vano nto hiyo, mmansihu, ninoowerya okokhona mmansihu, niivahereryaka, mpakha Muluku okuxa mpompe Awe w'ovaherya, Nsina na Yesu Kristu, 'okhala wira, "Khinaavo hata Nsina nikina vathi v'Erimu mwa nenlo mutthu okhanly'awe owoopowa-no," ni ninthamiha Ekumi ya Kristu nikelihaka mwa hiyo. Nto ninookhalana enamuna *yeela* ya waamini, waamini Kristu aarin'awe. Nto waamini wa Kristu khuwaattharihela aFarisi ale, wala aSatukhi, wala mwa miyaapu saya, ipirikha, ni makapu, ni wiirapiha waya. Waari woolipa mwa Masu a Muluku, amen, vanci-enexa, mpakha Kristu aary'awe Masu, Masu khwiipaka erutthu. Vano nto okathi onwery'ahu okhala oovaheriwa voomalela ni Owerya Wawe, wira nikhwe wa muupuwelo ahu, nto waamini wahu onikhala waamini wooloka, aleluya, vano Ekumi ya Kristu ninoovaheriwa hiyo. Hiyo ninkhala soopattuxiwa sikumi sa Muluku, nipuro n'okhala vaavo Eroho Yowarya ekhanly'aya ooveleliheryaka iparakha saya soohakalaliha vo, vano hiyo nri mwa mukhalelo wa Kristu.

³⁴⁹ Yesu ohimnye wira, "Khelempwe? Nyuwo mukilamunle Miyoy, kiiraka, 'Miyoy ka Mwaana a Muluku.' Khelempwe, wira,

‘Nyuwo mwa amuluku.’ Ikano sanyu khasinihimya yeeyo?” Ntoko Moise, ntoko Eliya, ntoko maprofeta ale yaakhalaxa vakhiviru ni Muluku, mpakha Muluku wiithamiherya okelaka mwa yaawo. Ni awo khiyaalavula, mmansaya, masi Muluku. “Muhivelavele n’itthu enrow’anyu ohimya, ’okhala wira kahiyo nyuwo munlavula. T’Atithi ankhala mwa nyuwo; Awo t’anlavula.” Masu Aya kahi a yoowo mwaneene, okhala wira, ekumi awe, owo ohookhwa.

³⁵⁰ Okathi mutthu onikhw’awe, enikumihwa ephome awe, oniheliwa paalasamu. Mulattu ene okhala wira, anci-ene a awo kxanaheliweke paalasamu. Yakumihwa-ru ephome mwa mutthu, owo onimookhwa. Vano etthu emosa paahi eniriwa ottikiheriwa ephome ekina mwa yoowo; owo onookhala-tho mukumi. Nyuwo mwaahikumihwa ephome awe.

³⁵¹ Nto vano hiyo noohela-mo Ephome ya Yesu Kristu, moone, nto eyo eniruuha waamini wa Yesu Kristu, ikuru sa Yesu Kristu, ankhili a Yesu Kristu, wiisumaaliha wa Yesu Kristu, ovilela wa Yesu Kristu, othunku wa Yesu Kristu, oreerelana murima w’axinna wa Yesu Kristu, ni mphento wa Muluku, okhanle Yesu Kristu. Owo t’okhanle Muru ni oniweettihani. Vano inawu sanyu ti mapotto, waamini. Amen! Aneettihiwa ni Muru, entthuneya e . . . ? . . . Eyo eri vo. Vo ti vari mutthu oomalela a Muluku, okathi onikhalan’awe maneema ala.

³⁵² Vano, Muluku, onooniherya Ekereja Awe ntoko Mwaakameliwa, muthiyana. Muluku onooniherya Ekereja Awe ntoko Mwaakameliwa. Nto enamuna Owo onimuruuh’awe khula mutthu okhala mwan’Awe, wira okele muhina mwa Mwaakameliw’owo, Owo nave-tho oomuruuha Mwaakameliwa moovirani mwa okathi ula, [Munna Branham onikwannya vakwaaturu vawe imaara thanu na piili—Mol.] mpakha Owo oruuha Ekerej’ela yoomalela mwa *yeela*.

³⁵³ Inawu saka sinnittikinyeya. Mwaha wa xeeni? Okhala wira muru aka t’onihimya siiso. Vano, khasinwerya ottikinyeya ntoko ntata naka, okhala wira iyo inawu saka. Lutero khonwerya wira itthu hiyo siiraly’ahu, hata aMetotista khanwerya, okhala wira awo yaari etthu ekina. Munnona? Inawu sineetta okhala wira muru ohimnye siiso. Nto muru nnakhala khoniira, “Vano, inawu, mukhale ntata. Niyaru, mukhale maitho.” Munnona?

³⁵⁴ Masi, khula okathi, Muluku oohela itthu iya Mukereja mw’Awe, ni oolikanyiha ooniheryaka wira khula mutthu ookhalana iya, ookhalana mireerelo iya. Nto Mutthu *ula*, okathi onimalel’awe, ti Ekereja ya Muluku enrowa Okuxiwa. Nto mutthu *ula*, ni oomalela, ti murumeyi a Muluku, Mukereja mwa Muluku, yoowo onrowa Okuxiwa. Ovuala! Munnoona enihimy’aka? Eyo eri vo. Vo ti vari etthu ene yoomalela.

³⁵⁵ *Va* aahirwa mulopwana mmosa, Paulo, ahelaka mulipiheryo. Irinewu khupacerya oyeeherya *ela* mwa yeeyo. Ole ootharelana

khuyeeherya *ela*. Ole oottharelana khuyeeherya *ela*. Ole oottharelana *ele*, *n'ile*, *n'ile*, ni siiso mpakha ophiyerya okathi wookiserya. Masi exeeni iyo? Eyo Eroho emosaru.

³⁵⁶ Eroho emosaru enikhala mwa miyo, eniira, “Matata, muphiyerye mwah’ole.” Eroho emosaru eniira, “Inawu, mweette nivalo.” Munnoona enihimy’aka?

³⁵⁷ Vano, mukhalelo wothene w’omutthu anyu onirummwa ni oneettihiwa n’itthu seiya, masi khonkhala wooweettihiwa voomalela mpakha owo okhalane mireerelo iya voomalela.

³⁵⁸ Mwaahinto wiiwa yeela? Vano mukihiye kooleleni ila. Ni mukhale sana. . . Nwiriyaane *ela* sana owaruni wanyu. Munnona? Ekwirinti ti yoolipaxa vanluteni vava nootteettheyaxa. Eyo ekeekhahi. Khenkhala yoolipaxa ovikana vanluteni vava nootteettheyaxa.

³⁵⁹ Hata wira olipa xeeni sitekiw’aya *iya*, etekiw’aya *ela*; yakhalanaru nlutte nootteettheya, ti vaavo enikwasey’aya-vo. Ni kahi yoolipa ovikana nlutte nle nootteettheya. [Munna Branham onihimya etthu okwerenth’awe vakwaaturu vawe—Mol.] Vano nyuwo mwakhalana, muniira mookhalana *ela*, *ela*, *ela*, khamurina *ela*, ti vaavo enikwasey’aya-vo. Mwakhalana *ela*, khuhikhalana *ele*, eyo enikwaseya vaavo vene. Mookhalana *ela*, khamurina *ele*, enookwaseya. *Ela*, nave khuhikhalana *ela*, enookwaseya. *Ela*, nto khuhikhalana *ela*, enookwaseya. Munnona? Ni mwaahikhalane. . . Khamunwerya okhalana *ela* muhikhalanne *ela*.

³⁶⁰ Vano mwavahererya mukhalelo anyu wothene, nto Eroho Yowarya enoomwaraxeya mwa nyuwo, mwa maneema ala, vano nyuwo mw’empa ekumi. Nto atthu anooweha ni wira, “Ole mutthu oosareya nneema, ankhili (ole onnaamini Masu), wiisumaaliha, ovilela, othunku, oreerelana murima w’axinna, oosareya mphento wa Eroho Yowarya. Moone, ole ori vale, eettaka.” Exeeni iyo? Mukhalelo alipa-oohaamini anweh’aya ni wira, “Vale ookhala muKristu. Vale ori mulopwana, wala muthiyana, onsuwela etthu enihimy’awe. Khamunamooneke mutthu ooreera murima, oosivela, ni oothunku.” Nyuwo moothittiwa ekanyeryo. Ekanyeryo enooneya ipantte soopiili. Vakhala wira munoorowa wala munimoorwa, ekanyeryo enooneya vamosaru. Eyo eri vo. Munnona? Okathi mulopwana wala muthiyana onikhalan’awe *ela*, vano Nluku noomaliherya ninookhuruwa khwaatthitta naakelihaka Momweneni mwa Muluku, ekhanle Eroho Yowarya.

³⁶¹ Vano Masu, anikhuma *Nno*, animwiisooniherya Mmansaya mwa khula mmosa w’atthu ala, moone, n’umukhaliha Mutthu ula oomalela Empa ya Muluku mukumi, ethoonyeryo, y’oKristu mukumi weettaka. Ele aari Kristu, atthu awo anikhala yeeyo, okhala wira Ekumi Awe eri muhina mu. Awo ari mwa Kristu. Ni ekumi aya ti yookhwa ni yoosukiwa vamosa ni Kristu, mwa

Muluku, ni ootthittiwa ekanyeryo memmo ni Eroho Yowarya. aKorinto Oopacerya 12. Eyo ekeekhaii. Munnona? Nyuwo muniisoona okhala ookhwa, nto muniyariwa mwa waamini. Nto ikuru n'itthu iya sikina sinimwincereriwa mwa nyuwo mpakha nyuwo okhala ooloka voomalela, elatarato ekumi ya Muluku. Kahi yooreerexa?

³⁶² Vano nto Muluku, mwa yeeyo, ooruuha nave Okathi Mithanu na Miili wa Ekereja, wira ooniherye iyeetelo thanu na piili Owo oruhaly'awe, omuupaka mutthu Awe ailattanihaka Yoowo, Owo ooteka Ekereja yoomalela ailattanihaka Yoowo. Nto woohihimuwani, Erutthu ila yoomalela enoohihimuxiwa wira ekhaleke ni Yoowo mahiku othene, okhala wira ti Mwaakameliwa. Munnona? Tivo eyo ennithikila wa khula okathi, khula okathi orwiye.

³⁶³ Nto ennivekeliwa vanci-ene, muupuwele. Munnuupuwela ele Paulo ohimmy'awe mu mwa aHeperi 11? Mukihiye paahi koosomeleni etthu nihinatthi omaliha va, minuutu mmosa paahi. Nto vo nyuwo...Eyo enniwiirihani woona etthu yootikiniha okathi miyo...okathi wothene, onsom'aka ela. Kinrowa waakuxa aHeperi 11, kinrowa opacerya eversiikulu 32.

Nto vano, *kihimye-tho exeeni? nkirina-tho okathi woohimya sothene sa Kiitiyoni, . . . sa Parakhi, ni . . . Sansoni, ni . . . Yefite; . . . Davidi . . . ni Samuweli, . . . sa maprofeta:*

Yaawo mwaha wo waamini yaahikuxa ilapo, yaaheettela exariya, yaahiphwanya ithu saaroromelihiw'aya, yaahitthuka iyano s'akharamu,

Yaahittipiha owali wa mooro, yahitthyawa wiwiwa ni xoowa, ni mwa olosowa khukhala atthu oowerya, owana mukhottoni khwaatthyawiha, khwaaxintta . . . anakhotto amalapo.

Athiyana yaahiwaakhela atthu aya yaakhwiye yaawo yaahihimuxiwe khuphwanya-tho ekumi: . . . akina yaahivira moohaaxiwani, yaahihaaxiwa, ekhontte-ene woopoliwa vathi va; wira ephwanye ohihimuwa wootepa oreera:

³⁶⁴ Vathi vaava va. Munnona? [Munna Branham onihimya etthu okwerenth'awe vakwaaturuni wawe—Mol.] Vaareera.

Nto akina yaahihaawa . . . yaahiveehiwa . . . yaahimaniwa, nave, akina . . . yaahitthukiwa . . . khuriheliwa mukhatteya:

Yaahivonyiwa ni maluku, yaahiikitthanyiwa eriyari, yaahehereriwa, yaahiiviwa ni . . . n'axoowa: akina yaaneetakasa nno n'iwe ewanre-ene isapala sa ipwittipwitthi ni sa ipuri; ekhalaka oothoiwa, ni elupatthiwaka, ni ehaaxiwaka;

(*Awo khiyaaphwanela vathi va:*) . . .

365 Moone, muparentesini mmo, mooweha mBibiliani mw'anyu.

. . . *yaahivira mutakhwani, ni mmiyaakoni, ni mukhukuni ni mmittuphani sa elapo ya vathi.*

. . . *othene ala, yaarina onamoona wooreera mwaha wo waamini, . . .*

366 *Va!* [Munna Branham onihimya etthu okwerenth'awe vakwaaturu vawe—Mol.]

. . . *onamoona wooreera mwaha wo waamini, khiyaakhenle yaaroromelihiw'aya: (Munnona?)*

Okhala wira Muluku oonilokiherya etthu yooreera yuulupalexa, wira awo ahireerihwe voomalela hiyo nihikhanle.

367 Munniwa? Atthu ala akhwiiye, *mu*, anlipa ni anniwehererya hiyo. Tivo, Ekereja *ela* ehaana ophiyerya oreera voomalela, wira eruue ohihimuwa. Ni awo ari vathi, minepa siri vathi valtaari, siwehereryaka Ekerej'ela ophiyerya oreera Waya woomalela, wira Kristu aarw'aka.

368 Nto Ekerej'ela, moone, enikhala ekhaanixa, mwa oyeva. [Munna Branham onihimya etthu okwerenth'awe vakwaaturu vawe—Mol.] Eyo ti yoorikexa ovikana eyo, masi vekeekhai eri wira nilepe mwiikimany'ole vale, moone. Yoophiyerya okhomoni wa sikano. Mpakha, Ekereja, yooyeva, ehaana ophiyerya nipuro mpakha okhala enamuna emosa ya muteko *ela* ehin'ye aya, okhala wira, okathi Nluku nla noomaliherya ninhokolow'aya . . .

369 Nookhalana munyatta mwaamukhaani *va*, vaavo ninrow'aya wiitikitherya vaavo vene, vapiraamite y'ephattu. Kahi ettiyelo paahi enikhala vasulu. Mukaano mwaamukhaani, ni ohaana wiitikitherya vaavo, okhala wira t'oniviriha maasi.

Nto okathi onrw'aya, Ekerej'ela ehaana othokoliwa.

370 Sothene iya, maluku makina vapiraamite, atikitheriwe voolikane-ene mpakha vahinweryaney'aya oviriha nimetho eriyari aya, anilemela itonelaata, anipwehiwa mme. Avenyihiwe sayi, awo khansuwela. Masi sootekiwa.

371 Nto osulu *nno*, okathi Ettiyele y'epiraamite enrwa'aya, epiraamite Ene, Erutthu ya Kristu ehaana othokoliwa. Kahi eyaaminelo paahi wala mwixuttiho, wala etthu ekina nivinry'ahu-mo. Ehaana okhala yoolikana voomalela ntoko Kristu, mpakha, okathi Owo onirw'awe, Owo ni mutek'owo sinrowa otthukwana orateene. Munnona? Nto onimoorwa Okuxiwa, orowa Owaani.

372 Nkawehani vatthu vanikhal'ahu vano, mwa Lawotiseya, vaavo ekereja yaary'aya okathi wa ekereja wootepexa waatonko okhalaniwa. mBibiliani, hiyo nimphwanya wira, waari okathi

mmose-ene wa ekereja Muluku aary'awe ota wa ekereja, omanaka mukhora, otthunaka otthikela ovolowa mpaani mw'Awe yoowo. Iyaaminelo ni miromolelo saaroomukumiha Owo mukereja mw'Awe mwene. "Mwiiweke, Miyo kiri vamukhora khiyamana nsele. Akhala onivoliwa ntthona khukihulela mukhora, Miyo kinookela mpaani, kinimoolya ni yoowo." Munnona? Ela eri va, okathi *ula* wa ekereja. Awo yaaroomukumiha Owo vakhani-vakhani, mpakha *va* awo omukumiha Owo voomalela. Awo khantthuna okhala nnaata ni Yeeyo.

³⁷³ Vano nyuwo munnoona olelo otthu onrow'ahu. Hata waamalaka Okathi wa Ekereja ya Lawotiseya ekhanly'aya yookhaleleya, mpakha eyo ni Ekatolika, ekawannye eyo *va*, enootakanxana ni waataana ntoko ekereja emosa yuulupale. Ni mwaataano wa ikereja, eyo emosaru ntoko Ekatolika.

³⁷⁴ Eri evirikanelo emosa paahi, awo yawerya-ru paahi oxintta eyo, eyo ti waakhela ekomunyawu. Eyo t'itthu emosa paahi mutiyoseese, eni—eni—enimaliha waataana w'Ekatolika ni Eprustante, enamuna ya ekomunyawu. Ekereja Katolika enihimya wira, "Eyo erutthuu." Vano ekereja Prustante enihimya wira, "Eyo enthoonyerya erutthu." aKatolika anipaka emiisa ni yeeyo. Emiisa, yeeyo, awo anaakhel'aya ekomunyawu, eroromelaka wira annileveleliwa. aPrustante anaakhela ni waamini, emuxukhuruku Muluku, mwa ekomunyawu, wira aaleveleliwa. Prustante onihimya wira, "Nooleveleliwa." aKatolika anihimya wira, "Ninniroromela wira nooleveleliwa." Emiisa ni ekomunyawu. Awo aniihana emiisa; hiyo ninihana ekomunyawu. Emiisa enroromela wira ti siiso. Ekomunyawu t'usuwela wira ti siiso, ni omuxukhuru Yoowo mwaha wa yeeyo. Munnona? Nto eri etthu emosa paahi awo ahinkhalel'aya oowiiraana. Awo anoolakiherya eyo.

³⁷⁵ Oh, enikhala yooreera sana. Eyo enimwaataana, wira elamule...Eyo eni—enoolamula sothene...Ahe, Bibilia ohimnye wira, "Vano maxeni ala yaahinvaha namuttompe owerya waya," moone, awo yaarimwaataana. Munnona? Siiso ntoko Bibilia sihimaly'awe wira yaamwiira, awo anniira vano. Eyo yoopacera wiiraneya, esumana ene yeela. Kahi wira kookhalana etthu yoowaanyokha atthu aKatolika, nnakhala tu n'atthu aPrustante.

³⁷⁶ Nyuwo aMetotista ni aPatista, ni anci-ene a nyuwo aPentekosite, okathi ikereja sanyu sikenly'aya muhina wa mwaataano ola wa ikereja, awo arine-ene empa yuulupale anikelihiwa anookhwa etekiwe iwe oNova Yorke, ya mwaataano owo wa ikereja, eyo etthu emosaru ntoko Wiiraana wa Ilapo n'itthu. Awo aneererya waatakanxa aPrustante othene vamosa.

³⁷⁷ Vano, aKatolika aasuwela eyo, ni anrowa omuruuha Paapa ola Yohani miloko miili ni tthaaru, ahiso miloko miili ni

piili, onakhaleru pani. Owo oneererya, mwa enamuna emosa yo wiiwelela, ni yoowiiyeviha, waaruuha othene a waamini w'ePrustante ni waamini w'eKatolika wira okhale waamini omosa, siiso ntoko Bibilia saahimmy'awe wira yaamwiira. Eyo eri vo. Vano aPrustante erweelaka yeeyo, coolo, mukhoyi, ni eciywitta.

³⁷⁸ Mwaha wa xeeni? Mwaha wa xeeni? Okhala wira awo kharina itthu *iya*. *Ankhili*, "Masu aakhalana exariya." *Ovilela*, "Ale anaawehererya Apwiya." Munnoona enihimy'aka?

³⁷⁹ Ntoko piixipu ule mMetotista saahimmy'awe nihiku nlo, okathi yeemereriw'aya yeeyo. Nto khula mutthu onnisuwela eyo, moota, exeeni yuupuxerinhe eyo, ophavela okhalana nivekelo khata wira niiriweke mukereja, wala muxikola. Ni yaatthuna o...Kinoona wira yaari eliivuru ya mavekelo y'ePrespiteriyaano, wala etthu ekina, vano axitiithi khuvekela e—e—exikola okhala wira awo khiyaarowa okupali nivekelo nla wiiriwa oxikola. Vano piixipu ula mMetotista aari mulopwana mmosa humu musuweli, owo khuvenya khwira, "Yoovonyeya." Khwira, "Eyo khentthariha malamulo." Owo khuttottela mureerelo ittheke iyo. Owo khwira, "Ntoko mukereja mwahu Metotista," owo khwira, "mukereja mwahu Metotista," khwira, "atthu ahu anci-ene okathi wothene anlavula mwaha wa okwattula wa Hollywood, ni ipursento miloko mithanu na mixexe ni thanu a yaawo annirowa wona mwa khula enamuna."

³⁸⁰ Mulattu ene xeeni? Awo aroohiya *ela*. Eyo ekeekhaii. Awo aroohiya yeeyo.

³⁸¹ Miyo kaalavula vaava va mpaani muumu, nihiku nlo, ni mu—mu—mukhulupale mmosa a emosa wa ikereja suulupalexa Metotista siri Epooma Falls, emosa wa ikereja Metotista sookhalexa s'erooho siri Epooma Falls. Enooniherya, wira okathi wa Metotista onrwa ottharaka okathi ahu iwe, wa Pentekosite. Vano owo khwira, "oSt. Louis, Missouri, awo yaaroothokosa, miyeeri soophiyaka miraru wala mixexe khalayi, khuphwanya." Mulopwana ene yoowo siiso okilanthi-ene vaava voosiis'ula. Ahe, owo ti mulipa-ooteka onteka ela, onnilakiherya empa hiyo. Main Street Methodist, oniir'awe mpantta, weiwo Munna Lum n'akina yaary'aya mapastore. Tivo nto hiyo ninniphwanya wira, mwa yeeyo, kinaamini aka wira ipursento miloko mithanu na miili n'itthu y'atthu a Metotista mwa othokosiwa, wira, waavya wa oSt. Louis, woonihenrye wira ipursento miloko mithanu na miili n'itthu s'atthu aMetotista yaaninvura soona, ni ipursento miloko mithanu na mosa a yaawo anniwurya soowurya s'alikoro. Mmetotista! Vano etthu yootikiniha yaari, okathi sihimmw'aya soothokisiwa, wala waalikeliwa wa alopwana n'athiyana; athiyana, yaari ipursento miloko mithanu na miili, miloko mithanu na miili n'itthu, ipursento soophiyaka miloko mithanu s'alopwana. Athiyana anci-ene anninvura soona ni

anniwurya waavikana alopwana. Ipursento miloko mithanu na miili, miloko mithanu na miili n'itthu, yaahikhala athiyana anci-ene waavikana alopwana.

³⁸² Vano ankhi naarowenle Mwiixuttiho wa mBibiliani wo waawara akaputtula, n'umettha ikharari, n'itthu siiso, moone, ni vaavo othunku, athiyana anihimya okhala oothunku n'ureera murima? Maira a iturufu n'itthu sothene sikina, oothaala mwaano, oolavulasa pure, ehiweryaka ophurela nlumi naya. Nlumi naya elavulasaka ethaalaka mwaano, ni yiiraka siiso. Ankhi alopwana? Maira a iturufu, a musewe a kolfi, ekhumaka ewanre-ene ikuwo nuusu n'erutthu, soonanarasa, n'athiyana aithomeiye ene vale. Khivanxankiha!

³⁸³ Nihooniwa ntapha nle noonanara aareuwe mulaleyi ule, mulaleyi a mukhatteya, voosis'ula? Ayo, mulopwana. Miyo nkinoona wira mulopwan'ole oottheke mwaha wa yeeyo. Niirale exeeni? Owo ti Munna...nkinwerya wuupuwela yawawe...[Ookhala oniira, "Dan Gilbert."—Mol.] Ayo. Dan Gilbert, mulaleyi a mukhatteya. Okathi mulopwan'ole aavolonw'awe khumwiiva Dan, va miyeeri vakhani sivinre, nto vano mwaar'awe mulopwan'owo ohanle okhalana mwaana. Vekeekhai, Dan ohookhwa, khivanweryaneyya oheleliwa ephome mwaana ene vano. Muthiyan'owo onihimya wira Dan aaroomutuphela, ni wira owo t'awawe... "Ole mwaana a Dan." Eyo...miyo nkinkupali iyo siiso kihinkupaly'aka wira na—wira na—nakhuku ookhalana mapururu eepompa. Nnari, mulopwana. Kookupali wira woothiwa. Kookupali wira Dan Gilbert aari mutthu a Muluku. Ni kookupali wira ti yoopaka ya xetwani.

³⁸⁴ Ntoko etthu ile entthuniw'aya ohimmwa mwaha wa mavekelo. Piixipu ule Mmetotista—Mmetotista aari oosuwela voophiyerya ovara eyo. Sinto owo aamurowa, sinto eyo yaamurowa weemereriwa, eyo yuupuxereriwe paahi mwaha w'etthu ekina. Eyo ekeekhai.

³⁸⁵ Eri ntoko mulattu ula w'ovalaanyana Okuusini, etthu emosaru. Miyo kinnaamini wira atthu yaahaana okhala ootaphuwa. Kookupali wira elapo ela enooniherya otaphuwa. Miyo nkinimuulumela Mwenye Kennedy mwaha wo waaruma anatoropa. Enamwi, kihikhanle na—"nanakoso a naanaano," ni nkhiyo Temokrata. Nkhiyo Repuplikaano. Miyo ka muKristu. Tivo miyo ka...Masi nkinaamini iyo. Nkinaamini wira atthu ooriipa yaahaana otumiha eyuulupale aya mwaha wa itthu ntoko iyo, nnakhala. Yaari e—yaari eparitiitu Repuplikaano. Ephome ya Abraham Lincoln ehaataphula atthu awo okhala wira owo aari mutthu oothunku. Kinoona wira awo yaahaana mano okhapelela eparitiitu aya vakhala wii anrowa omwiira mwaathanle.

386 Masi kinooleelani etthu emosa, mmirav'ole khaari iwe mwaha wa yeeyo paahi, ixikola saya. Mmirav'ole nammuttettheni. Ole mutthu a wAmerika. Nno wookhala otaphuwa w'atthu othene. Nikhuli na mutthu khinaakhanle oorukunxaka evirikanelo awe. Hiyo othene... "Muluku," ohimnye wira, "wa mutthu mmosa, oopaka ephome yothene, maloko othene." Hiyo othene nri mmosa. Masi, mmirav'ole, owo aari surtaatu. Owo mutokweene. Owo aawanela ele eri ekeekhai. Owo aahaana ehakhi y'orowa oxikola. Eyo ekeekhai. Masi saahikhala ixikola sinci-ene owo aakhanly'awe orowaka.

387 Eyo t'itthu ene. Nyuwo mwaphavela oratteene, t'itthu yeela ela ya murumolelo ya mahiku ala vale, enuupuwelihya yeeyo. Mwaha wa xeeni? Awo animukeliha mwaathanle a atthu ale ooriipa a maRepuplikaano wa maTemokrata, vano awo anootumiha ihakhi saya s'eyuulupale ni yeeyo. Ekeekhai yoolikana. Eroho Yowarya khekhanle va. . .

388 "Ole orina ankhili." "Ole orina osuwela." Vekeekhai. Vekeekhai ntoko ekerej'ela, okathi ula wa naanaano, eniitumiha. Khamunwerya woona etthu enrowa okhumelela?

389 Khivankicala sinto ela enookaravariwa. Va ennoorwa. Uhuh. Ayo. Mulattu ene xeeni? Ame aka atokweene yaanihimyaka, "Mmunnye xetwani enimphwanela."

390 Khaavo mutthu iirale etthu emosa paahi ya miruku, owo aari Castro iwe. Ayo, mulopwana. Owo aaroorowa iwe. Vano makapitalista yaarina mutathi wothena n'itthu sothene sa. . . eyo enttharihela eweero, ntoko Estadu Unidu. Owo iirale exeenii? Owo oroothuma ihasi iye sothene. Aaphwannye musurukhu mwa khula enamuna owo aawenry'awe. Exeeni iiraly'awe nto? Owo aahononne musurukhu, nto khwaakakhanya. Khupacerya vasya. Ti yeeyo paahi elapo ela yaawenry'aya wira.

391 Mwaahimwiiwa *Life Line* voosiis'ule [Prokrama a muraatiyuni—Mot.].? Vano, moosuwela, enikhala ntoko otumiha ihasi vasulu va eweero. Ihasi sothene soothummwa. Nto kuveerunu ula a naanaano vano onrumeela musurukhu wa xeeni? Musurukhu wa mpoosito onrowa olivihiwa miyaakha miloko mixexe okhuma vano. Yoomalamala. Owo ti *Life Line* onihimmwa okhuma oWashington, DC, mulapona mothene. Mipoosito awo anrumeel'aya, enatthuna othuma s'okhopela. Ahe, awo anoovaha mwa khula enamuna. Khamunoona? Vekeekhai eyo t'itthu awo an—etthu awo anrow'aya wira. Munnona? Exeeni iyo? Vano, vakhala wira elapo ela enrowa othoiwa, etthu emosa paahi enrow'aya ophiyerya othoiwaa. Etthu emosa paahi enrow'aya ophiyerya omaleliwa.

392 Eyo t'itthu emosa ya miruku entthuneya wira, waakakhanya musurukhu. Masi khenrowa wiiriwa, vathi va erumelo ela ya naanaano. Ekereja Katolika y'oRooma t'erina eweero ya mulaponi. Nto etthu enrow'aya wira otumihaa, "Athu

ala athaaciri,” ni siiso, “a elapo ya vathi,” ntoko Bibilia sihimmy’awe. Anrowa wira exeeni, ehinatthi oxinttiwa? Ekupaniya ya Soona Brown ni Williamson, yinci-enexa ti y’eKatolika, khula enamuna. Ni itthu iya sothene sikina, awo anrowa wira exeeni? Awo anrowa okupali iyo, ni anrowa okuxa musurukhu w’oRooma, vano nto yootumiha ehakhi aya y’eyuulupale. Rooma onookhaliherya eyo. Ayo, mulopwana. Owo onookhaliherya. Nto awo anipaka malamulo oophiyerya vano, yiithukumanyelaka voophiyerya, eruuhiwaka mukapineeti mw’awe. Nkawehani etthu Mwenye Kennedy enivekel’awe.

³⁹³ Nto muhoona yeela, nihiku nlo, khivantthuneya-tho othanla. Eniphwanyihani othanla? Okathi, eniheliw’aya vapapheloni, ni wooniherya ohoolo w’atthu, ni khukhootta wira etthu mwaha wa yeeyo. Okathi, yooniheriw’aya wira maakina mulaponi mothene yaahisokonnyiwa, wira yaamuthanla Mwenye Kennedy ni mwaathanle oowootha. Bibilia khanihimya wira owo aarowa okela mwaha woowoka? Vekeekhai, ewokelo. Vano, nkihiyo ka nwanani a eparitiitu Temokrata nnakhala eparitiitu Repuplikaano, masi kinihimya sokhumelela sa mBibiliyani. Eniphwanyiha-ni mwaathanle? Awo annimusuwela t’ani onrowa okela mmo.

³⁹⁴ Akavi a nyuwo anupuwela eprokrama ya mutelevisawuni vaavo yaari athiyana aili yaavennye? Nto mmosa khwira, “Miyo kinrowa omuthanla Mwenye...” Ahiso, muthiyana muPrustante iirale, “Kinrowa omuthanla Mwenye Kennedy.”

Awo khwira, “Mwaha wa xeeni?”

³⁹⁵ Khwira, “Okhala wira kinoona wira owo mulopwana mmosa oosuwelexa onvikana Mwenye Nixon. Owo onookhala Mukhulupale oophwanela.”

³⁹⁶ Vano owo khwira, “Ola muthiyana muKatolika. ‘T’ani onrow’anyu omuthanla?”

³⁹⁷ Owo khwira, “Miyo ka muKatolika, Katolika y’oRooma, muKatolika oororomeleya.” Owo khwira, “Nto miyo kinrowa omuthanla Mwenye Nixon.”

“Mwaha wa xeeni?”

³⁹⁸ Khwira, “Okhala wira, miyo kinoona wira Mwenye Nixon onookhala Mukhulupale oophwanela okhala wira t’ori oolimalelexa itthu. Owo onnimusuwela sana komunismu.” Muthiyany’ole aahimnye etthu yoowootha.

³⁹⁹ Miyo kihaana So...awo aniihana, *Sookhumelela Sa Waamini Wahu*, eliivuru y’eKatolika yuulupalexa ekhanle oothummwaka. Ni mme enihimya wira, “Akhala muKatolika vapapheloni, onxiraana ni muPrustante; akhala muKatolika onimuthanla muPrustante, awo animoomoliwa mopatthanani wa ekereja Katolika.” Ekeekhai. “Ni yakhala aKatolika aili exiraanaka mwaha wa muteko mmosaru, anrowa omukuxa

muKatolika okhanle oororomeleyaxa wa 'ekereja maama' emuthanle yoowo."

⁴⁰⁰ Munnoona moota, othepya iwo, etthu awo aneerery'aya wira? Ovaha musurukhu, wira ethume. Mwaha wa xeeni? Awo anthuna ohonona. Nto awo animwiira, ni yoohononeya. Vano exeeni iyo? Eyo enttharihela eweero. Nto ekereja Katolika, ethokiheryo y'atthu anruma, t'erina eweero ya mulaponi. [Ookhala oniira, "Itoolare ipilyawu emiya ni miloko mithanu na mosa ni thanu na tthaaru."—Mol.] Ipilyawu emiya ni miloko mithanu na mosa ni thanu na tthaaru. Eyo vo. Orihela ihakhi saya mwaha w'ottharihela eweero, ni nyuwo atthu musuke itthoko sanyu paahi n'itthu, masi mwa a ekereja Katolika. Elapo ti ya ekereja Katolika. Etthu yothene evareliwe-mo siiso, mwaha wa musurukhu aya. Bibilia khonihimya yeeyo? Eyo t'ilarato Bibilia ennipakel'awe.

⁴⁰¹ Etthu entthun'aka ohimya, munna, olelo. Awo anrowa wira, "Eyo enrowa okhaliha ekereja yoooreera. Eyo enoorowa otakaniha oPrustante." Enikhala ntoko yoooreera wa niitho n'ephattu, masi osuwela wa vathi va ti ololo vamaithoni va Muluku.

⁴⁰² "Tivo Muluku ootthuna, mwaha wo—w'olaleya wahu onooniwa okhala ololo, owoopola ale arimeenle," ni muteko wa Muluku, Owo otthokiheny'awe Ekereja Awe, wira oteke Ekereja vasulu va mireerelo iya sa erooho nave kahi vasulu v'etthu p'itthu eri ya vathi.

⁴⁰³ Petru oohimya, "Nto okhala wira mootthyawa ohononeya wa molumwenkuni mwaha wo wunlela musurukhu, ni wunlela okathi muulupale, ni soopuha, ni olya, ni owurya, ni soowunlela sirin'ahu. Nyuwo mootthyawa seiyo. Nto vano mukhalihwiwe mwa enamuna yoooreera y'okhala. Miyo kiniroihele eyo Ekereja," owo oohimya. Eyo eri vo. Nyuwo moosoma? Muhiiwa sana? Muhiiwa okathi osomm'ahu ottuli va mwa Petru Aneili? Nwiriyanane paahi etthu enihimya'awe va, moota ereeraly'aya elempwe va, moota owo—owo onihimya'awe yeeyo. Vaareera. Mmuwiriyanane vano owo aalavulaka. Vaareera.

Petru, *Simoni Petru, murumeyi ni murummwa a Yesu Kristu, w'ale a . . . naakhenly'ahu vamosa waamini wooreerexa mwaha w'exariya ya Muluku ni Moopoli ahu Yesu Kristu:*

. . . murettele—muvahiwe voowaattexa mwaha w'omusuwela Muluku, ni mwaha wa Yesu Kristu Pwi'yahu,

Mwaha w'o—w'owerya w'eMuluku awe oonivaha sootheene . . .

⁴⁰⁴ T'ani anrowa orithi elapo n'itthu sothene? [Ookhala oniira, "Ooreera murima."—Mol.] Vekeekhai. "Aniira mpantta . . ." Ayo. Vaareera.

. . . seiyo siluluwanne ni ekumi ni nttittimiho, mwaha w'omusuwela ole oniitthanenle nttittimiho nttittimiho:

Mwa seiyo hiyo oonivaha suulupalexa . . . natiri ooreerexa: wira mwaha wa seiyo mwiireke mpantha wa mukhalelo w'eMuluku, muttharuwaka soonanara (Nwiriyanane eyo.) mwaha w'osiveliwa n'itthu siri molumwenkuni.

⁴⁰⁵ Ethaama mwaha wa musurukhu, ethaama ya itthu suulupale, ethaama mwaha wo osuweliwa, itthu iya ti sookhwa wa mulipa-oowaamini. Hiyo khasinnicala. Eheema wala murapattha, kaarowa ovelavelela exeeni; okhala wala okhwa, osama wala opwina? Ela t'itthu enicaliw'aka, Omwene wa Muluku. Hata kisukaka ethhoko aka, hata kaasukaka amusi aka, hata kisukaka ethhu p'itthu, mukihye kimusuke Kristu, nrromelo ahu wa Ovuwa.

⁴⁰⁶ Mukiteke, O Pwiya, mwa *Yeela*. Kristu okhale Muru aka, onivara muteko mwa miyo. Mwa mulipiheryo aka, waamini waka ori mwa Yoowo, ikuru, ankhili, wiisumaaliha, ovilela, othunku, ni waaphenta axinna, sivare muteko mwa miyo, O Pwiya, ti mavekelo aka. Khenikicala; okhala wala okhwa, osama wala opwina; muromolelo, ohikhala muromolelo; mpatthani wala ohikhala mpatthani. Muhiye Yeeyo evare muteko mwa miyo, muhiye ikuru sa Kristu, ankhili Awe, sikhwalale, wira kiwerye waaxuttiha awo.

⁴⁰⁷ “Maana Muluku ohaakhaliha Mukereja, arummwa, maprofeta, awiixuttihi, amukukhula, ni anamalaleya ehapari yooreera, sothene wira oreerihe ni oruuhe mireerelo sothene iya wa yeeyo, wira orehererye Orwa wa Mwaana a Muluku.” Khula nimosa wa maluku *ala* t'ikaruma sinikuxiwa mwa Yoowo. *Iya* t'ikaruma sa Yoola. Khula mmosa wa mireerelo iya ti sawawe Yoowo, ni sinikhuma mwa Yoowo, mwa seiyo. Amen.

⁴⁰⁸ Ewoora yanamuloko ni piili. Sothene iya sinrowa vayi? Amen. Munnimphenta Yoowo? [Muthukumano oniira, “Amen.”—Mol.] Munnaamini yeeyo? [“Amen.”] Nwiriyanane, anamwane.

⁴⁰⁹ Munna muthiyana Kidd oohimya, voosiis'ula, “Munna Bill, nkisuwenle sinto kinootthikela owoonani-tho.” Eyo yaahala okiiva. Munnona? Owo onuupuwela wira onimuuluvala, nave ti siiso. Miyo kaahimuvekela Muluku wira omwiinanele ni Munna Kidd mulopwana, okathi munci-ene.

⁴¹⁰ Mukihye kooleleni, hiyo khanisuwenle okathi xeeni ninrow'ahu okhala mmosa ni mukhw'awe. Miyo nkisuwenle okathi xeeni onrow'aka okhala ni nyuwo. Khino Muluku pooti okiitthana okikumiha molumwenkuni. Owo pooti okiitthanelani nipuwa nikina na muteko. Owo pooti owiitthanelani nipuro nlo. Hiyo khanisuwenle. Masi, nrowe—nrowe nikhalane. Nihihye ela onivira vamuru. Nrowe nikuxe yeeyo.

411 Eyo eri vo, mBibiliani. Ela eri va, eyo ennithhariha sana itthu sothene. Nto vaakhanle wira kaahikhalana okathi wo wira! Khivanweryaneyya wira nihiku nimosa. Moosuwela eyo. Masi, vanniweryaneyya okhaliha etthu yothene vamosa!

412 Nkawehani, naamalelaka vo ni mutthak'owo, munimoona etthu Eroho Yowarya yiiraly'aya vale vaxirini, khamunoona? Akavi yaari vaava okathi ene yoowo? [Muthukumano oniira, "Amen."—Mol.] Munnona? Vekeekhai! Yaakhurunwe vaava, khukweretha etthu ene yeeyo, Nlaikha nle n'Apwiya.

413 Moone, eyo ekeekhaii. Muhihiye eyo wootthyawani. Nvarelele eyo, aana. Nvarelele eyo. Muupuwele, muteke vasulu va waamini wanyu, ikuru, ankhili, ovilela!

414 Vano, va, koonna wira kaahikhalana ekapatti y'epaphelo va, vakhala wira nkimoronxe nipuro nlo okathi waalaley'aka. Ela eri vaava va. Kooxukhuru, munna. Kooxukhuru, vanci-ene. Mwaatthunaka o—oweha vaavo, ni woona sinto yookhala etthu va mwaarow'anyu owerya o... Khino vannireerela vakhani olikanyiha ovikana ele eri vo, wira nwerwe olepa siisaale epantte ya yeeyo. Miyo kinookhomela osulu nno, wira nwerwe oweha ni—ni mulepe siisaale.

415 Ni kintthuna wira mukuxe musome, ni mulikanyihe, vano mwiireke muttharihaka yeeyo. Muhisome paahi, mulikanyihe, masi mwiireke muttharihaka yeeyo okathi oniiir'anyu. Mukuxe eyo vaxariya-vo mmansinyu. Muhiire, "Ahe, vaakisivela wiiwa eyo." Ni miyo, vaakisivela. Masi wiiwa, vano nto waakhela, ti voovirikana. Munnona? Munnona? Ti yoovirikana. Munnona?

416 Sintthuneya ithanleliwo thanu na piili wira mphwanye mukhalelo wa Muluku. Siri Okathi Mithanu na Miili sa Ekereja, Muluku oruuhal'y'awe Ekereja wira ephiye mwa ethanleliwo ela. Nto Owo aarina anamitthaka athanu n'aili wira yiire yeeyo. Siri thanu na piili, thanu na piili, thanu na piili. Munnona? Thanu na piili nu—nummaru na Muluku noomaleliha, vano tthaaru nummaru na Muluku noolikaniha. Tivo, siri tthaaru, ni thanu na piili sene tthaaru. Vano, otthariha matemaatika, mwa erooho, ni Masu, ni okhalela onamoona wa Eroho Yowarya, sothene iya soomaleliha etthu ene vamosa. Nrowe nisome.

417 Nrowe nincererye mwa waamini wahu itthu iya, nto, wira niwerye ophiyerya mukhalelo woomalela wa Kristu; nipatthanaka vamosa ni ophenta wooreera, omoova Muluku, ottittimihana mmurimani mwahu mmosa ni mukhw'awe, ottittimihana sana mmosa ni mukhw'awe, oreerelana murima w'axinna alopwana n'athiyana, nnakhala n'ethiru, hat'etthu woohikhala makhalelo ooreera a Eroho Yowarya paahi. Munnona? Mukhale vamosa, mukhale muKristu. Mweetteke mowaaminini. Muhiye owerya wa Muluku okhaleke mwa nyuwo; muhiye ankhili a Muluku, yaphiyerya yooreera ni yoonanara.

Okathi xetwani oniruh'awe etthu ehikhanle yoolikana ni Soolempwa, mwiivalaanye n'itthu iyo. Ti yeeyo.

⁴¹⁸ Kinniwerya waatthokelela arummwa ale khanaireke ntoko hiyo. Awo yaarookhumasa, alakela atthu a moolumo vakhani, mpakha yaaphiy'aya vapulpitu. Awo yaamuvolowa ni wira etthu yatthuneya wira yiire, n'ukhuma. Ayo, mulopwana. Awo yaahikhalana owerya. Yaahikhalana ikuru. Awo khiyaarina hata ovaanyihana n'atthu. Awo yaanisuwelasa vatthu vaalip'aya. Ti yeeyo tu. Awo yaanisuwela etthu yaamini aya. Awo yaanithikela ekelelaka ohoolo mwa Eroho. Yiraka paahi . . .

⁴¹⁹ Vekeekhai ntoko saahimmy'aka ohiyu uwo. Ethoonyeryo yaamukhaani paahi, ti yeeyo tu Muluku aarin'awe wira, vano khiyaavo yaarowa oweemexa. Awo khiyaakohakoha n'usoma, ni hum-how ni wuukhuwa ntoko siniir'ahu, sinto yaahaana wira *ela wala ele*. Awo yaamukelela ohoolo ni wira, khula enamuna. Ethoonyeryo yaamukhaani paahi yaakhuma wa Muluku, awo yaamwiira, naanaanoru. Mwaha wa xeeni? Yaawerya sayi osuwela wira yaari ethoonyeryo yaakhuma wa Muluku? Awo yaahikhalanasa maneema ala othene mu, ithanleliwo iya sothene. Nto ethoonyeryo ekhaani yoopacerya ya Muluku yaamulikana ni khula epantte ya *yeela*, nave ni Masu Awe. Awo yaanisuwela wira yaari Masu a Muluku, nto yaanirowasa. Khiyaarina oxankela hat'etthu ekina. Muluku alavula vale, awo yaanirowasa. Hiyo ninlavula . . .

⁴²⁰ Muluku onoolavula ni hiyo, nto hiyo niniira, "Ahe, ninoopacerya. Nnimoona sinto ninoowerya okhalana Ekumi ila." Naanaanoru, mutthu onimoonyoonyihani. Ahe, vekeekhai, owo ti xetwani.

⁴²¹ Nyuwo mwaahaana omoona owo okathi eerery'awe okikhoottiherya orwa muthukuman'ola voosiis'ula. Mwaahaana okhalana yeeyo okathi mmosa. Oh, ikharari! Kihaana owana khula okathi kinromol'aka muthukumano. Ni kaarowaka onvekelela muretta, ni mutthu onookhwa ni ohooponwe, onookhala waattakiwa oraame imaara miloko miraru muhina mwa minuutu muloko, vaweryaneya vale waakuva siiso, wira okikhoottiherye yeeyo. "Oh, Munna Branham, muhaana wira *ela*." Masi wookhala munepa v'ekhomoni. Vekeekhai. Ayo.

⁴²² Ohiyu umosa, kaahitthaniwa orowa nipuro nlo. Mmiravo mmosa, kaalavunly'aka ni yoowo ohitto nno weiwo oniihan'anyu, epasari yuulupale, miyaakha vakhani sivinre. Owo khukhala namuhapaliwa. Miyo kaanimusuwela mmiravo ene, mmiravo mmosa ooreera murima, masi aari natampi. Vano nto ame awe khulikari. Kinoona wira yaamulikarenle Doc vaara vaili. Miyo . . . Khulikari, nto khwiihaniwa Billy, nto—nto vookiserya khwaakhela muhupi. Nto waakhenly'aka muhupi, ohimya exariya, nkinakhalaneke ekhotto ntoko eyo kookhalaru, wira kimuphiyerye mmirav'ole.

423 Nto vaphiyaly'aka vale, mmirav'owo oowooniha othunku khaawerya-tho okisuwela. Owo aari vale, oommaathale ene vale, oohiisuwela, otuphatuphaka paahi. Atithi awe yeereryaka ommaaliha, yiiraka, "Oophentiwa." Nto mulopwan'owo orina miyaakha miloko mithanu, soophiyaka miloko mithanu ni mmosa. Ni iiraka, "Oophentiwa," *ela*, ni "maalani." Nto owo athhunaka ovenya. Miyoono sawe saamukhaani saari ntoko sa mwiitti *siisaale*. Mmirav'owo aarookhalanexa kankuru mpakha wahaakhanly'awe hat'etthu woohikhala kankuru paahi. Itthu s'erutthu awe sothene saarina kankuru. Hata moovirani mw'ephome awe aari kankuru, itthu sothene. Vano aaphwanyaneya vale, otthunaka ovenya, ni airaka siiso.

424 Miyo khunvara ntata, miyo khwira, "Woodrow, Woodrow, ola ti Munna Branham."

425 Atithi awe khwira, "Khamummusuwela? Ola ti Munna Bill. Woodrow, ola ti Munna Bill."

Owo khwira, "Uh. Huh. Uh-uh-uh." *Siiso*.

426 Vano atithi awe khuweha khwira, "Billy, mwaahipisa vakhani orwa."

Miyo khwira, "Khenakhaleke voopisa. Owo ori vaava." Kookhalana ekhotto.

427 Vano nto amiravo akina, amiravo akina tho, anatampi, yeemenle vaavale, amusi awe kamosa-kamosa. Miyo khwira, "Moone, amiravo, mwiilikanyihe, 'okhala wira munoophiya nipuro nla. Muhaana orwa va. Munnona? Khino woohikhala ni ka—kankuru yoola. Khino munoorwa n'itthu ekina, iwo mphironi, nvuuvaka ephome muhalelaka okhwa, wala etthu siiso. Muhaana ophiyerya yeeyo." Hiyo khulavula ni yaawo.

428 Miyo kaamuwehererya wira koone etthu Eroho yaarow'aya ohimya wira kiire. Kiwehereryaka. Naanaanoru, kaahoona ethooneryo ele yaamukhaani. "Mmwiixaatherye matata anyu."

429 Miyo khweetta vale, khwira, "Othene anyu muuramihe muru." Awo othene khuuramiha muru, amiravo aili wala araru mme.

430 Miyo khumpweherya matata. Miyo khwira, "Pwiya Muluku, mmuhiye mmirav'ola okhale oowiisuwela w'osuwela etthu enrow'awe wira, ohinatthi okumanana etthu ila. Owo onookhwa. Xetwani ula oomutthuka, vano owo onoorowa. Ni owo t'ohapaliwa onihalela okhwa, nto va ori mwa mukhalelo ola. Kinvekela wira Nyuwo mukhale oomoriwa ikharari ni yoowo." Nto okathi omuvekelenly'aka, voosiisu aya aarookilaathi, alavulaka n'atithi awe.

431 Busty Rogers, yoowo... Miyo kaahiihaniwa oxipiritaali nno, kahi khalayi. Kaari weiwo nihiku nenlo, kaamanly'aka olaleerya oMilltown iwe weiwo Georgie Carter aavonihw'awe. Othene anyu munnuupuwela eyo. Vano weiwo okathi Munna

Smith, mulaleyi mmosa Mmetotista, iiraly'awe, "Akhala mutthu otonko opatisiwa, ni Nsina na Yesu Kristu, okhume muheemani mw'aka," siiso. Osulu iwe oTotten Ford, kikhalanaka muthukuman'ole iwe. Nto, oh, owo khukipwapwela mwa itthu sothene mukhanly'anyu wuupuwelaka. Miyo kuhihimya hata nuulumo; khukelela ohoolo. Kaahikhalana orummwa. Apwiya khukooniha yoowoona. Aahikhala mwapwittipwitthi vale, ootthukiwa nipuro nlo mothakoni. Nyuwo othene munnuupuwela yoowoona ene, othene anyu. Kinoona wira munnuupuwela. Munnuupuwela? [Muthukumano oniira, "Amen."—Mol.] Vekeekhai. Vaareera. Vano miyo kaamweetta kiviraka mothakoni mme, kixayaka yeeyo.

⁴³² Miyo khurowa oTotten Ford. Munna Wright vo onnisuwela. Hiyo khurowa iwe, khinaasuwela etthu yo wira. Miyo khuthuma ekaaxa yaamukhaani ya esapawu, ni isentavo muloko. Miyo kaarowa okhuma vale, weemela vale olaleerya mwaha w'ekaaxa yeeyo. Owo khwira wira aarowa owela, vasulu va mwaako, wira amwiire nakoso. Miyo khurowa ni yoowo. Yaahikhala ekereja emosa yuulupale Patista ya khalayi yaari osulu iwe, yoohikhal'etthu. Apwiya khukiirela, "Mweemele vaavo."

⁴³³ Miyo khwira, "Mukihiye kivire va, Munna Wright." Miyo khweemela. Owo khuwela khutthika.

⁴³⁴ Miyo khurowa weiwe, nto nkaawerya ohula mukhora. Miyo khwira, "Pwiya, Nyuwo mwaari mwa yeela, munatthuna wira kivolowe mukereja, mukihulele mukhora." Miyo khukilaathi vale nto khinuupuwela.

⁴³⁵ Khumwiiwa mutthu arwaaka; khukaattamela, nto khwira, "Ehaali anyu? Kinimooleelani," khwira, "muntthuna ovolowa mukereja?"

Miyo khwira, "Ayo, mulopwana."

Owo khwira, "Miyo kookhalana ehulelo va."

⁴³⁶ Khupacerya muthukumano. Esumana yoopacerya, voohihipiya hat'etthu. Ohiyu woopacerya, kaarina muthukumano, Munna Wright n'amusi awe. Naanaanoru, woomalani wa esumana, khivaaweryaneya hata opwehiwa athu vapuwani, vaanirika. Nlelo mwapwittipwitthi ule khaarwiiye. Munna Hall khoopowa okathi ene yoowo, pastore a weiwe vano, othene aya. Nkaawerya ophwanya vatthu vaary'awe mwapwittipwitthi ula. Nuuvira okathi vakhani, aari a ekereja ya Kristu, vathi va mwaako vale, mwaaruusi ule a miyaakha mithanu na mixexe ni miyeeri mithanu na miraru abeetaka, ommaathale ene vale. Aari vale. Nyuwo othene munnimusuwela wahala ene. Ayo, mulopwana.

⁴³⁷ Vano exekuw'ele okathi Busty Rogers, mutokweene muulupale ooneneva eemenle vale... Miyo khurowa vaavale. Nto vale waaphwanyaneya muthukumano wa Munna Smith wira okitheye, wira okinyemule, mwaha w'opatisaka ni Nsina

na Yesu. Miyo kikhuma mmaasini mwa marove a oTotten Ford, weiwo yaarin'aya e...[Nipuro vahiitthu mufiitani—Mol.]...osulu wa muro iwe, ni etari erumaka vancipale ntoko saaweryaney'aya. Matiyaakono aili khukela ni miyo.

438 Miyo khwira, “Miyo kineemela va voosiis'ula kooniheryaka Soolempwa Soowaarya sa Muluku.” Miyo khwira, “Kinsoma mBibiliani va vatthu Petru ohimmy'awe wira, 'Murukunuxe murima, khula mmosa a nyuwo, mpatisiwe ni Nsina na Yesu Kristu wira muleveleliwe itampi sanyu.’” Miyo khurukunuwa, khimunnya Eliivuru mmosa wa matiyaakono.

439 Kikhuma vale, nto miyo khwira, “Mutthu ti mutthu onthuna, ottharuwa itampi sawe, ti mutthu onoorwa.” Kikhuma mmaasini mme. Miyo khwira, “Wa miyo enikhala ntoko Malaikha akilanthi va khula erintta vano, ewehaka.” Oh, wulu! Okathi waopatins'aka oophiyaka aili wala araru, muthukumano awe wothene, athiyana ale yaawanre ivistiitu sa seta, khunakela mmaasini, ekhuwelaka voowiituperya sana. Miyo khupatisa muthukumano awe wothene ni Nsina na Yesu Kristu. Moosuwela. Kookhalana elatarato aya. Yaari vo.

440 Yaari exeeni iyo? Wuncererya mwa ikuru sanyu. Munnona? Muhiye mmansaya. Muluku onnisuwela moota wo wira. Muluku onnisuwela moota wo wiiriha itthu iya okhumelela. Mwaahiye athu ehimye etthu antthun'aya ohimya. Khivanvirikana hata vakhani. Mukeleleke ohoolo paahi.

441 Busty Rogers eemenleene vale, okathi woonaly'awe yeeyo, owo khwira, “Vano miyo kinnaamini ni murim'aka wothene.” Vano owo khurwa mmaasini, owanreene ikuwo sawe sooreera, khupatisiwa ni Nsina na Yesu Kristu.

442 Miyaakha soophiyaka miraru wala mixexe sivinre, awo khukiihana va oxipiritaali oNew Albany. Iwe aari yoowo, akhwaaka, mwaha wa kankuru, aaroomukhuura paahi. Matothoro yaamuvanhe okathi mpakha voosiisu aya, wira okhale mukumi. Khwira, “Owo onimookhwa naanaano.” Khwira, “Murwe naanaano va.”

443 Miyo khurowa okatthi, varonw'aka, wira keemele vale kivekele. Owo khwira, “Billy, yookhala ekhweyii eneetteetta valoomoni vale.”

444 Vano miyo khurukunuwa, wira kiwehe. Miyo khwira, “Busty, ole waataana. Khamunrowa okhwa. Waataana w'Ephome onniwoopolani.”

445 Miyo khumpweherya matata aka, khwira, “Pwiya Muluku, yoowoona ele vale enooniherya wira Nyuwo muri vaava. Waataana Wanyu ti wira, ola, 'Makhwatta Awe t'anivoninhe.’” Khumwiixaatherya matata, nto vaavale vene khuvona. Khuroihiwa owaani.

⁴⁴⁶ Nto mwa miyaakha soophiyaka mixexe wala mithanu, miyaakha soophiyaka mixexe, kimiseryaka omurathini ni itthu sothene, kirowaka. Nto vaavo kankuru aattamel'awe vammilo va nipwiipwi, yaahiruuhela makuma, naahikhala nlutte nuulupale noolipa. Matothoro, atokweene a oxipiritaali, khimuleela wira oloola wa kopaltu waamuwerya wookolela yeeyo, wira eviriheke yolya yinci-ene khula okathi. Owo waanimurikela omirya yolya yinci-ene, aahaana olya vakhani-vakhani. Owo khurowa wira alooliwe. Miyo nkaasuwela wira aari weiwo.

⁴⁴⁷ Vano okathi ooperariw'awe, khooniwa wira eyo yaahimuruuhela othukumela erutthu, ni aanivuua ephome moottooporeni. Khimuruuhela nanttethe epante emosa mpakha vathi siiso. Nto etthu emosa paahi aawery'awe wira waari wiipulela epante emosa. Vano owo aahikhalana elaapi, *siiso*, ni wira, "ah, ah, ah." Nto owo khuyatthuna olepa, athukumelaka *siisaale*, ni ntata nawe nikumi. Epante awe yoothiyana, aarina nanttethe. Vano owo khulepa, vantatani vawe: "Yesu onnoopola, 1900 n'itthu." Atthu khiyaawerya osuwela sana.

⁴⁴⁸ Nto vano amwaar'awe ni wira, "Munna Branham, nkinsuwela enihimy'awe ni yeeyo."

⁴⁴⁹ Miyo khwira, "Muhano Rogers, enihimy'awe, waari 1900 n'itthu, owo ooponw'awe khupatisiwa ni Nsina na Yesu iwe. Ti yeeyo enliva vano. Owo khaanoova okhwa."

⁴⁵⁰ Miyo khwira, "Pwiya Muluku, mwiinanele ekumi awe. Miyo kinvekela, mwa Nsina na Yesu, wira mwiinanele ekumi awe." Khumwiixatherya matata. Nanttethe khumuhiya. Othukumela khumala. Vano owo khivenya voolilini. Nto owo t'oweemela vano, ohimyaka onamoona.

⁴⁵¹ Muncererye mwa waamini wanyu, ikuru; muncererye mwa ikuru sanyu, ankhili; mwa ankhili anyu, wiisumaaliha; mwa wiisumaaliha wanyu, ovilela; mwa ovilela wanyu, othunku; mwa othunku anyu, waaphenta axinna; mwa waphenta axinna wanyu, Eroho Yowarya, nto Kristu onimoorwa. Okhala wira, vathi Vawe vale... Eroho Yowarya ti Eroho ya Yesu Kristu Mukereja, wira yooniherye maneema ala. Oh, wulu!

Ela eri va, iwoora muloko ni miili ni minuutu muloko ni mithanu.

Miyo kinnimpenta...Miyo kinnimpenta

Owo

Okhala wira Owo t'opacenyre okiphenta,

Ohitto *nno*, muhinatthi okhala hat'etthu.

Nto oothu-...(Exeeni Owo iiraly'awe?)...

woopowa waka

Vamwirini w'oKalvario.

Kikhanle sayi *yeela?* Okhala wira Owo t'opacenrye, okiphenta.

Miyo kinniphenta Yoowo, miyo kinniphenta
Yoowo
Okhala wira Owo t'opacenrye okiphenta...
(Mwaha wa yeeyo.)
Nto oothuma woopowa waka
Vamwirini w'oKalvario.

⁴⁵² Miyo kinniivaha, voosiis'ula, wa Yoowo, ni murim'aka wothene, wira, ni mukhaliheryo Awe ni mwaha wa mahala Awe, kinvekela wira kinoophavela khula nihiku, voohihyererya, mpakha koone wira khula emosa wa soothuneya iya sinikhwalala mwa mukhalelo ola mwaamukhaani wa miyo, mpakha kikhale mooniheryo wa Kristu mukumi. Maana, Owo ohiikhaliha etampi ntoko miyo, wira miyo kikhale... kikhale exariya ya Muluku, ntoko Yoowo. "Owo ookuxa opuro aka; Pwiya, mukihye kikuxe Wawawe vano." Okhala wira, mwaha wa yeeyo Owo okhwenly'awe. Akavi anrowa wiivaha mwa etthu ene yeeyo, ni mahala a Muluku? [Muthukumano oniira, "Amen."—Mol.] Ni miru sahu soowuurama vano, ni matata ahu osulu.

Miyo...

⁴⁵³ Kinniivaha, Pwiya, ekereja ela enniivaha, "Mukhalelo woomalela wa Yesu Kristu!"

Okhala wira Owo t'opacenrye okiphenta
Nto oothuma woopowa waka
Vamwirini w'oKalvario.



MUKHALELO WA MUTTHU OOMALELA EMK62-1014M
(The Stature Of A Perfect Man)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku vaasiisu, mahiku yettaka 14 mweri wa Outubro, 1962, oBranham Tabernacle oJeffersonville, Indiana, w'Amerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org